
This is a reproduction of a library book that was digitized by Google as part of an ongoing effort to preserve the information in books and make it universally accessible.

GoogleTM books

<https://books.google.com>



Austr.

5474

p
l

Austr. 5474^P

Keri, Valentin

S E R I E S
BANORUM
DALMATIÆ,
CROATIÆ,
SCLAVONIÆ
HONORIBUS.

Reverendorum, Perillustrium, Præno-
bilium, Nobilium, ac Eruditorum Do-
minorum AA. LL. & Philosophiz

MAGISTRORUM
O B L A T A

A B

*Illustrissima, Spectabili, Perillustri, Pra-
nobili, Nobili*

RHETORICA TYRNAVIENSI,
Cum in Alma, Archi-Episcopali, Societa-
tis JESU Universitate Tyrnaviensi

P E R


REV. PATREM

ANTONIUM HELLMAR,
è Soc. JESU, AA. LL. & Philosophiæ
Doctorem, ejusdemque Professoremeritum,
& p. t. Seniorem

**Supremâ AA. LL. & Philosophiæ Lau-
reâ donantur.**

Annô M. DCC. XXXVII. Mense Augusto, Die 1.

Tyrnaviz, Typis Academicis, per Leopoldum Berger.



REVERENDI,
PERILLUSTRES,
PRÆNOBILES,
NOBILES, AC ERUDITI
~~DOMINI, DOMINI~~
AA. LL. & Philosophiæ
MAGISTRI.

LAureatis VOBIS Philosophis
Laureatos pariter Heroës in
devoti animi tesseram offerimus :
non quales mendax finxit Græcia, vi-
dit nunquam: sed quos, cum foecunda
magnorum Virorum matre Ungaria, Il-
lyri-

lyricum protulit; præclarâ quidem Gentis utriusque gloriâ; sed unâ, eximias eorum virtutes imitandi necessitate NOBIS imposita. Nempe non mirari duntaxat oportet Majorum facinora, sed moribus exprimere: ut, quod illi nobis sunt, fiamus posteris, vitæque in toga & sago illustris, exemplar efficiamus. Neque enim magnum est, magnos inter, aut à magnis nasci; nisi acceptam à Majoribus gloriæ hæreditatem, nova accessione posterius augeamus. Vivite jam Domini Neo-Magistri, dùmque de recens VOBIS à Philosophia oblatis Laureis, sed VESTRO sudore rigatis, gratulamur, munusculum hoc sincero affectu complectamini.

ITA PRECANTUR

Honoris Vestri Studiosissimi

RHETORES TYRNAVIENSES.

**SUMPTIBUS SUIIS
EXCUDI FECERUNT.**

Illustrissimus Comes

FRANCISCUS BERÉNYI, de Karancs-
Berény, perpetuus in Bodók, Ungar-
us ex Comitatu Nitriensi.

*Spectabiles, Perillustres, Prænobiles,
Nobiles.*

LADISLAUS BALOGH, de Galantha,
Ungarus Czifferiensis, ex Comitatu
Posoniensi.

JOANNES NEPOMUCEN. KEREKES,
de Szent-György, Ungarus Czifferi-
ensis, ex Comitatu Posoniensi, Sem.
S. Adalberti Convector.

JOSEPHUS PIGETHI, Ungarus
Tyrnaviensis, ex Comitatu Posoni-
ensi.

CA-

CASPARUS BUFFLER, Ungarus Sze-
redinensis, ex Comitatu Posoniensi.

MICHAEL KELECSÉNY, Ungarus Al-
só-Loczensis, ex Comitatu Posoni-
ensi, Seminarii S. Adalberti Alumnus.

JOANNES KOLLER, Ungarus Agri-
ensis, ex Comitatu Hevesiensi, Sem.
Mariano Szelepcséniani Alumnus.

ROCHUS EITLSPERGER, Austria-
cus Viennensis.

GEORGIUS SCHREIBER, Ungarus
Nitriensis, ex Comitatu eodem.



AD LECTOREM.

P*Ermoles*to adeò *scriptionis* genere, in quo dubia plurima, incerta multa, me illigare ut vellem, is, qui à natura omnium generi inditus est, Patria, Sociorùmque amor impulit: ut verò auderem, geminorum exempla, quorum alter *Palatinorum Ungariae catalogum* cœpit texere, alter *Judicum Curia syllabum* absolvit, animârunt. Horum ego, etsi non passibus æquis, pressurus vestigia, de *Illyricis Pro-Regibus* cogitare cœpi, usûsque implexi usque adeò itineris ducibus *Joanne Lucio Tragurienti Cive*, *Georgio Rattkaio Zagrabienti Canonico*, *Samuele Timonio S. J. rerum Ungariae chronologo* in paucis accurato, aliisque, quorum memi-

nisse me sepius visurus es, metam
tandem Deo auspice tenui. Contulit
quoque ad id non mediocrem suam
symbolam peritissimus rerum no-
strarum vir Gabriel Kolinovich-
us Senquic2ensis, qui vix intellectô,
idque cûm pene summam labori ma-
num imponerem, animi mei institu-
tô, Excellentiss. duorum PALFFII
& ESZTERHAZII, moderni
hujus, illius emeriti, Banorum actis
submissis, non modica me sollicitu-
dine absolvit, certè amicô, eruditô-
que suô munusculô plurimùm devin-
xit. Vale Lector Benevole, atque
non ea, quæ coacti præterimus; sed
quæ fecimus, cogita; tum, si otium
tibi, facultasque est, defectum sup-
ple: id si feceris, non parùm eru-
ditos omnes, ipsamque, cujus glo-
ria, & honor in primis nobis esse de-
bet, Patriam tibi devinxisti. Vale.

SERI-



DE ORIGINE BANORUM;

Eorúmque vetere, ac moderna
Dignitate.

§.

BAnorum Croatiae eadem fere, ac confirmati hoc in Regno Evangelii initia fuere. Posteaquam enim Ethnicis subiecta Regibus Croatia suis sepulta tenebris unum fere seculum delituisset, veram tandem lucem annò à Christo nato 641 sub *Budimerio* naeta, cum nova Christi lege novam pariter Reipublicae formam accepit. Non ignoro ecquidem fidem veram ab ipso Divo Paulo Apostolo in Illyrico divulgatam; tamen infidelium Principum crudelitate factum est, ut iacta pietatis praefocarentur semina, certè ad paucos, eosque fere intra montium abdita conditos, reciderent. Instituti nostri minimè est rerum has vicissitudines persequi: id unum adduxisse

A

xisse

xisse sufficiat, Croatiam frustra tot annis ex-
petita pace sub Rege *Budimerio* potitam esse.
Elatum quippe postremum Ethnicorum Re-
gum *Rasimerium* excepit *Satymerus* Chri-
stianam jam fidem professus: quo pariter fa-
tis sub annum 640 functo, Regnum *Budi-
merius* boni Patris optimus filius occupavit:
hic à Constantino Thessalonico notæ Sancti-
tatis viro Christi edoctus sacra, lustricisque
ablutus undis Crucem Orthodoxam Regio
Sceptro felici nexu sociavit. (a)

Sedebat tum ad clavum Ecclesiæ *Joannes*
iv. natione Dalmata, *Heractio* Augusto Im-
perium Orientis moderante: ambos de sua
conversione certiores per Legatos faciens *Bu-
dimerius*, viros illustres, qui sacrum profa-
nūque Croatiae statum ordinent, poposcit,
& impetravit. Pontifex certè nova hac rei
Christianæ accessione mirum quàm delecta-
tus, quod petebatur, facile indulgit. Missi
propterea duo Episcopi, totidemque Cardi-
nales, quibus *Honorius* itidem Cardinalis
præesse iussus, multis, quæ ad firmandam Il-
lyrici Ecclesiam oportuna judicabantur, sta-
tutis, *Budimerium* pro recepto more Ecclesiæ
unxit, Regnum in centurias, arbitris etiam
rei hujus *Heractii* Legatis, divisit, Tribunos
præfecit, quos Bojanos primum seu formidan-
dos,

(a) *Rattkay L. 2. & Consin. mensis Chronol.*

dos, tum contractiore vocabulo Banos placuit compellare. Arctior tunc muneris hujus, ac modò, potestas, & fere septem, quibus unus Banorum præfuerat, centuriis militum definita. Id tamen jam tunc quoque iisdatum, ut cum quinis Prætoribus jus dicerent, Provinciis Magistratus decernerent, vectigalia ceteraque ad Rempublicam spectantia curarent.

Anno circiter 1200 in sublimiorem elevato gradum Banorum Magistratu, arctior eorum fuit numerus, ut non rarò universorum negotiorum moles duobus, tribusve incumberet; donec sinistris bellorum eventis immutò magnam sui partem Illyricò, munus id commodum ab uno obiri posse censeretur. At quantum detrimenti ferro illatum turcico, tantum dignitatis Banatui accessit; nam & Pro-Regis illi cum nomine potestas, & tertius, ex quo Illyricum Pannoniæ annexum, inter Optimates Ungariæ, quos Barones Regni vocamus, locus. Neque Curiâ duntaxat togæque ejus potestas clauditur; nam & militiæ ea Bani apud Illyricos populos auctoritas, ut is ducendo patrio militi Imperatoria passim potestate ab Ordinibus præficiatur. Porro Banos statuere, ut *Szentivani* S. J. vult, apud Orientis Imperatores erat; at, ubi imperante Ungaris Divo Ladislao Illyri-

lyirici Regna Pannonico adnexa fuere, eos nominandi potestas ad Reges Ungariæ transiit, atque etiamnum perseverat. Nequid verò detrimenti Respublica accipiat, si Banum negotia extra Illyricum evocent, sapienter lege veteri provisum est, ut Vice-Banus semper deligeretur, qui in dicendis iuribus, aut ducendo milite Banum aut absentem, aut morbo fortè impeditum sublevaret. At nostro hoc ævo præter Vice-Banum Locumtenentem Banalem curarum cum ipso Bano participem, aut si ipsum Regno excedere contingat, ejusdem Vicarium creare lex usúsque obtinuit. Hæc de Banis in genere dicta sufficiant, nunc ad eos, quos avara vetustas reliquos nobis fecit, describendos accingamur.



SERIES



SERIES BANORUM SUB REGIBUS CROATIÆ.

BILITUS
Banus Croatia. Annò 870.

BANOS jam anno æræ Christianæ Radosla-
641 institutos diximus: verùm us. Rex
seu scriptorum negligentia, Croat.
A. 870.
seu, quòd non tanta tum muneri huic
dignitas, factum est, ut nullam fere eo-
rum memoriam ad annum 1212 habea-
mus. Primus, quem è ruderibus eruere
licuit, *Bilitus* est (*Szentivanio Belinus*,
aliis *Belitus*) ab accepta clade Historicis
notus. Rem breviter accipe: Radoszlao
optimo Principi filius erat Szeiszlaus ob
innatam crudelitatem, & meditatam aut
omnino perfectam à Christianis sacris de-
fecti-

fectionem omnibus exosus aded, ut plurimi pestem hanc ferro tollendam iudicarent; hos inter *Bilitus* Banus tot adolescentis Principis offensus sceleribus, arma primus corripit, ulturusque Szeiszlai crimina, impium Radoszlao bellum movet. Rex, ut scintillam ipso in exordio praevocaret, convocato celeritate maxima milite, aded rem fortiter gessit, ut primis dissipatos refractarios certaminibus pacem clementiamque implorare coegerit. Restitit tamen ceteris pertinacior Banus: sed ad extremum victis & iis, qui seditioso constantiores adhæserant, fugâ se imminentibus subducturus cruciatibus, vitæ reliquum vagus erro incertum ubi transegit.

S U D O M I R

Dalmat. & Croatiae Banus. An. 912.

Gostumil
Rex Cro-
at. Annô
900.

Sudomirum Banum Dalm. & Croatiae fuisse ex *Rattkai* (b) aliisque discimus, quo verò anno eo magistratu fungi coeperit, quid memoriâ posterorum dignum egerit, frustra quæris: id unum refertur, cum decedente sinè liberis annô 912 Rege Gostumilo Regni Croatiae gubernacula adiisse. Susceperat ecquidem Gostu-

(b) *Lib. 2.*

Gostumilus filium Ivanum sive Joannem, sed is alia ab terrenis Regna, thesauros alios cogitans vivo Patre eremum bohemiam petierat, vitæ reliquum in DEI obsequio, Divique, quem nomine referebat, Joannis Baptistæ imitatione exacturus. Sanctus hic Ivanus primus in Bohemia eremi, ad quam Angelo duce perductus est, incola solitudinis locum habuit tribus Pragâ, unâ Carolsteinio Regia arce leucâ diffitum, inductis dein annò 1020 illuc Benedictinis celebrem. Plura de hoc S. Ivano scitu perjucunda si nôsse cupis, *PP. Bollandistarum* S. J. ad vigesimum quartum Junii diem acta mensis Junii Tomo 4to inspice. *Sudomirus* itaque ab obitu Gostumili Regno admotus nonnisi duos annos præfuit, quem sinè prole mascula decedentem interregnum unius, & quinquaginta annorum excepit eo ipso (si *Rattkaio* fides) tempore, quo Keanus Sclavoniam Bulgariamque gubernabat. Verùm cum Keanum annò 1004 à Divo Stephano Ungarorum Rege cæsum communis historicorum sensus doceat, ipsèque *Rattkay* Gostumilum 912 mortuum fateatur, incredibile videtur Keanum ab anno 912 ad usque 1004 id est ipsos nonaginta du-

os annos regnâsse. Malim proin cum P. *Samuele Timon* S. J. Keanum Dircislao, & Cresimiro 2do Regibus Illyrici syn-chronum statuere.

P R I B I N A

Banus Croatiae.

Cresimir.
I. Rex
Bosnae,
Dalm.
& Croat.
An. 965.

EVoluto tandem interregno, Proce-res diuturnioris moræ pertæsi Cresi-miro imo Principis Terpimiri filio, gene-ro Sudomiri Bosnæ tunc & Dalmatiæ im-peranti Regnum deferunt, sub quo *Pri-binam* Banum fuisse lego. Scribit *Rattkaius* Divum Stephanum virtutibus hu-jus Cresimiri captum, tum etiam ut Bul-garorum Sclavorumque exasperatos ob-interfectum Keanum animos placaret, ejus filiam Divo Emerico suo filio despon-disse. Sed non existimem ista Cresimiro Terpimeri filio adscribenda; utpote qui annò 994 (c) fatis cedens, tredeciman-nis prius vivere desiit, quàm Divus Emeri-cus in lucem ederetur. Cresimirus proin II. is erat, qui annò 1026 cum Filia sua Ducis quoque Sclavoniæ titulum Divo Emerico scribitur detulisse. Fugerat opi-nor, quod pronum in rerum veterum mo-numentis, *Rattkaium* tres fuisse Croatias

Cra-

(c) *Contin. Mensis Chrono.*

Cresimirus, hinc, quæ diversis accidere, uni attribuit. Addit *Orbinus* Ungaros jure matrimonii Emericum inter & Principem Croatam initi, Croatiam sibi vindicare Banosque ad Regnum administrandum mittere voluisse. Verum nobilis ea gens externi jugi dominationisque impatiens sibi de suis Rege dicto, Ungarico imperio se subtrahit.

SVETOSLAUS ET GOISLAUS.

Bani Annò 1000.

Cresimirus primus annò partæ salutis 994 vivis ereptus, Dircislaum filium habuit successorem, qui sinè liberis 1000 annò decedens Cresimiro 2do fratri suo sceptrum vel invitus reliquit. Banos tunc *Lucius* censet *Svetoslaum* & *Goislaum*. Quid verò Bani hi egerint, scire non lieuit, nuda duntaxat nomina ex Cresimiri III. dicti Petri Chyrogapho quodam protraximus.

Cresimir.
II. Rex
Dalm. &
Croat.
A. 1000.

STEPHANUS

*Banus, & Jadra pro Imp. Gracis
Gubernator. Annò 1018.*

Fuit *Stephanus* vir aded munifica in Superos pietate, ut ab hac posteris commendandus meritò videatur. Manifestum

festum id ille fecit insigni erecto, & ditato Jadrae templo, quod complurium Divorum honoribus sacrum multiplici suppellectile locupletavit. Placet hic litteras rei totius testes adferre, quas *Lucius* in archivo S. Chrysogoni repertas à se memorat; sic autem habent:

*In nomine Domini Nostri JESU Christi. Ego S. Banus fabricavi istam Ecclesiam ad honorem S. Nicolai Confessoris Christi, & S. Petri Apostoli, & S. Stephani Pont. & B. Dimitri Mart. & Magni Chrysogoni Mart. nec non & BB. Genitricis Mariae, atque omnium Sanctorum Christi, cum conjuge mea Maria fabricavi eam sub temporibus B. Constantini Monomachi. Ego denique S. Banus Imperialis Protospatarius complevi haec omnia intrante anno Domini mil. octavo * decimo Indictione * XXII. Incipiente anno X. de propria mea facultate laboravi eam, & dedi in eam XV. panno de serico, & III. paria de bracilo, & III. manipulos, III. Scolas, VI. Camiso, III. amictos, III. cingulos, unam cupam, unum cocleare, I. fistula de argento. III. Cruces, unam de argento, filacteria III. de auro, & III. de argento, unam capsam, & I. turibulum, & II. Calices de argento. III. libros*
Missa-

Missales, I. *passionario*, III. *Omelia*, *Smaragdum unum*, duo *antiphonaria*, II. *manicale*, *spalterium* III. *Imnacia* II. *Brebiarium unum*, duos *cereolata*, I. *sellam*, I. *pario de bracili*, III. *facinegia*. Dedi etiam unam *curtem*, qua cognominatur *Insula*, cum *Ecclesia S. Pet.* & cum VI. *servos*, & III. *ancillas*, & alia *Curte*, qua vocatur *nova sella*, cum *duodecima familia*, & *tertia Curte*, qua dicitur *Butinaviso*, cum *octofamilias*, dedi XX. *jumenta*, cum II. *equos*, & XXX. *Vaccas*, & CCCC. *pecora*, & XXXII. *porcos*, posui etiam III. *Campanas*, qua sunt *apretiata* I *libram de auro*. Hac omnia & cum ipsa *Ecclesia* trado in potestate D. meo *Patri spirituali Trasoni Abbati*, ut sit in perpetuum *Cella S. Chrysogoni*, cujus *sacratissima membra Jadra retinentur*. Et si quis (quod absit) ausus fuerit subtrahere ex meis, vel extraneis moriat de *Ramato*, & habeat *semen super terram*, & persolvat *auri libras XXX*. Insuper iratum habeat *Patrem*, & *Filium*, & *Spiritum Sanctum*, & *maledictionem à C.C.C.X.* & VIII. *Patres*, & in novissimo *Maranatha* cum *diabolo*, & ejus *terris Angelis*, ac *Juda Scariothe in Inferno*.

no numeretur, & hac Cartula volumus, ut in sua maneat firmitate.

Et ego Marco Judigo Episcopus Croatensis collaudo, confirmo, corroboro, atque concedo. (d)

Mendosum quidem scriptum hoc apparet, præsertim cum donationem annò 1018 factam referat, quod tempus cum annis Monomachi anno 1042 regnare incipientis omnino non congruit; adduxi tamen, quia sacram, quæ tunc in usu, suppellectilem recenset. Id ut ut sit, Banum hunc *Timon* annò 1018 *Jadram* pro Impp. Græcis gubernasse scribit, quam tamen *Otto Venetiarum Dux* cum ceteris *Dalmatiæ* civitatibus sibi reddidit vectigalem. Idem illud *S. Chrysogoni* archivum meminit *Godemiri* Bani *Jadræ* nomine Impp. Orient præfecti, cujus Soror *Eleniza* Monasterio *S. Chrysogoni* quædam annò à Christo nato 1029 dedisse perhibetur. Nec plura de hoc invenias, uti & de compluribus aliis, quorum nomina sola adduxisse hic sufficiat, idque unum cum *Salustio* queri: *Majores nostros facere, quàm dicere, sua benefacta laudari ab aliis, quàm aliorum laudare maluisse.*

Sub

(d) *Lucius Lib. 2. c. 8.*

Sub Stephano proin Cresimiri II. filio ac patris apud Venetos quondam obside atque annô 1052 fati functo Bani fuere: *Varda*, *Bozethare*, *Stephanus*, *Prasca*.

Sub Cresimiro III. dicto Petro, qui regnare annô 1052 orsus, vitam cum regno annô 1073 posuit, Banos *Lucius* memorat: *Lubomirum*, *Goyzonem* vel *Geyzam* annô 1059. *Petrum*, quem annô 1062 Dalmatiæ pro Græcis præfectum alibi lego. Item *Zvonimirum*, quem nostri *Zolomerum*, annô 1070, de quo plura infra.

Decedente annô 1073 Cresimiro III. Slavizo Regnum adiit; sed diversis Banorum factionibus perturbatum; *Zvonimirus* quippe Banus Cresimiri Petri, ut nonnulli arbitrantur, filius præceptum sibi à Slavizone Regnum dolens, turbis miscebat omnia, quò factum, ut Slavizo ab Amico Comite captus Regno simul & libertate annô 1074 privaretur. Hic ille Slavizo est, quem *Rattkains* ex fragmento quodam *Constantini Porphyrogenia* Miroslauum vocans, à *Privnio* Bano Sclavoniæ vitâ privatum narrat. Nulla tamen apud *Lucium* sublatis per vim Slavizonis mentio, discordias duntaxat

taxat quaspiam inter Regem Banúmque *Lubomirum* ortas generatim persequitur, *Petro* dein Bano præsentē Spalatensī in urbe compositas.

P A U L U S

Croatiae Banus. Annò 1076.

Zwonim.
Demetr.
Rex Dal.
Croatie.
1075.

1079

ANnus agebatur 1075, quo **Zwonimirus** diu ambitam Croatiae Dominationem consecutus, in eadem insequente mox anno missa sibi à Gregorio VII. summo Antistite per Legatos præter Vexillum, Ensem, Sceptum, Coronam in synodo fuit confirmatus. Negotium id à Gregorio Gebizoni Abbati SS. Bonifacii & Alexii datum fuit. Tanto favori ut gratum se exhiberet **Zwonimirus**, aliis **Suinimirus** etiam, ducentorum Byzantinorum tributum S. Petro in singulos annos ipsis Resurgentis Domini feriis se missurum promisit. Ad **Bulgaros** dein sibi subjugandos adjiciens animum, universis copiis *Paulum* Croatiae Banum præfecerat; sed is oblata hac opportunitate usus, incertum qua de causa ab Rege defecit, totam Croatiaem dolis partim, partim aperta vi subactam. Nec tamen

tamen hic modum posuit dominandi cupiditas; acceptis proin in societatem belli Rasciis Chelmique Comitatu domito, Rasciæ ipsi exercitum admovit. Sed nempe hic sua hominem felicitas deseruit; Stephanus quippe Cæcus Rasciæ Rex numerofo instructus milite importunum hospitem à Regni averfurus limitibus, tanta eum clade affecit, ut Zwonimirus comparatis è Dalmatia copiis *Paulum* ad pacem petendam facile compulerit. (e) Forfan hic ille *Paulus* est, quem *Baronius Vexelinum* Ducem vocans à Gregorio summo Pontifice per litteras monitum refert, ut arma adversum Demetrium sumpta poneret; nî faxit, ab communione Ecclesiæ rescindendum. Obiit Zwonimirus annô 1087, post quem in veteribus instrumentis Stephanus Rex Dalmatiæ reperitur; sed vel immaturo fato ereptus, vel pro legitimo non habitus. Mortuo verò Zwonimiro sanctum Ladislaum Regna Croatiæ, & Dalmatiæ occupâsse communis scriptorum fert opinio: de modo inter eos non convenit; jure namque belli.

Croa-

(e) *Rastkay Lib. 2.*

Croatiam aquisitam *Thomas Archi-
Diaconus* Spalatensis narrat, *Rattkains*
à Lepa S. Ladislai sorore, & Zwonimiri thori socia hæreditate eidem Di-
vo Regi vult obtrigisse. Nolim ego
in re tam veteri, & controver-
sa judicem agere.



SERI.



SERIES BANORUM

SUB
REGIBUS UNGARIÆ.

PETRUS
Dalmatiæ Banus. 1096.



Ublato, magno omnium mærore
in finibus Moraviæ, annô 1096,
Divo Ladislao, Colomanus re-
rum potiebatur. Turbavit ipsa re-
gnandi initia *Petrus* Dalmatiæ Banus,
quem ut Colomanus ad officium revo-
caret, ducto per Valeriam Ungarorum
exercitu iisque omnibus, qui Dravum
Savúmque accolunt, sibi adlectis cum
refractario *Petro* editissimo in monte
Petergazdia dicto manus conferuit, cæ-
sique *Petri* sanguine rebellionis flammæ
intra an. 1096 & 1102 restinxit. Dubitat
hic *Timon* (f) num *Petrus* in Dalmatia
an Croatia cæsus fuerit, cum *Petri* mons

Coloma-
nus Rex
1096.

B

in

(f) *Synop. part. 1.*

in Croatia quoque inveniatur. *Dandulus* quidem Dalmatiam nominat apud *Lucium*: (g) *Hoc tempore Colomanus Rex Ungaria misit exercitum in Dalmatiam, & occidi fecit Regem Petrum*: quid tamen vetat turbas in Dalmatia cientem *Petrum* exercitui Regio occurrere in Croatia pugnâmq; committere potuisse.

A N O N Y M U S

Banus. 1116.

Steph. II. **R**efert ad annum hunc *Dandulus*, ne-
 Rex 1115. scio, quem Banum ab Ordolpho
 Venetorum Duce copiis Henrici occiden-
 tis, & Alexii Orientis Impp. adjuto in
 fugam 2do Kalend. Julii actum, mul-
 tōsque Ungarorum Nobilium, qui Ja-
 dram obsidione soluturi advenerant, ca-
 ptos & debellatos. Fuso exercitu nostro
 Sibenicoque diruto, Spalatum quoque,
 & Tragurium in hostium potestatem ve-
 nit. Nec mitiorem sortem experta Ja-
 dra, quam Ungari, tot sociorum cladibus
 territi, relictam Veneto tradidēre.

B E L A

Geyza II. *Banus Dalmat. 1142 & antea.*
 Rex 1141.

Magna *Bela*, vel *Beli* Geyzæ II.
 avunculi apud scriptores (h) com-
 men-

(g) *Lib. 3. c. 3.* (h) *Bonfin. lib. 6. & alii.*

mendatio: præclaram certè illius fortitudinem militari conjunctam scientiæ pugna ad Fischam annem cum germanicis Henrici Imperatoris copiis inita orbi manifestam fecit. Imminebat formidando instructus exercitu Ungariæ Henricus, & quia Geyzam admodum adolescentem belli imperitum putabat, totam ejus ditionem facilè à se subjugandam rebatur: at Geyza periculi magnitudine admonitus, jamque Posonium dolò interceptum videns, copias & ipse contrahit, & ne cum hoste intra Regni sui limites dimicare cogeretur, prior ipse inimicæ tum Austriæ signa infert. Procebat Ungarus quadrato agmine velut si continuo sub conspectu haberet hostem; aciéque ità ordinata, ut duas velutum alas in utroque cornu productas clauderent à tergo cataphracti, in medio pariter cataphractorum agmen consistens duplici ad latera peditum ordine muniretur: post universos verò prætoriani consistèrent, ad omnem pugnae eventum comparatus ibat. Nec segnior in suis ordinandis Henricus non multò post copiam pugnandi fecit, adeoque strenuè à Germanis res agi cæpta, ut velites Ungarorum Bessi & Scytuli (fuère ii Thraciæ

Ponto vicinæ populi) seu Teutonum proceritate, quos equorum moles majores faciebat, territi, seu reipsa vim non ferentes fugam respectarent, & turbatum fuisset non parum; nisi Banus mediæ aciei Dux datus adducto veterano equite in hostem fortiter illatus dum Regiis animos addit, hostium infregisset. Animatus quippe Ducis exemplò miles, atque dum Germanus (ut *Bonfinius* refert) maledictis Ungaros proscindit, Jesu & MARIE nomina invocans eo ardore pugnam iniit, ut Germani primum nutantes in apertam denique fugam se conjicerent. Cæsa in eo campo Germanorum septem millia, quos inter Bavarorum pars maxima, tria Ungarorum desiderata. Præmium victoriæ Posonium receptum fuit, longaque pax à Germanis; Henricus namque bene mulctatus sua custodire malebat deinceps, quàm alienis inhieret. Hæc Banus in Ungaria; nam de Dalmaticis nihil occurrit; præterquam quòd Dalmatas Regiis ditaverit immunitatibus, suæque prudentiâ in Regis obsequio continuerit. Virum certè singularibus dotibus ornatum fuisse oportet, utpote qui anno 1156 ex Bano Palatinus Ungariæ factus utilissimam in administranda Repu-

Republica Regi operam impendit, quem annò salutis humanæ 1160 fatis functum Albæ Mausoleo Regum intulit, indictis-que eodem anno comitiis Stephanum III Geyzæ filium in throno collocavit. Nec diu tumultato uni, alteri inaugurato superfuit *Belus* noster, vitæ & ipse ac Regno ereptus.

A N D R E A S

Dalmat. Banus 1198.

POST Belam Banum, quem *Rattkay* Emericus
Rex.
1196. *Anonymum* vocat, in nullum se Banorum usque ad Benkonis tempora incidisse cum eodem *Rattkai Szentivani* fatetur; in Decreto tamen Andreæ Dalm. Croat. Ramæ & Culmæ Ducis, Fratris-que Emerici Regis Ungariæ, in quo Pharen- sis Episcopatus Michæ cuidam Canonico Spalatensi Nepoti Picii confertur, Banus *Andreas*, & Comes Andronicus Bani filius, Milka verò Ducis Aulæ Notarius nominatur: (i) eundemque hunc *Andream* Banum Judicem controversiarum, inter Latinos & Slavos Dalmaticarum Civitatum ab Andrea Duce annò 1200 datum existimo.

B 3

P E.

(i) *Luci. Lib. 3. Cap. 13.*

PETRUS BENKO,

Banus Sclavoniæ. 1217.

Andreas
II. Rex.
1204.

DUm Andreas II sacra, quam annō 1217 susceperat, expeditione distineretur, Ungariæ vicaria potestate præerat *Benko* Banus, *Lipsio Banchanus* (k) homo tum rerum gestarum magnitudine, tum disciplina militari nobilitatus. Habebat is uxorem formâ spectabilem fæminam, at pudicitiam, fidēque conjugali multò illustriorem: Accidit fortè ut Regina Gertrudis, filiæ Bertholdi an Bartholomæi Mæraniae, Istriæ &c. Ducis, Frater, qui sororem visum venerat, ejus amore captus, usque eò ab illicito æstu se abripi pateretur, ut non inscia imo juvante Regina integerrimam matronam corrumpere non horreret. Verum infelix adolescens abominando hoc, ac, si uspiam gentium, apud Ungaros certè execrando scelere non pudorem modò *Benkonis* Conjugi, sed & vitam Gertrudi sorori eripuit; *Benko* quippe rem omnem ubi ex uxore lacrymis diffuente didicit, amicos convocat, quidque facinoris animò conceperit, edocet, alteroque mox à commisso scelere die sub meridiem arma-

(k) *In monit. polit. titulo de Justit.*

armatus in Regiam paucos secum eòsque fidelissimos ducens, irrumpit, Gertrudemque prandentem ut reperit, non longâ morâ factâ dolore pariter, & ira stimulantibus exprobens sceleris immanitatem, novo crimine crimen vindicaturus, anxie trepidantem trucidat. Idem fatum manebat & adulterum, nisi is, incertum qua causâ, die illo aulâ abstinisset. Non potuit ita celari Reginæ cædes, quin continuò totum palatium pervagaretur; tumultuatum non nihil propterea, corruscantibusque quaquaversum gladiis mors Bano intentata, verum *Benko* reddita iis, quos metuere poterat, facti sui ratione incolumis domum suam petiit admirantibus tantam audaciam cunctis, neque severius quidquam in hominem magna apud omnes auctoritate pollentem statuere audentibus. Quia tamen insidiis se ab adulteri Gertrudisque amicis captandum præviderat, consilium init periculi, ut apparebat, plenissimum; sumpta namque famulorum manu ad Regem ipsum in Asiam proficiscitur, causam suam apud Principem Justitiæ amantissimum acturus: hunc ille in Syriam tendentem ut reperit, exposita, adventus sui causâ rem totam ex ordine

percenſet, útque Gertrudi Reginæ violentas manus intulerit, ſinè fūco enarrat. Exhorruère ad tam audax facinus comites Regii, ſolus Andreas immoto vultu perſiſtens redire *Benkonem* jubet, Regnóque, ut adhuc, præſſe, ſe, ubi Deo auſpice Ungariam reviſerit, de re tota cogniturum, tùmque aut innocentem dicturum Banum, aut, ſi injuſtè Reginam cæſam comperiſſet, meritis ſuppliciis affecturum. Rediit ſub hæc Banus cùmque eo duo Legati ab Andrea miſſi, quibus mandatum à Rege, ne quid ſe abſente acerbius in Banum ſtatueretur.

Exacto in Judæa triennio, ac reportata inſigni de Sultano Ægyptiorum victoriâ Rex in Pannoniam reverſus *Benkoni* diem dicit, cùmque diſputaretur inter Procereſ in rem utramque copioſè, ſuſpenſis in rei eventum univerſis Rex uxorem ſuam jurè cæſam videri pronuntiavit, quæ inaudito Ungaris ſcelere Regiam polluiſſet. Ità Regis ſententiâ ſervatus *Benko*, agros & bona, quæ Reginæ amici dirripuerant, recepit, uxorem & amicos recipere non potuit; dum enim Regem in Syriam ſequitur, nonnulli è Gertrudis clientela, quem in Banum effundere non poterant, in ejus domo & fami-

familia Budæ relicta furorem explevere, neci datis cum uxore filiis, sanguine junctis aut cæsis, aut fugatis; rediêre tamen postremi cognitâ Regis de *Bankone* sententiâ.

BANFFIUS BAZADUS,

Banus ante annum 1233.

B*Anffius Bazadus* incertum cujus anni aut Regni Banus, annô 1233 Institutum Divi Dominici amplexus, ac postea à Tartaris cæsus miseram hanc vitam cum felicissima anno 1240 commutavit. Institutorem Sanctus hic ordo Divum Dominicum habuit; in Ungaria verò eo primùm anno visus est, quo Divus Fundator vivere desiit nimirum 1221. Primas Colonias Jaurinum accepit ductore M. Paulo Ungaro Juris Canonici ejusdem Familiæ Professore. Quinquennio post Leopoldus Dux Austriæ eidem Ordini accitis ex Provincia Ungarica sociis nobile Viennæ cœnobium construxit. (1)

B 5

EME.

(1) *P. Timon Synop. Nov. Chronol.*
parte prima.

EMERICUS BEBEK,

Dalmat. & Croatiae Banus.

Bela IV.
Rex.
1236.

PRiùs quàm de Banis, quos sub Bela IV fuisse reperimus, quidpiam adducamus, juverit nonnulla ex *Timonio* in hanc rem attulisse; sic autem scribit: (m) *Ungaria Reges Belam IV sequentes ducem, Dalmatiam, Croatiam & Sclavoniam peculiarem, uno nomine vocabant Sclavoniam, Praefectosque omnium trium earum regionum Banos totius Sclavonia nuncupabant: quod servabatur, etiam postquam Carolus I. Croatia & Dalmatia, peculiare dedit Praefides, potiorque erat illorum, quàm horum authoritas. Sclavonia autem propriè dicta rarò admodum suos habuit Praefectos. Hac discrimina si explorata fuissent Georgio Rattkaiò, ne ille feliciùs processisset in describendis Banorum rebus. Haftenus ille. Primum sub hoc Bela Dalmatiae, & Croatiae Banum nihil de Sclavonia addens Emericum Bebek Rattkaius collocat, idque ex veteribus Regni literis sibi notum asserit; neque tamen aut literas, aut annum refert.*

AL-

(m) *In imagin. nova Ungar. c. 17.*

ALBERTINUS

Dux Sclavoniæ. 1240.

ANnô 1240 (n) ut docent literæ à nobilissima Ursina, vel Blagiana gente asservatæ, Sclavoniam titulo Ducis *Albertinus* Comes Poseganus tenuit, magnus vel ex eo, quia Stephani V. Ungarorum Regis Avunculus.

D Y O N I S I U S

Banus & Dux Sclavoniæ. 1341.

ANnus agebatur supra millesimum ducentesium primus & quadragessimus, cum Battus Scyta innumera Tartarorum multitudine Ungariam inundans, ea nostros clade affecit, ut ad Pestum dierum aliquot præliis centum & amplius milia desideraremus. Rex equo à barbaris interfecto certum vitæ periculum adierat, periturus haud dubiè, nisi Andreas Forgachius suum contempto discrimine offerens, Regem à præsentī interitu vindicasset. Elapsus cum paucis Bela in arcem Znioviensem ab eodem Forgachio in Turoczeni Comitatu exstructam venit inde cum familia sua Poloniam petiturus. Sed enim Boleslaum Prin-

(n) *P. Timon ibidem.*

Principem generum suū cum matre ejus, Grimislava, & filia sua pari calamitate oppressum in Ungariæ limitibus reperiens, hospitium, quod rogare voluerat, ipse præbuit. Mox Posonium prioribus annis à Joanne Abbate Pilisiensi securitatis Regiæ causâ munitum progreditur; sed nec hic tutus, quin à Friderico Austriæ Duce in quadam Austriæ arce captus, tribus, uti appellamus, Comitibus Austriæ adjacentibus multoque argento pariter ac auro libertatem redimere coactus fuit. Præmiserat jam antea Mariam Reginam cum filio Stephano bimulo, ossibusque D. Stephani Regis multorumque Templorum thesauris Spalatū in Dalmatiam, quo & ipse libertatem consecutus annō 1242 contendit; verū nec ibi consistere ausus, Clissam Traguriūque petens in insulis demum Dalmatiæ velut è portu barbaram illam procellam non sine horrore prospectabat. Inter superstites à clade & fugæ Regiæ comites fuit quoque Banus, & Dux totius Sclavoniæ *Dyonisius* natione, ut *Archi Diaconus Spalatensis* vult, Ungarus, cujus virtus sub initium tartarici hujus belli ad fluvium Sajó luculenter probata, Venetis quoque Jadræ tum obsiden-

dæ,

dæ, quæ ad Belam recens defecerat intentis, non parum negotii facessivit. Audita quippe illi Jadrensiū defectione Reinerum Zenonem cum majoribus sex & viginti, vicens aliis minoris molis navibus ceteroque apparatu bellico ad oppugnandam Urbem misere annò 1243. Atque usque eò jam processerant, ut perfractâ vastæ molis catenâ, quæ hostilem classē à viciniore aditu prohibebat, urbi ipsi navigia admoverent. Præerat loco *Dyonisius*, cùmque Ungaricis & Sclavonicis copiis oppugnantium vim ad decimum diem eludebat, cùm fortè sagittâ ipse ictus extra urbem à suis deferri se jubet, valetudinem curaturus. Perculit ea res Jadrensiū animos, qui Ducem mortuum arbitrati, cum sine Ungarorum præsidio satis tutos se non esse scirent, certatim, quâ quisque potest, elabuntur, Venetûsque animadversâ civium trepidatione scalas muris admovens, paucis resistere ausis, vi denique ejusdem anni 1243 2da Junii Urbe potitur. Jadrenses patriâ extorres, qui propria turpiter amiserant, multò sædius alienis inhiantes pars mare infestis navigiis percurfabant, pars ducibus Comitibus Breberiensibus adversum Spalaten-

ses

ses Tragurinis adhæserant. Crevêremutua hæ geminarum civitatum simultates, postquam Spalatini à Minoslao Bosnensi Bano adjuti facta in agrum Tragurinorum procurfione 200 cives captos abduxerunt. Redierat jam Bela in Ungariam, unde *Dyonisium* Banum cum Bartholomæo Quinque-Ecclesiensi Præsule in Illyricum proficisci, rigidamque de Spalatensibus vindictam sumere jubet. Verum rem blandis verbis tentaturus Banus, cum nihil proficeret, minas adhibere placuit, exustoque suburbio cives ad deditionem annô 1244 cogere. Uberius, hæc in Chronico Patriæ, quod nobis inspicere non licuit.

STEPHANUS

Banus Sclavoniæ. 1245.

L*adisla*o, nescio cui, Bano Sclavoniæ surrogatur *Stephanus* aliis Stepco, affine nomini Stepho, quod Slavis Stephanum notat, vir à probitate & justitia per literas 2do nonas April. Vascâ datas à Rege Traguriensibus commendatus. (o) Et magno certè Illyrici bono à Rege datus videtur; namque mutuis offensionibus Spalatenses inter, & Tragurienses, Sibe-

(o) *Luc. Lib. 4. c. 9.*

Sibenicensēs, Jadrenses, & Arbensēs sopitis, commercia quoque, quorum usus interciderat, terrā marique revocavit, & littus continentis, desertum nova civitate condita excoluit, Arbensibus primis in eam coloniam deductis: ob eam rem ne quid à Venetis turbaretur, eas leges novis civibus rogavit, quæ nec Reipublicæ Venetæ damni quidpiam accerferent, nec Ungariæ emolumentis incommodarent. (p) Condidit verò civitatem hanc ad radicem montis Jablanich eadem libertate, qua Tragurium Sibenicum ceteræque maritimæ Croatiæ civitates, fruituram: Civitati arcem in monte adjecit, Rege Bela, cujus honori struebatur, dignissimam. Compositis, uti meminimus, occidentali in parte diffidiis redditæque inter Dalmatas & Croatas navigatione, in eam quoque Croatiæ partem, quæ orientem respicit, curas suas felici eventu transtulit; nam & Comites Caciclios Almisii Dominos injustè ablata Traguriensibus restituere compulit, & 1256. Jadrenses duobus post annis pacem cum Aconitanis colere præcepit. Ità providentiâ illius res terrâ marique pacatæ. Verum à morte *Stephani* in priora illico diffi-

(p) *Ibidem.*

diffidia itum, ut pateret ab uno hoc viro universi Regni pacem profluxisse. Huic *Stephano* ceterisque Fratribus de gente Subich Comitatum Breberiensem jam antea ob præstita adversum Tartaros ceterosque hostes auxilia donatum idem *Bela* annò imperii sui sexto & decimo confirmavit neque tamen satis à se tam illustri viro factum existimans, nisi ad reliquas dignitates Ducatûs quoque Styriæ, quam *Ottocar*, adjuvante plurimum nostro *Stephano*, eripuerat, Præfecturam annò 1254 adjecisset, qui titulo Capitanei eam gubernans dedit *Græcio* Styrorum urbe ad Regem litteras (q) luculentas testes non *Petovium* duntaxat, sed *Græcium* etiam *Belæ* potestati paruisse.

COMES BUTTECO

Maritimus Banus. 1259.

FUÏSÈ ex variis literalibus instrumentis pertractat *Lucius* (r) *Almienti*um pyriticam, qui inita cum *Polizzanis* sive *Cacicliis* montem *Massarum* accolentibus societate, excusò Regiò imperiò omnem *adriatici* maris oram infestis navigiis percurfabant. Rex pacis bonique publici studiosus variis eos artibus ad

(q) *P. Timon in Nov. Ung. c. 17. (r) L. 4. c. 9.*

ad officium revocare moliebatur; sed cum ludi se videret, aperta tandem vi statuit impetendos. Induunt proin arma vicinæ civitates, Comésque *Butteco* cum Vuidone Comite Vegliensi, & civitate Spalatina foedus iniens, se non nisi obtenta maris quiete ab armis discessurum jure-jurando spondit.

IVACHINUS

Sclavoniæ Banus. 1271.

I*vachinum* vel *Joachinum* de genere

Subich comitem Breberiensem & Spalatensem annô 1271 Banum Sclavoniæ fuisse testatur *Lucius* in Genealogia familiæ Subich. Meminit quoque ejusdem Ladislaus V. in epistola ad Tragurienfes data, in qua præter cetera mandat civibus, ut in sua Banique *Joachini* fide constantes perseverent. *Stanoyus* verò, qui cum Almisiensibus pyriticam rursum exercentibus Henricum Episcopum Cephaloniæ spoliaverat, etsi in quodam manuscripto Banus *Stanoy* vocetur, nulli regioni præfuit, sed à pyratis duntaxat in Ducem electus 1273; quo eodem anno in diplomate Ladislai Regis Cuni vocitati, Laurentio Comiti Soproniensi pagum quemdam annô Re-

Steph.
V. Rex.
1270.
Ladisl.
IV. Rex.
1272.

C

gni

Matth.
Banus
Sclavon.
1273.

gni sui primò, Christi 1273 donantis, inter
Proceres nominatur & Banus Sclavoniæ
Matthæus.

PAULUS SUBICH

*Com. Spal. Banus Maritimus. Hor-
vat. Dalm. & Dominus Bosnæ 1275.*

Nicolaus verò ejus Frater
Dalmatiæ & reliquæ Croat. Ban. 1275,

COMITI Stephano seu Stepconi ejus-
que Fratribus Comitatum Breberi-
ensem, à quo & nomen traxêre, à Bela
datum suprâ commemoravi; sed posteri-
Stephani, inter quos *Paulus & Nicolaus*
fratres Bani, divitiis pollentes, ac pro-
pterea superbiâ elati, dum res in Un-
garia turbantur, ipsi quoque nimia domi-
nandi libidine se maritimis civitatibus
graves faciebant. *Paulus* certè, Bosnæ
quoque Domini titulum postea conse-
cutus, nihil infra Regem agebat. Almi-
sianorum quoque pyratice annò 1285 re-
novata Breberienfes Comites non fauto-
res modò habuit, sed prædæ etiam teste
Lucio participes. Navalibus latrociniis
terrestria adjungere placuit Spalatinis-
que bellum indicere, quos ut certioribus
cladibus *Paulus* afficeret, Tragurienses

ar-

arma sumere, atque à suis esse partibus
 coëgit. Et verò suspecta jam Venetis
 ipsis esse coeperat Breberiensium potentia:
 unde fœdus cum *Paulo* Bano ejusque fra- 1287.
 tribus sanciunt, Almisianos hac ratione
 à Comitum Breberiensium protectione
 erepturi: quieti maris ut consulant, an
 ut latius in Dalmatia dominantur. La-
 dislaus quippe Rex insanis indulgens
 amoribus oram adriaticam negligebat; 1290.
 quo in pugna Kőröszegiensi à Cumanis
 interfecto, Pontifex rejectò *Andreas* III. Rex.
Carolus Martellum Mariæ Ladislai So- 1290.
 roris filium adnitente *Carolo* ejus Patre,
 per Legatum suum ritu solemnè in Re-
 gem Ungariæ, reclamantibus Pannoniis
 Proceribus, Neapolè inauguravit. Agno-
 vère Regem *Carolus* Banus & 1294.
 Comes *Mladinus* frater, cùmque iis
 Dalmatiæ civitates. Desciscente ab *And-*
reæ fide *Paulo*, continuò ab eodem Re-
 ge in Ungaria Banus alius subrogatur.
Eustachius forsan is fuit, quem *Rattkai* *Eustach.*
 ad annum 1299 in numero Banorum *Sclavon.*
Sclavoniæ reponit. Eodem annò, quo *Banus.*
Paulum à fide Regia discessisse diximus, 1299.
Nicolaus Frangipan quondam Banus &
 Comes Breberiensis Nazarethana sacrâ
 Æde in Picenum migrante, ut luctum

populi ex tanti thesauri amissione utcunque solaretur, nobile in monte Tersa-
 etenſi Magnæ Dominæ Templum condi-
 dit. Sed ad *Paulum* redeamus. Mor-
 tuô sub annum 1295 Carolo Martello
 spes erat Dalmatiam ad Andreæ fidem
 redituram; verum hic de quo agimus

Joan. &
 Henricus
 Bani Cr.

1300.

Paulus, *Joannes* item & *Henricus* Croa-
 tiæ, si *Bonfinio* fides, Bani, Henricique Co-
 mitis Ginfienſis filii novum à Bonifacio
 VIII Pontifice Regem poſtulant. Caro-
 lus is Robertus ſeu Carobertus erat ne-
 pos Caroli II Siciliæ Regis, filius Caroli
 Martelli, qui à Comite Georgio *Pauli*
 Bani filio Spalatum primò Auguſto men-
 ſe, mox ab ipſo *Paulo* Zagrabiam dedu-
 ctus Magiſtri Hugrini (hoc enim titulo
 viri illuſtres in Ungaria afficiebantur)
 curæ comittitur, inde Ungariam petitu-
 rus, cujus adventu cognito Andreas Rex
 Budæ in morbum incidit, nec multò poſt
 deceſſit, conſuetâ ibidem magni-
 ficentiâ terræ mandatus. Ungari Pro-
 ceres præſentiâ Caroli nihil territi Wen-
 ceslaum Bohemiæ Regem ſibi præficiunt,
 huicque annò 1304 Ottonem Baviariæ
 Ducem ſubſtituunt, quo demum turba-
 rum pertæſo, atque annò 1309 in Bava-
 riam revertente, Carolus I. tot annos fru-
 ſtra

Carol. I.
 1310.

stra expetito solio admovetur. Ad primum confirmati ab Ungaris Caroli nuncium Jadrenses ab Venetis deficientes se *Paulo* Bano tradidēre: iniit ea re *Paulus* apud Regem gratiam singularem, qui illi non modò Banatūs dignitatem, sed vetera etiam Belæ Regis privilegia confirmavit. Nec ingratum se *Paulus* exhibuit recuperatâ subque imperium Regis adductâ Bosniâ, quam Stephanus Regulus Rasciæ annò 1291, turbis Ungaricis in suam rem usus, eripuerat; At *Paulus* Seniò confectus, ut vel post mortem viveret, quaternos filios reliquit, interque eos Mladinum gemini Banatūs, Bosnæ scilicet & Croatiae hæredem. (s) 1312.

MLADINUS

Banus Croatiae. 1312.

VENETI Jadram recuperaturi accito in belli societatem Dalmasio Cathalonienſi quindecim adveſti navibus ad Nonam Urbem, aliis Ura dictam, egressu facto terrestri itinere Jadram petunt. Accurrit cum Sclavonicis Theutonicisque copiis *Mladinus* obsessæ Urbi futurus auxilio; sed cum ferro parum se proficere ad- 1313.

C 3

(s) *P. Timon in Synop. Nov. Chron.*
part. 2.

adverteret, aurò rem tentare placuit, traductoque in suas partes Dalmasio hostium vires imminuere. Nec secus, ac speravit, evenit; Dalmasius enim duobus aureorum florenorum millibus allectus, explicatis signis, velut si in hostem iret, aspectante Veneto Jadram ingressus, *Mladinum* lätititiâ, hostes inopino stupore affecit. Nîl ultrâ tentaturi erant Veneti; sed metuens *Mladinus* ne potestas sua à Rege recentibus in Ungaria relatis victoriis formidando imminueretur, insigni levitate Jadram Venetis reddidit, pacëque inita, ut Jadrenses jure suo agerent, Venetorumque non subditi, verum socii essent, facile impetravit. In Venetorum amicitiam receptus adeò omnia ex libidine agebat, ut crudelitate illius, quam recenset *Michas Madius* (t) ejus temporis scriptor, offensi Tragurienfes & Sibenicenses primi Duce Paulo ejusdem Mladini fratre 16 Januarii adversum

1322. Tyrannum arma sumpserint. *Mladinus* ut vicem redderet, agrum Sibenicensem ingressus ferro ignëque vastat omnia, ipsique civitati exercitum admover. At videns aperta vi nîl se proficere ad dolos conversus data fide publica Saracen-

num

(t) cap. 17.

num Michaëlem, cum filiis Eliæ Radonaverii evocatos, velut si de pace acturus cum iis esset, homo in Superos hominésque injurius crudelissimè mactari præcipit. Edocti alieno malo ceteri Dalmatiæ & Croatiæ Proceres unà in Tyrannum conjurant, Ducéque *Joanne Babonich*, qui motò Magistratu *Mladinò* Banus dictus erat, campestri cæsum prælio Blischam usque fugere, receptò eodem impetu Almisò & Scardonâ coëgerunt. Perlatæ erant eadem ad Regem Carolum querimoniæ, qui in Illyricum veniens, accersitum *Mladinum* vinculis primùm coërcet Tininii, tum secum in Ungariam abducit. *Rattkaius* Zagrabia de-tentum, ac demum incertis sedibus errantem ad preces Divi Augustini Zagr. Episc. à Traguriensibus hospitiò donatum scribit, sceleratamque vitam meliore exitu 1340 terminasse commemorat, Ejus Epitaphium videre potes apud eundem *Ratk.* L.3. Fastum verò hominis vel titulus, quo utebatur, manifestat; hic autem erat: *Mladinus Croatorum Banus, Comes Jadera, Princeps Dalmatiæ, & secundus Bosnensis Banus.*

Ioannes
Babonic.
Banus
Croat.



NICOLAUS

Banus Sclavoniae 1323.

Joanni Babonich, qui cum ceteris Croatis Proceribus Mladinum prælio fuderat, cum dicto Regis audiens non esset, suffectus est in Illyrici Præfectura *Nicolaus*, quem *Madius* (u) Ungariæ Duce[m] ac Banum Mag. Dalm. & Croat. vocat, reipsa autem fuit Comes Vesprimiensis. Hic magno Ungarorum Cumanorumque stipatus exercitu *Joannem Babonichium* transitum impedire conantem fudit, captisque 400 equis in campo Carna consedit. Convocat huc Dalmatiæ, Croatiaque cives Spalatumque ingressus magno honore à Clero & Nobilitate postquam exceptus fuisset, compositis utcunque rebus inter in Ungariam suscepit. Verum vix illè abierat, continuò Dalmatæ & Croatæ conspiratione in Regem Banumque inita Venetis se tradidère. Illud te hic monitum volo Lector benevole, non ignorare me ex *Sigismundi Ferrarii* sententia *Mladino Demetrium* Familiæ Chakianæ auctorem Sanctique Mauricii Ord. Præd. Patrem successisse; verum cum neque annum

(u) *cap. 22.*

num neque Regem nominet *Ferrarius*, quin ne quidem, cujus Regni Banus fuerit, significet, erroneum id videtur; cùm ex *Lucio* constet *Mladini* locum *Joannem Babonich* occupâsse. Cautum prætereà veteri apud Croatos lege fuerat, ne is Banali dignitate honestaretur, qui in Illyrico nullas facultates & bona haberet; *Demetrium* verò Transylvanum nihil tum possedisse in Croatia, facile creditu esse *Rattkaius* contendit.

MICHAEL BARO

De Mihács Sclavon. Ban. 1326.

DEcedente Provinciâ Nicolao, cùm rursus turbaretur in Illyrico, Carolus Rex *Michaëlem Mihács* non sine milite ablegat. Is maritimas civitates aperto Marte agredi non ausus, occupatis castellis filiorum Babonich cum *Friderico* Comite Vegliensi cujusdam Provinciæ Bano, & Stephano Bosnensi Comite sedatè per Dalmatiam iter facit, Jadràmque ingreditur. Verùm desperatis fere rebus in Ungariam uti Nicolaus revertit. Decennio post, annò nimirum 1336 *Lucius* (x) Banum Dalmat. *Paulus Subich* collocat, Pauli illius, de quo superius actum,

Paulus
Subich.
Dal. Ban.
1336.

C 5

fili-

(x) in *Tab. Genea. Comit. Subich.*

filium, Mladini fratrem; neque *Timon* negat eum præfuisse Dalmatis, num tamen à Rege eam dignitatem acceperit, in dubium revocare videtur.

NICOLAUS DE SZECH,

Sclavon. totius Banus. 1344.

Ludov. I.
Rex. 1342

N*icolai* militarem fortitudinem annus præter ceteros 1344 Cracoviensi in campo manifestam fecit; Joannem enim Bohemorum Regem Casimiro Polono Sceptrum eripere molientem socium habens Petrum Poharnikium felici adedò eventu fudit, ut Cracovia universaque Polonia ab permolesto hospite liberatam se prius fere sentiret, quàm videret. Delectatus hac viri fortitudine Rex Ludovicus, eundem in Apuliam misit, ubi Joannam, Andreæ per vim sublatis viduam, totòque Regno tumultuantem, jam Judex Curiaë factus compesceret. Tertio evocatus in arenam Sclavoniaëque Bani titulo insignitus, Venetos compulit in limites, & nutantem populi in Ludovicum fidem quàm muneribus, quàm armis reddidit firmiorem. Quas enim à Comite Neliptio, & Gregorio Cyriakii, an Luriaci, filio turbas in Croatia excitas variis negotiis impeditus Ludovicus sedare

dare annô 1343 non poterat, easdem Du-
 ce *Nicolao* magnam partem anno sequen-
 te sustulit. Missus is mense Septembri
 in Illyricum quatuor galeatorum millia,
 mortuô jam Neliptiô, Tininio admovit,
 viduamque Neliptii paucis in diebus cer-
 tas deditionis conditiones offerre coëgit;
 quæ cum Regi non placerent, ipsaque
 adhæc mulier à Regulis Croatiæ dediti-
 onem facere vetaretur, arcem quidem
 tradere distulit, sed tandem, aucto vi-
 ginti galeatorum millibus Regio exerci-
 tu, ad Ludovici fidem cum majore Cro-
 atix parte rediit. Breberienſes tamen
 Comites Venetorum ſiſi potentiâ neque
 ſe tradidêre Regi, neque moleſtiæ quid-
 piam ab eo accepêre; propterea quòd
 Rex claſſe deſtitutus conatus ſuos in ob-
 ſidenda Ofztrovicza, Scardona & Cliffia
 irritos fore non vanè conjectaret. *Ratt-*
kains univerſam Dalmatiam bello hoc à
 Ludovico ſubaſtam memorat; ſed poſte-
 riùs id, annô nimirum 1357, factum ex
Lucio Timonióque didicimus. Verum
Nicolaus ſub annum 1380 revocatus in
 Curiam, ſatis demum, ut eleganter pro ſuo
 genio ſcriptor Tyrnavienſis Judicum Cu-
 riæ; *gloria vixit, ſed non ſatis Regno*
cum Caſare. Ingemuit cum Rege Polonia

ma-

*magni viri manibus, meritóque inter
grandes Heroum confedit, qui ad meri-
diem usque fortitudinis adolevit.*

MATTHÆUS MAROTTA,

Sclavoniæ Banus. 1350.

1369.

M*Atthaum* hunc Banum fuisse ad an-
num 1350, verum incertum cujus
Regni, ex vetustioribus monumentis di-
dicisse se ait *Rattkaius*; Sclavoniæ tamen
præfuisse ex eo suspicatur, quòd cum
Nicolao Zagrabienfi Antistite & Ludovi-
ci Vice-Cancellario ei prælio interfuerit,
quo Stratimirus Bulgariæ Rex, sub au-
spiciis Ludovici Regis victus cum Bu-
dino (ungaricè Bodon) Metropoli in
nostrorum potestatem venit. Stratimi-
rus hic in Nicolai Episcopi castello Gno-
mek nuncupato, & tertio à Casma sito
lapide custodiæ mandatus, cum fidem
obsequiúmque perpetuum Ludovico
sponderet, magnificis excultus muneribus
cum libertate Regnum quoque re-
cuperavit.

STEPHANUS

Banus totius Sclav. & Croat. 1351.

S*téphanus* in clausula diplomatis ad
annum hunc editi in numero Bano-
rum

rum positus, Frater Ludovici Regis fuit, annô dein 1355 Ducis titulo universæ Sclavoniæ moderator datus. Non diu tamen eo honore fructus insequenti mox annô fatis cessit (γ) relicto filio Joanne in prima pueritia extincto. Conjugem habuit Margaritham, quæ à morte mariti cum dominatu titulum Ducis in Sclavonia æque ac Croátia retinuit. Stephano verò iusta funebria persolvit Ludovicus Rex Zagrabia. Vide *Annales Paulini Ord.* pag. 134. Edit. Vien. anni 1663.

JOANNES ZUUS

Croatia & Dalmat. Banus. 1357.

Ludovicus recuperandæ à Venetis Dalmatiæ intentus, cum id missis ultrò citròque nunciis impetrare non posset, annô tandem 1357 *Joannem Zuus* cum numerofo milite Illyricum ingredi atque terrorem undequaque circumferre jubet. Primi Spalatenfes consternati, captis stipendiariis Venetis, acceptas à Potestate (magistratûs id nomen est) claves Bano svâ Jalii tradidêre, hósque Tragurienses secuti, quamvis sui à Venetis admoneretur officii, constantes nihilominus in fide Regis utrique perman-

(γ) *P. Timon Nova Ungar. c. 17.*

manferunt. Sibenicum quoque maluit benevolentiam Bani, quàm arma experiri. Jadra verò pertinacior restitit non nihil, sed quæ operâ Abbatis S. Michaëlis de Jadra dicti in Regis deniq; potestatem venit. Obsidebat hanc *Joannes* Banus, noctèque concubia Conradum Eldebordum natione Theutonem cum expedita manu urbis mænia subire jusserat, illi à Michaële Abbate scalis in urbem admissi, dum obvios passim sternunt, fugientibus in arcem (quæ dein adveniente ipso Ludovico capta fuit) præsidiariis, urbe potiuntur; pugnatum tamen inter tenebras fuit, inque eo tumultu Conradus Eldebordus amissus. Captâ Jadrâ pax denique icta eodem 1357 annô cum Venetis ea lege, ut ii deinceps titulô Ducis Dalmatiæ abstinèrent.

P E T R U S

Croatia & Dalmat. Banus. 1361.

Petri Bani meminit *Bonfinius* (2) & licèt, quas Provincias Pro-Regis nomine moderatus sit, non memoret, placeat tamen conjectare cum *Rattkai* eum Dalmatiæ Croatiaque præfuisse. Utilem is annô 1361 Urbano hujus nominis

(2) *Dec. 2da. Lib. x.*

nis quinto summo Pontifici navavit operam, dum ei suppetias cum validissimo equitatu Ludovici jussu ferens, Bononiam, quam summo Præsuli refractarii Optimates Mediolanenses Barnabo & Galeacius tenebant, obsidione cinxit, captamque Ægidio Cardinali nuper in Italiam reverso tradidit. Scribit præterea *Rattkaius* eum cum Emerico Bebeko emerita jam & gravi ætate viro Rasciam gubernandam, atque adversus fœdifragos Lithuanos defendendam suscepisse. (a) Verum non Rascia illa fuit, quàm Lithuani impetebant, sed Roxia; ac præterea nulla apud *Bonfinium* Petri in Lithuanica expeditione mentio, ut adeò veniam me meriturum confidam, si ab sententia *Rattkaii* discessero; nisi forsàn *Petrus* hic, de quo agimus, Zudar dictus fuerit Georgii frater, de quo loco citato ità *Bonfinius*: *Neque in administratione Provincia Pontificibus pepercit* (Ludovicus) *quippe qui ad gubernandos Roxanos, quos Ruthenos nunc appellant, Emericum Agriensem, Episc. item Georgium Zudarum cum fratribus: deinde Emericum Bebechum, & Joannem Zapoleum cum imperio misit.* Fuit verò Petrus

(a) P. Timon in Syn. Nov. Chron. part. 2.

1361. trus Zudar, Georgii frater, postea Sclavoniæ Banus, de quo infra ad annum 1382. Illud indubitatum, *Petrum* Banum cum Ladislao Apuliæ Duce Moraviam ingressum, postquam omnem latè regionem cædibus & incendiis jussu Ludovici complevisset, non exiguâ captivorum turbâ secum abductâ triumphabundum in Pannonias rediisse. Quamdiu Bani nomine Croatiæ, Dalmatiæque præfuerit, scire non licuit; neque illud compertum, num ei Comes *Anz* successerit, quem Sclavoniæ Banum annò 1363 Segniæ obiisse lego.

Comes
Anz.
Sclavon.
Banus.

A N O N Y M U S

Banus maritimæ Croatiæ. 1364.

1378. **A**lmisiani sub hæc tempora pyratiscam renovantes, cum protectoribus destituerentur, facile à Bano domiti quietam ab latrociniis oram adriaticam reliquere, tenuitque ea maris tranquillitas, dum bellum Venetos inter & Ligures exarsisset. (b) Forsitan idem iste *Anonymus* Banus fuerat, qui maritimis civitatibus à Veneto infestatis jussu Regis supplementa militum subministrans prohibere non potuit, quin Sibenicum hosti

(b) *Luc. Lib. 5. cap. 1.*

hosti se dederet ; cujus sinistrâ fortunâ Tragurienses perculsi ad Banum illico certos è civibus ablegant, auxilia petituros. Accurrit ille eò celerius, quòd Sibenici expugnationem suæ negligentia attribui intelligeret, extemplòque initò cum Liguribus classariis consiliò, dum isti in apparandis navigiis strenuè insudant, Banus Croatos circumvicinos, qui nunc Vlahi dicuntur, ad operas serviles cogens, adjuvantibus etiam Traguriensibus portum adversus hostilem vim munire aggreditur. Est autem Tragurinus portus propter objectam insulam satis navium capax, & à ventis tutus; sed occupatâ ab hoste insulâ omnino inutilis. Huic incommodo ut mederetur *Anonymus*, orientale ostium acervis lapidum scitè sub aqua dispositis ità replevit, ut triremes ea parte ab accessu arceret : occidentali verò parte, ubi ostium latius, tria ab hostibus nuper capta navigia faxis onusta demergi, reliquum autem spatii arboribus antennisque navium colligatis, sudibus item defixis muniri præcepit. Una insula sollicitum tenebat Banum, quæ ne in hostium facilè potestatem veniret, incumbentem ei collem *Balan* arduum sanè ascensúque perquam difficilem ea celeri-

D

rate

tate extructis opportunis in locis machinis firmavit, ut Pisānus classis venetæ Ductor cognitō nostrorum consiliō advolans, licet vim varia parte intentaret, repressus tamen, ubique conatus suos irritos sentiret; hinc enim à Liguribus impetitus, inde ab Vlahis copiosum lapidum imbrem è fundis depluentibus pene obrutus à suscepta oppugnatione destitit, Venetiāsque festis Natalis Domini ad hibernacula discessit. Opportunus ejus abitus nostris fuit; namque Banus eo tempore reliquum, quod adhuc ad munendam urbem desiderabatur, perfecit, faucesque portūs validioribus structuris coarctans, reliquum catenā validā pro illorum temporum more clausit, utque nihil ad rei summam deesset, eam partem, quæ meridiem respicit, præcipitatis vicino è colle rupibus reddidit inaccessam. Hæc ubi Pisano relata sunt, strenuum quantumvis Ducem ab obsidendo Tragurio deterruere.

CAROLUS DYRRACHIUS

Dalmatie, & Croatiae Banus. 1369.

DUm hæc inter Venetos & Tragurienses aguntur, *Carolus* à pace dictus Ludovici Dyrrachii filius, qui annō

1369

1369 cum Margaritha Caroli Ducis Dyr-
 rachii filia Banatum quoque Dalmat. &
 Croat. acceperat, atque dein Neapolim 1374.
 cum uxore remigraverat, ejusdem seculi
 annò septuagesimò octavò Neapoli re-
 vocatus à Rege bello Veneto præficitur
 Imperator; suspicatus quippe Ludovi-
 cus Venetos sibi in successionem Regni
 Neapolitani imp. dimento futuros, obi-
 cem hunc ferrò voluit amoliri. Missus
 itaque cum decem Ungarorum millibus
Carolus ad Tarvisium confedit ultimo die
 Augusti anni 1379, tantúmque Reipubli-
 cæ metum adtulit, ut Patres missis Le-
 gatis pacem respectarent. Adventantes
 Oratores, benignè quidem excepit **Caro-
 lus**, in Ungariam tamen ad Regem rele-
 gavit, ubi teste *Mauroceno* his annò 1380
 conditionibus pax pertractata: 1mò: *Ut
 in platea S. Marci solemnioribus diebus
 festis vexillum Regis Ungaria erigeretur.*
 2dò: *Ut electio Ducis à Rege confirmare-*
tur. 3tìd: *Solverent tributum annuum*
50 mill. Ducat. 4tò: *Pro expensis 500*
mill. ducati solverentur statis tempori-
bus. At pacis hic tractatus in fumum
 evanuit; Tarvisium enim indulgente
Carolo annonâ provisum superbius resi-
 stebat, ipsèque **Carolus** eodem anno in

Italiam cum exercitu transiens Venetos
 metu omni absolvit. Cur verò bellum
 mutaverit *Carolus*, nota passim eruditis
 causa; Joanna quippe cæsi per vim An-
 dreæ Regis Neapolitani conjux cum schif-
 maticis quibusdam Cardinalibus Cle-
 mentis dicti VII Antipapæ quondam Epi-
 scopi Cameraczensis electionem fovens
 postquam ab Urbano VI Pontifice ana-
 themate percussa fuisset, Ludovicus Un-
 gariæ Rex ad capeffendum sceptrum Nea-
 politanum evocabatur; sed is senio jam
 & morbo, qui ei postremus erat, pene
 confectus, hunc, de quo agimus, *Caro-
 lum* sui locò in Italiam cum exercitu de-
 stinavit; antè tamen quàm eum à se di-
 mitteret, præsciùs forsàn tumultuum, Sa-
 cramentò abiturum obstrinxit, de non
 captandis Ungariæ & Poloniæ Regnis.
 Ingressus ille Apuliam Ottonem Joannæ
 maritum, nec multò pòst Joannam ipsam
 carceri mancipat, in quo, quocunque
 tandem mortis genere, extincta infelix
 Regina vivendi & peccandi finem fecit.
 Exortum subinde inter Ludovicum An-
 degavensem & *Carolum* bellum ea de cau-
 sa fuit; sed non destitit Ludovicus vali-
 dis suppetiis sanguine junctum Princi-
 pem

1332.

pem adjuvare. Verùm de hoc *Carolo* plura in sequentibus Banis.

HENRICUS

Seu Emericus Bubek

Dalmat. & Croat. Banus. 1380.

REdeunte, uti meminimus, in Ungariam Nicolao Séchio, successit Jadræ in ejus locum *Bubekus* fidelitate in Patriam, artèque militari Heros clarissimus. Superfunt literæ Elisabethæ Reginae Ungariæ, quæ ægriente Ludovico publica negotia procurâsse videtur, datæ ad Dalmatiæ Civitates, in quibus ferendis Carolo Dyrrachio adversum Andegavensem auxiliis *Bubekum* statuit Imperatorem. Mos gestus Reginae Regique fuit, exeuntèque Augusto anni 1382 conscensa majore navi bellica Barolium apulit, quò priùs equos cum milite & armis expediverat. Ceterum *Henricus* noster quatuor Regibus subditus sic omnium approbatione vixit, ut sago togæque clarissimus haberetur. *Mariæ Reginae 1382* Reginae etiam in calamitatibus adedò constans adhæsit, ut Dalmatas & Croatos sub lege habens eos in Reginae fide & amore aut conservaverit, aut reduxerit. Traductus dein è Dalmatia in Ungariam ut

amplum Judicis Curiæ munus obiret, rursus redire cogitur, autore Joanne Sclavoniæ Præfecto motos tumultus sedaturus, & fecit imperata strenuè, quosque adhuc ad officium Mariæ obedientiamque, eloquentiâ non potuit, ultroci ferro revocavit.

Nicolaus Fuere præterea sub Ludovico Bani *Nicolaus Gara* (c) postea Palatinus vir miræ virtutis ac singularis in re militari disciplinæ. Annò ad hæc 1381 Banum Sclavoniæ *Rattkai* teste accepimus *Joannem de Machov*.

PETRUS ZUDAR

Sclavoniæ Banus. 1382,

1382. **D**Ecedente è vivis Ludovico Tyrnav. 12 Septembris eo civium luctu, ut cum Ungari triennium totum pullam induti vestem, interdicta etiam musica omni choreisque lugerent, Elisabeth vidua Octobri mense Joannem Bissenum Comitem Vesprimiensem Nitriâ in Dalmatiam iter suscipere, nutantesque Illyricorum animos confirmare præcipit: effecitque ille, ut Breberienfes Corbaviæque Comites hortatu Jadrensiû in fide permanerent, ipsique Jadrenses duos ad Eli-

(c) *Rattkai Lib. 3.*

Elisabetham & Mariam Legatos cum Archi-Episcopo suo mitterent. Datæ tum quoque ab iisdem Reginis ad Proceres Illyrici literæ, inter quos *Petrus Zudar*, nescio an alius ab illo, quem ad annum 1361 descripsimus, tantis excultus donis, ut fortunam sibi tributariam fecisse videatur. Et sanè debebatur illa eximiæ ejus militari præter reliqua scientiæ & fortitudini, quam magno suo malo, & refractarios Dalmatas, & inhiantes Ludovici ditionibus Venetos expertos scimus. Sub Maria Sclavoniæ præpositus, eam in fæminæ obsequio continuit, meritis propterea, ut Judicum Curia syllabo adscriberetur, dignissimus hoc munere, nisi ferrû, quod Ludovici inimicorum tinxerat sanguine, Ludovici agnatorum cruore maculâset. Deterisit tamen notam utcunque, dum Abbatiam Ladensem ad Onodinum cum fratre Georgio pietatis æmulo in monumentum condidit posterorum. (a)

JOANNES HERICHORTH

vel Horvath, & alii

Dalmat. Croat. & Slav. Bani. 1382.

PAcatè satis in annum secundum relictis à Patre Regnis jura dictabat

D 4

Ma-

(d) *Judices Curia pag. 38.*

Maria: cū ecce Paulus Zagrabienſis Antistes, Stephanus Laczkovich, vel Laczkfy Vajvoda Transylvaniæ (*Rattkaius* Banſium vocat) ejusque frater Andreas, Stephanus item Simontornya, *Joannes Horvath* Banus & frater Bani Joannes Crucigerorum Auranſium Prior ſæmineum exoſi imperium, nimiāque Nicolai Gara Palatini offeſſi potentiā, conſpiratione inita in Carolum Dyrrachium reſpicere inceptabant. Nondum tamen flamma in apertum eruperat; quin

1383. Reginæ auxilia Carolo Dyrrachio in Apuliam deducenda Joanni Hervojæ pariter refractario & nepoti Joannis Auranæ Prioris crediderant, eodēque anno

Stephan.
Laczkov
Ban. Cr.

Stephanum Laczkovichium de Lindva novum Banum nominārant; quem Jadram primā Auguſti ingreſſum, mox ipſa Eliſabeth 24 Octobris cum Maria & Hedviga filiabus ſecuta, caſtrum Auranæ, quod Joannis de Palisna olim Prioris Auranæ juſſu imperium detrectabat, recepit. Et quia *Stephanus* quoque *Laczkovichius* in Joannis Palisnæ refractarii partes diſceſſerat, locō motus eſt, eique

Comes
Thép'i-
nus Cro.
Banus.
1384.

Comes Thomas (*Themplinus*) de *S. Genorgio* ſuffectus, qui 15 Maji Jadram veniens Præfecturam Illyrici capeſſivit.

Dete-

Detecta sub idem tempus & eorum conjuratio fuit, qui ad aditum Carolo parandum conjuraverant, rei que meritis suppliciis accepti; nec immunis ab eo scelere erat *Stephanus*, qui odio Reginarum doloréque amissi Magistratûs furens, Caroli partes firmare omni contentione satagebat.

Adscitis itaque in consilii sui societatem compluribus Croatis Nobilibus ad Carolum dat literas, eumque de Procerum non Croatorum modò sed Ungarorum etiam conspiratione certiore facit. Carolus tamen ad Jadram, quam Ungarico Reginarum præsidio teneri noverat, appellere non ausus, Segniam venit, ibique moras trahenti postquam parata esse omnia à conjuratis nunciatum fuisset, continuatis itineribus Budam advolvit. Inopinatus tam invisî hospitis adventus non mediocriter attonitas Reginas tenuit; sed cum vi resisti non posse viderent, simulatâ amicitia Regnum & ipsæ deferunt, Albamque Coronæ suscipiendæ causâ ituro se socias jungunt. Ibi solemni ritu unctus inauguratusque Regni, quod se nunquam ambiturum jure-jurando pollicitus erat, infaustam possessionem adiit, lugubriore mox exitu

Carolus
Rex.
1384.

tu terminandam. Namque ubi Budam rediisset Carolus, Nicolaus Gara, cujus invidiâ tota hæc scena à malevolis constructa fuerat, ultimam fabulæ catastrophæ impositurus, persuadet Elisæbethæ, suum ut in conclave communicandi per speciem secreti de Sigismundo Duce consilii gratiâ Carolum alliciat: inter mutuum, ut fit, sermonem erumpit ex insidiis datò signò Blasius Forgachius, gravèque
 1385. vulnus in caput Caroli infligens ictu uno perfidorum spes succidit. Concidit extemplo Carolus, Visegradumque tumultuariè delatus carceri mancipatur, in quo non multò post interiit infelix Princeps, futurus felicior, si uno, quod justè adeptus erat Regno, contentus alterum contra jus-jurandum non prensâset.

Sublato æmulò quietæ rursus Regi-
 Sigism. næ imperabant, sed tanto oneri lacertos
 Rex. suos impares sentientes in curarum &
 1387. Regiæ dignitatis partem Sigismundum, postea Imperatorem Romanorum Regemque Bohemiæ, accersunt, ipsæ verò securitati suæ consulturæ in fidelem sibi Dalmatiam comitantibus Nicolao Gara, & Blasio Forgáchio revertuntur; sed en ubi salutem quærunt, extremam perniciem invenère: Audita quippe Caroli

roli cæde *Joannes Horvathus* Banus, ut
 erat Caroli studiosissimus, ac propterea
 vindictæ cupidus, Reginis Diacum ver-
 sùs iter facientibus numerofo & ipse sti-
 patus milite medio in campo factus ob-
 viam, eas ex improvifo agreditur, fu-
 gatisque prætorianis Garam Forgachi-
 umque fortiter pugnantes obtruncat. Ni-
 colaus certè vel ex eo inter Heroas nu-
 merandus, quòd cum fugâ sibi consule-
 re potuiffet, tamdiu tamen Reginas de-
 fenderit, donec mille sagittas generoso
 pectore excipiens equoque proturbatus
 caput à cervice revulsum amitteret. Eli-
 sabetha, ut *Bonfinius* vult, occlusis fau-
 cibus in proximo flumine Boffuta seu
 Bacuntio mergitur, aut, ut *Caresinus*,
 in carcere trucidatur: utroque tanta Prin-
 cipe indigno lethi genere, in caput par-
 ricidæ mox devolvendo; Maria namque
 eodem supra millesimum tercentefimum
 octogefimo feptimo anno Veneti Ducis
 operâ ex Crupenfi, aut, ut *Paulus de*
Paulo, Novigradienfi seu Caſtrinovi er-
 gaſtulo libertati reddita Sigifmundum
 ſponſum ſtimulare non deſiſtebat: ma-
 nus injici ſceletato parricidæ juberet,
 vindicaret immane facinus, atque ad
 poſteriorum memoriam juſtùmque timo-
 rem

rem crudelem latronem nova rursus cum Tvartkone Bosnæ Rege molientem excarnificaret.

Motus Mariæ querelis Sigismundus duas legiones cum expeditissimis conscribit equitibus, simulatæque in Bulgariam adversus Turcam profectio, Posegæ primum *Horvathum* obsidet, indeque nocte concubia elapsus, trajectoque Savô Dobor, Regni Bosnæ opidum, maxima celeritate petentem converfis illico signis insequitur, Doborinûmque cingit Effugere huc iterum parabat *Horvathus*; sed in insidias delapsus Regi sistitur, dùmque oppugnatio procedit, custoditur. Captô demum oppidô, Quinque-Ecclesias adductus meritas parricidii, etsi fors crudeliores, pœnas dedit; ad palum namque revinctus pèrque urbis vicus candentibus discerptus forcipibus, in quadrum denique sectus plenum horroris fuit civi plebique spectaculum. Nec multò felicior *Stephani Laczkfi* ceterorûmque conjuratorum triginta duorum Nobilium fuit exitus: Et *Stephanus* quidem Transylvaniæ Vajvoda, quem Banum Illyrici fuisse diximus, in Crisiensi Ungarorum Croatorûmque conventu obtruncatus

(d) *Ratk. Lib. 3.*

catus cum nepote suo vitam posuit 26.
Februar. anni 1395. (e)

JOANNES HERVOJA

Banus 1383. & alii.

Reverfus ex Apulia, ad quam eum cum Nepote Prioris Auranae abiisse diximus, *Joannes* in Croatiam, tumultuantisque tum Tvardkonis partibus adhærescens non exiguum Sigismundo Regi negotium annò præsertim 1388 fecit: & licet *Ladislaus de Luczens* anno hoc Sclavoniæ Banus, postea verò *Detricus* vel potius *Henric. Bubek* itidem Scl. Ban. se se furenti opposuisset Regio cum exercitu, prohiberetamen neuter potuit, quin universo in Illyrico, ac Jadrensi præprimis agro funesta *Hervoja* crudelitatis insignia cernerentur. Quin majora volutans animò, atque ad Banatum Illyrici Bosnae etiam Vajvodatum seu Præfecturam adeptus de Ladislao cæsi Caroli filio in Regnum Ungariæ inducendo cogitare cœpit. Non fugiebant insana hæc Sigismundum Regem consilia, qui, ut superbos hominis spiritus contunderet, atque immane facinus, quo Turcas in partes maritimas acciverat, castigaret, balistarios à Tragurinis per literas petiit, & decimo quin-

Ladis. de
Luczens.
Sclavon.
Banus.
Detricus
Bubek.
Sclavon.
Banus.

1398.

(e) *Paulus de Paulo in diario.*

- quinto Maji die impetravit; firmior tamen jam erat *Joannis* potentia, quàm ut adeò facile opprimi posset. Crevêre animi, Sigismundi Regis captivitate, seriôque de Ladislai Neapolitani coronatione agitari cœptum. Et subiisset tum forsan Julii Cæsaris fatum Sigismundus, nisi *Joannes Marottha* totius Sclavoniæ ac postea etiam Machovienfis Banus vitam Regi precariô impetrâisset. Quæ dum aguntur in Ungaria, Jadertini *Hervoja* pollicitationibus allekti cum Pago insula obtenta Ladislaum unà recipiunt, Regémque agnoscunt. Idem fecêre & reliquæ civitates vi aut blanditiis ad Ladislaum inclinatæ: & fuit suum *Hervoja* præmium, qui à Ladislao Dux Spalati proximarúmque insularum creatus non destitit ejusdem partes novis accessionibus firmare. Nec defuit ad eam rem homini consilium, quo usus *Paulum Bissenum* ante *Paulum de Pesth* Croatia in Banum datum, cum exercitu Ungaro, adversum se tendentem prope Bihachium sic cæcidit, ut *Bissenum* ipsum caperet, victumque Aloysio Aldemarisco Ladislai Classis Præfecto in victoriæ relatæ mitteret testimonium. Rediit tamen
1401. cum potiore Illyrico in fidem Sigismundi
1403. Paulus Bissenus. Paulus de Pesth. Cr. Bani.
- 1408.

di: tum ut maturè rebus suis consuleret, tum quia à Ladislao turbis Italicis impedito auxilia nulla mitti posse intuebatur. At Turcas rursus annò 1413 ad invadendam Bohemiam proritare, turbasque seminare in Ungaria, ac Zandalii Regni Bosnensis Vajvodæ fidelis castra cæsis incolis occupare ausus Spalatensi Ducatu à Sigismundo spoliatur.

Ussit hominem accepta ignominia, quam ut vindicaret, hostilia rursus exercens Regium in Bosnia exercitum pene ad internecionem delevit. Fuère tum 1415. Sigismundi Duces *Joannes Marottha* Bannus, *Joannes Gara*, & *Paulus Chupor* Bosnæ Pro-Rex, omnes in *Hervoja* potestatem eo prælio delati. Ac *Gara* quidem factò ad SS. Eucharistiam votò disruptis repente pedum vinculis libertatem nactus est, quam *Marottha* Nittriæ dein tumultus multò aurò redimere compulsus fuit. At *Chuporium* multò lugubrius fatum mansit; qui, quòd *Hervojam* vultu & moribus bovem referentem mugitu semel per jocum Sigismundo adstante salutâset, bovinæ insutus peilli in profluentem demersus est cum dicto: *Qui sub humana specie, bovina voce utebaris, bovinam quoque nunc cum voce for-*

Stephan.
Lofchon.
Banus.
David
Laczk.

Joannes
Medve.
Ban. Cr.
1418.

formam induc. Eodem anno alter quoque exercitus Sigismundi à Valachis profligatus luctum geminavit: cæsus inter ceteros *Stephanus Lofchonczius* incertum cujus Regni Banus. Opportunè hic subnectendus *David Laczk de Szánto*, apud *Rattkaium Joannis Marottha* de Sigismundo, quem è carcere liberatum edita per Ungariam ingenti strage in Regno firmaverat, optimè meriti successor, item *Joannes Medve*, quem *Timon (f)* ad eundem annum inter Banos Dalmat. & Croat. censet. Ceterum unum te adhæc de *Hervoja* monitum volo Lector: Dubitare videtur *Timon* in sua ad secundam *Novæ Chro. par. appendice* aliud ne hic ab Horvatho vel Joanne Herichorth, num idem cum eo fuerit: quodsi postremum sequi lubeat, negat is supplicium de Horvatho sumptum, sed confictum duntaxat, ut Reginae Mariæ satisfactum videretur. Sin verò diversos esse quis contendat, capitali pœna affectum Horvathum concedit.

HERMANNUS

Dalm. Croat. Slavon. Banus. 1406.

H*ermannus* Comes Ciliæ & Zagoriæ
socer

(f) *Synop. Nov. Chron. part. 2.*

focer Sigismundi triplici Regno Pro-Rex
 datus, rediens è Polonia, quò visum so-
 rorem annò 1410 iverat, nobile candi-
 diffimo PP. Eremitarum Divi Pauli Or-
 dini cum Monasterio Templum Lepogla-
 væ condidit, Magnæque Dominæ hono-
 ribus incertum tamen quo anno conse-
 cravit; nam Turcæ subjectis Monasterio
 ignibus cum reliqua suppellectile litera-
 riam pariter penum omnem perdiderunt.
 Quamdiu in humanis *Hermannus* fuerit,
 nîl certi habeo; eum tamen annò adhuc
 1435 (g) Sclavoniæ cum *Joanne & Ste-*
phano Weghl Segniæ & Modrusiæ Comi-
 tibus, quos *Ratkains* Frangepanos vo-
 cat, lego præfuisse.

Joan. &
 Stephan.
 Weghl.
 Scl. Ban.

MATTHKO DE THALOCZ.

Dalmat. Croat. Slav. Banus. 1420.

Fuit *Matthko* vel *Matthias* de *Tha-*
locz Ragusinorum Patritiorum or-
 tus genere, atque juxta *Bonfin.* soli Dal-
 matix, juxta *Thurocz.* verò Croatiæ
 etiam, & Sclavoniæ Præfectus, obitæque
 ad Polonos Legatione clarus; annò enim
 salutis supra millesimum quadringentesi-
 mum nonò & trigesimò Alberto Rege è
 ventris profluvio in ignobili Ungariæ pa-

Albertus
 Rex.
 1438.

E

go

(g) *Sigism. Decr. 6. in Concl.*

go Nefinil defuncto, Elisabetha vidua, licet uterum ferret, liberam novi Principis eligendi potestatem Optimatibus fecit. Usi illi indulta sibi libertate, Uladislauum Casimiri Regis fratrem, magnæ Lithuanix Ducem adhuc adolescentem Regem extemplo nominant, simulque quinque præcipuos viros, quos inter & *Matthias* noster, Uladislauum de Ungarorum voluntate certiores facturos, in Poloniam ablegant. Interea Elisabetha Ladislauum Posthumum Comaromii 22 Februarii enixa, factique sui poenitens, ut sponsum Uladislauum throno excuteret, Legatos è Sarmatia revocat, reversumque *Matthiam* cum Emerico de Marczali, & Joanne de Peren, manentibus in Polonia Joanne de Domniis Episcopo Segniensi, & Ladislao de Paloch, eò, quod cum Collegis suis ab Uladislai partibus constanter esset, in carcerem conjicit; ex quo tamen anno eodem sui tonsoris ope liberatus, advenienti non sine armis in Ungariam Uladislao, Illyrici, quibus præerat, Regnorum nomine fidem sponpondit, ac tandem gesto ipsos viginti duos annos Magistratu vitam, magno Uladislai dolore, cum morte commutavit.

Uladisl.
Rex.
1440.

FRAN-

FRANCISCUS DE THALOCZ

Dalmat. Croat. Slav. Banus. 1442.

MAtthiæ *Franciscum* vel *Franconem* subnectimus, *Turoczio Perkonem* seu *Ferkonem*. Interfuit is compluribus Uladislai præliis, ac postremo illi quoque ad Varnam Bulgariæ Oppidum infelici, quod Regi ac Regno toti funestum etiamnum posteri lugemus: id nos, quantum per dolorem licet, quam brevissimè exequemur: Rupto, Georgii Despotæ Rasciæ, & Juliani Legati Pontificii consiliis, eo ipso, quo ictum ad decennium cum Turcis erat, anno fædere, Uladislaus mortis Szegedinô castris Varnam pervenit, collatisque Ducum sententiis manus cum hoste, qui ea loca infestis jam signis circumvolitabat, campestri prælio statuit conferere: quare ubi Turcam per exploratores adesse nunciatum est, disponitur in suos à Joanne Corvino ordines miles, nihilque, quod providum Ducem agere oportebat, prætermittitur. Ac, ne quid periculi à tergo immineret, fauces, quæ inter lacunam & colles intercedunt, curribus præcluduntur: alteri verò aditui tormenta, quæ hostem eminus arcerent, objiciuntur. Post hæc instructa

E 2

acie

acie mediam vallem, utpote tutissimam, Regi Aulicisque attribuens, dextero cornui *Franciscum* Banum & Simonem Agriensem Præfulem Duces dedit, sinûlque Georgium Despotem Rasciæ, & Julianum Eugenii IV Ponti. Legatum cum Rascianis & ala Crucigerorum adjecit; à tergo verò ad curruum septa vexillum Divi Ladislai statuens Varadinensem Episcopum cum suo agmine, & parvo Lesconis Bobricii equitatu excubare præcepit: ipse verò cum expeditissimis Valachis equitibus nullum sibi locum definiit, ibi adfuturus illico, ubi maxime laboraretur. His ità constitutis, tentaturi nostrorum animos barbari sex equitum millia præmisère, qui ad dextram collium procurentes contempta Ungarici exercitûs paucitate pugnam eminus conferebant, Non defuit militi animus in hostem eundi: sed Agriensis cum Bano sapienter providens, ne iniquitate locorum parùm prospere pugnare cogeretur, suos quidem tunc continuit, ast ubi hostis in planiora descendit, effusis habenis eo ardore in Turcos itum, ut illi extemplo terga vertentes reliquum suum exercitum non mediocri metu percellerent.

Verùm

Verum mox ingens Turcicus equitatus superveniens fugitivósque illos secum retrahens prælium restauravit, quod dum fervet, Simónque Agriensis & *Francus* noster rursus hostes in fugam conjiciunt, metuens Varadinensis ne se absente victoria conficeretur, accurrit illico cum Despote, fugientibusque barbaris à tergo instat; sed ea res universum exercitum in extremum exitium conjecit; namque cum collem, quem Turcæ fugientes petebant, attigissent, ab increbescente Ottomanorum multitudine nostri in sinistram funduntur. Fit fuga Christianorum, dumque laxatis ordinibus miles suas stationes repetere conatur, Turcæ eo fervore insecuti sunt, ut ad impedimenta ipsúmque Divi Ladislai vexillum pervenerint. Acre hic illis cum Bano solo & Despota certamen; nam Varadinensis locorum ignoratione in paludes delatus, dum cænò teneretur, hostilibus jaculis impetitus occubuit; Simon verò Agriensis Galatam effugere conatus, cæditur, aut, ut alii, captus ovibusque pascendis addictus vitam Præfule indignam ducere coactus fuit. Tantis itaque Ducibus amissis non fuit tam facile *Francisco Bano* & Despoti hostium

impetum sustinere; pari tamen aliquamdiu fortuna certatum fuit, tum superante hoste adeò laborari à nostris cœptum, ut confosso Lescone currus ipsi, qui castrorum vicem obibant, oppugnarentur. Advolavit illico audito *Francisci* periculo Uladislaus, inque medium Janitzarorum agmen irruens, dum strenuè non tam pugnat in hostem, quàm sævit, à confosso in dextro armo equo labentéque ipse quoque in terram effusus, atque hosti agnitus, tellorum imbre confossus occubuit. Visò miserò Regis, quem frustra revocare satagebat, fatò Corvinus, ut esset, qui hanc genti suæ inustam notam elueret, caput periculo subduxit, superatòque Danubio se cum *Francisco* Bano in tutiora recepit. Nec incruenta ea hosti fuit victoria, è cujus 60 millibus, triginta interfecta, cùm è nostrorum sedecim millibus vix tertia pars cum Corvino & Bano rediret, hosti vicem parem non semel redditura.

Et intentus in omnem rei bene gerendæ occasionem Corvinus, reddidisset eam abundè in Merularum campo; (Un-
 1448. garis Rigó-mező) nisi à Georgio Despota, jam tum ob recuperatam Mysiam Turcis colludente, proditus, post trium die-

dierum acre certamen hosti rursus cedere coactus fuisset. Periiit eo prælio *Franciscus* Banus gloriosamque vitam suam non dispari exitu terminavit annò à Banatu suscepto sextò. *Szentivani* eum in Varnensi cæde occubuisse memorat, verum Joannes is Thalocz fuit *Francisci* & *Matthiæ* Banorum frater, Auranaeque Prior Belgradi adversum Amurathem 2dum strenuus propugnator. Vide hæc, si lubet, fusiùs apud *Bonfinium*. (h)

NICOLAUS UJLAKI

Sclavoniæ totius Banus. 1449.

N*icolaus* Machoviæ Banus (est autem Machva vel Macsva Provincia è regione Sirmii ultra Savum sita) Reginae Elisabethæ partes secutus principid, Uladislao denique sumptâ ex cranio, aut simulacro Divi Stephani coronâ, cum veram Elisabetha abstulisset, cincto, inque Regem inaugurato adhæsit, eaque de causâ novo à Rege munere auctus Joanni Corvino Transylvaniæ Vajvodæ Collega datus fuit annò 1441. Ereptò ve- 1444.
rò humanis clade Varnensi Uladislao, indicta fuere in campo Pesthinensi comitia,

E 4

(h) *Decad. 3. L. 6.*

Ladisl. V.
Rex.
1452.

tia, &, quia Ladislaus posthumus nondum per ætatem Regno præesse poterat, de Gubernatore deligendo est consultatum. Obligere nonnulla *Nicolao Ujlakio* uti & Francisco de Thalocz suffragia; sed Joannis Corvini nota virtus, prudentia, æquitas palmam tulit. Sensit eam rem gravius, ac oportebat, *Ujlakius* noster, cujus animum ut mitigarent Proceres, ad Vajvodatûs Transylvaniæ Banatûsque Machovienfis munia, trium quoque Illyrici Regnorum Præfecturam an. 1449 adjecere. (i) Sed excelsus *Nicolai* animus, majoraque semper anhelans, ubi à morte Ladislai, novi in comitiis dicendi Regis dies dictus fuisset, spem ipsius quoque Regni non exiguam conceperat, qua cum se frustratum, Matthiamque Corvinum, Hunyadi Joannis filium, sibi præpositum cerneret, omnes curas in id transtulit, ut Matthiæ, quâ quâ posset, incommodaret.

Matth. I.
Rex.
1458.

Opportunam ejus rei gerendæ occasionem varia, quibus Matthias distinebatur, bella præbuere, qui præter Turcicum & Bohemicum Austriacô etiam, quod recuperandæ Sacræ Coronæ causâ à Friderico retentæ susceperat, annô salutis

(i) *Rattkai Lib. 3.*

tis nostræ 1459 occupatus, vires multifariam dividere necesse habuit. Ea opportunitate usus *Ujlakius*, ut molestus Regi esse pergeret, cum nonnullis Ungarici nominis Proceribus Imperatori adhærescens, Regnum, quod consequi non poterat, perditum ibat. Occurrit propriam populanti patriam ad Kõrmõndinum Simon, Magnus Corvini copiarum Ductor, sed quem viribus tunc & numero inferiorem cum tribus suorum, quinque Cæsareorum millibus facile *Ujlakius* fugavit; ea tamen hic illum moderatione usum scribunt, ut fusis Regiis, à profusione civilis sanguinis jufferit abstinendum. Matthias, ut tantum talémque virum, sibi Reipublicæque lucraretur, quem ferro non poterat, beneficiis devincire statuit, promissaque Bosnensis Regni coronâ eodem 1459 anno ab Imperatoriis partibus ad suas revocavit. Non multis verò pòst annis, cùm jam non præliis, sed Oratoribus pecuniæque de recipienda à Cæsare corona ageretur, inter Legatos Corvini *Nicolaus* missus redemptum sexaginta aureorum millibus sacrum pignus velut ab exilio reduxit, quo, anno mox sequente, Matthias solemni ritu caput cinctus, *Nicolao Ujlakio*

1463.

Emericus
Zapollya
Dal. Cr.
& Slav.
Banus.
1464.

kio in Illyrici Præfectura Collegam dedit *Emericum Zapollya* (*k*) Ducem belli illustrem, ac postea annò 1486 Ungariæ (*l*) Palatinum. Hujus *Emerici* potissimum virtute Matthias Jaiczam cum vicinis arcibus Turcis eripuit, ac propterea perorantibus vel ipsis, quæ inter oppugnandum accepit, vulneribus, toti, quæ Matthiæ parebat, Bosniæ Gubernatorem annò 1463 præfecit.

Ceterum quot annos Illyrico *Nicolaus* præfuerit, certum non habeo, quem *Timonius*, narrans Legatos Machometis Agriam ad Matthiam Regem ab *Nicolao Ujlakio* adductos annò 1468, Banum Machoviensem Dominumque Sirmii, & extremorum Ungariæ finium duntaxat Custodem nominat, uti pariter ante annum 1463 Slav. præfuisse non memorat. *In Decreti* certè *2di* ad annum 1464 conclusione *Ujlakius* Vajvoda Transilv. & Machoviensis Banus tantum; *Zapollus* verò Dalm. Croat. & Slav. Banus nominatur. Supplevit tamen Illyrici Præfecturæ jacturam Matth. (*m*) dum *Nicolaum* ob rem contra Machometem præclare gestam Regem Bosniæ

Vra-

1474.

(*k*) *Matth. 1. Decr. 2. in Con.* (*l*) *Ejus. Decr. 6. in Concl.* (*m*) *Sam. Tim. in Imag. N. Un. c. 18.*

Vratislaviæ agens dixit; Filium verò *Nicolai* Laurentium Sirmio Ducis potestate præfecit; qua de re majorem in modum gloriari Matthiam diceréque solitum accepimus: *quia obnoxium sibi haberet Regem, se Archi-Regem esse.* Mortuus dein, nescio quando, *Nicolaus* est, sed ità, ut in Historicorum monumentis, atq; in Galgocziensium PP. Franciscanorum sacra æde, quam ille cum Monasterio, socio liberalitatis Comite de Cheli-Chak annò 1464, impetratâ ad id à Pontifice Max. veniâ, erexit, etiamnum vivat. Est autem Galgoczi-um secundo ab Tyrnavia, nobili Musarum colonia, lapide situm trans Vagum amnem oppidum, quod quia Slavis Frastak dicitur, inde *Ujlakjo* Fristacii & Fristackkii nomen hæsit. Quodsi *Ujlakius* ad annum 1476 vitam produxit, Matthiæ Regis nuptiis cum Beatrice initis Paranymphe munere interfuit; meminit quippe Regis Bosnæ præsentis *Palatini Comitis Legatus* de hac re scribens. Harum nuptiarum apparatus si nôsse cupis, *Bonsinium* (n) consule, & veterum Ungarorum magnificentiam mirare.

JOAN-

(n) *Decad. 4. L. 4.*

JOANNES VITTORICH
DE GREBENIN,

E T

JOANNES THUZ DE LAK

Banus Dal. Croat. Scl. & Bosnæ. 1467.

Non defunt , qui Ujlakio in Regnum evecto *Jan* , vel *Joannem Wittorich de Grebenin* , ac huic post triennium vitâ functo *Joannem Thuz* ad annum 1465 successorem datum scribant. Verum cum Ujlakium Regem à Matthia dictum annò 1474 constet, necesse esset, *Wittorichium* ad eundem annum, *Thuzium* verò ad septuagesimum septimum , quod tamen *Rattkaio* non probatur , rejicere. Malim proinde *Thuzium* cum *Timonio* ad annum 1467 in Illyrici Bosnæque Banatu collocare Ujlakio nondum quidem Rege factò, alia tamen de causâ Præfecturâ Illyrici cedente. Hic itaque *Joannes Thuz* Osvaldi Zagrabienfis Episcopi frater jam annò 1465 M. Tavernicorum totiusque Zagoriæ Comes postquam Croatiam ceteraque Regna Vicaria pro Rege potestate moderari cœpit, militari, quâ pollebat, animi ferociâ & pene in crudelitatem prona indole aded à se omnium alienavit animos, ut mul-
ti de

ti de nobilitate quererentur vi & armis non legibus Rempubicam administrari. Quæ, ubi ad Matthiam perlata, permovere æqui justique amantem Regem, ut eum annò ejusdem seculi septuagesimo tribunatu cedere juberet. Novem post annis dum compositis utcunque in Bosnia rebus Zagrabiam venisset Matthias inter ceteros Optimates, qui cædium, latrociniorum, rapinarumque accusabantur, *Joanni* quoque *Thuzio*, incertum cujus rei causâ, diem dixit. Verum is inimicorum declinaturus invidiam, relictis, quæ in Ungaria Sclavoniæque opulentissima habuit, oppidis, Venetias, qua in Urbe postea vivere desiit, cum filiis sexagintaque aureorum millibus se recepit. Cognita ibi viri dignitas id apud Venetos effecit, ut eum Patritiorum albo insertum non pacatè duntaxat, sed honoratè etiam vivere vellent.

BLASIUS MAGYAR

Dal. Croat. Schl. & Bosnæ Ban. 1470.

BLasius nondum Banus publicis sub Matthia admotus muniis, Svehlam Bohemorum latronum Ungariam instantium Ducem in arce Kosztolanensi secundo ab Urbe Tyrnaviensi sita lapide obse-

1465. obsedit primùm, tum effugere parantem sed captum cum tercentis & quinquaginta fociis in crucem pro ipsis arcis portis egit, ut terribiles hoc spectaculo reliquos deditionem facere cogeret. Alterò verò mox in ipsa Bohemia gestò bel-lò, quod Matthias Georgio Podebradio
1468. annò jam 1466 ab Ecclesiæ unione rescisso intulerat, eam laudem retulit, ut expugnata Spilperga arce Ulyssis passim ob rerum bellicarum astum; in ejus verò palæstra exercitatus Paulus Kinisius atque in eadem expeditione socius, Ajacis nomen ob inauditam animi corporisque fortitudinē referret. Naetus verò quatuor, ut vel exinde ejus dotes cognoscas, Regnorum Præfecturam, Turcis annò 1470 ultra Savum Sabacium ædificantibus aliud cum Gabriele Colocensi Archi-Episcopo munimentum opposuit, quo barbarum hostem à latrociniiis & cædibus prohiberet. Nec tamen prospera ita *Blasio* fuere omnia, ut non interdum novercam & ipsæ fortunam experiretur; annò namque 1475 ad vastandam Valachiam cum sex Ungarorum millibus abire jussum, à Stephano ejus Provinciæ Vajvoda ad internecionem cæsum fuisse scribunt Poloni Matthiæ Regi semper infensi:

si: negat *Timonius* (o) *Blasium* per populosam atque tumultuantem Transylvaniam, quæ, *Cromero* teste, recens in Stephani partes desciverat, cum sex duntaxat suorum millibus se Valachiæ inferre potuisse. Felicior fuit anni 1479 Bosnensis expeditio, in qua Stephanus Scepusiensis & Petrus Gara hostem ultra Jaičzam secuti in oppido Verbocio ad internecionem pene ceciderunt, eandem & ipsi vicem accepturi, nisi 300 Croatæ equites à *Blasio* opportunè submissi in Turcam, qui laborantibus suis auxilio accurrerat, mira animi fortitudine illati, socios Ungaros extremæ cladi eripuissent; hi enim non solum repressere barbari impetum, sed spoliis etiam divites matura jam hyeme Zagrabiam cum Rege Matthia rediēre.

Hic Rex dum agit, adfertur Joannem Frangepanum adversum Veglienses insulanos refractarios Matthiam Regem implorare: expeditur illico *Blasius* bellumque pro Frangepano apparare jubetur. Verum Joannes inconstans, remisso, quod in Veglienses habebat, jure Venetis, in eorum urbem demigravit: quare ne miles frustra coactus videretur, eum
Mat-

(o) *Synop. Chron. parte 3.*

Matthias *Blasio* & Joanne Nagy Ducibus in Apuliam misit, Ferdinando Regi Hydruntum adversum Turcas obsidenti, auxilio futurum. Ubi primum in Apuliam trajiciens *Blasius* castris se Ferdinandi adjunxit, Illyricas ostentaturus vires, ut eadem, qua in conspectum hostilis urbis venerunt loca, cum Turcis congrediliceret, petiit, & impetravit. Fecit rem pro virili *Blasius*, ac turri, quæ magnò præsidio tenebatur, expugnata, adeò barbari ferociam domuit, ut is solitis procursionibus nostris molestus esse non auderet. Compulsis demum ad deditio-
 1481. nem hostibus magnis à Ferdinando Aragonio Siciliae Neapolisque Rege *Blasius* excultus muneribus plenus veræ laudis revertit, Matthiæque propterea, quoad Rex iste vixit, charus extitit. Erepto dein nobis an. 1490 Rege gloriosissimo cum varias in partes electuri novum Principem Proceres distraherentur, electum postea Uladisl. II publicare noluerunt prius, quam, *Sambuco*, alias *Samboki*, Tyrnaviensi Ungaro & claro scriptore teste, Croatiae Banus declarationi interesset. Absuit tamen ab Uladislai inauguratione ab Alberto ejus fratre in suas partes traductus: cui ut fidem probaret, quadringentos
 expe-

expeditos equites, quos Beatrix Matthiæ vidua amore Ulladislai capta ad removendum ab Cassoviæ obsidione Albertum miserat, aggressus fugavit. Ultima hæc *Blasii* victoriarum fuit, eodem namque anno è vivorum sublatus numero, Alberti partes non modicum labefactavit. Hic ille *Blasius* est, quem sola virtus è gregario milite in summo pene honorum apice collocavit. Reliquit is filiam unicam Benignam Paulo Kinisio jam antè in uxorem datam.

Invenitur quidem in vetustioribus Sclavorum monumentis annò 1475 *Joannes Ernust Comes Zolienſis Sclavoniæ Banus*, item *Ladislaus Hermannus de Gereben* ejusdem Vice-Banus, simul & Provinciæ Crisiensis Comes. Ad annum verò 1476 Sclav. Banus *Petrus Bochkay de Raſzinia*; cùm tamen *Blasium* nusquam Provinciâ motum legamus, dicendum est: *Petrum* ceterosque id muneris gessisse, dum *Blasius* variis extra Illyricum expeditionibus distineretur, aut certè ejus Collegas, quod aliàs factum etiam, fuisse. Quia tamen annò 1486 (p) Banus Dalm. Croat. & Sclav. in *Corpo-re Juris Ungarici* non *Blasius*, sed tantum

Joannes
Ernust
Scl. Ban.
& Ladis.
Herman.
de Gere-
ben Vice-
Banus.
1475.

Petrus
Bochkay
Scl. Ban.
1476.

F

Mat-

(p) *Matthia 1mi Decr. 6. in Concl.*

Matthias Gereb nominatur, forsitan *Blasius* Budensi tunc archiepiscopo Urbique, in qua Corona servabatur, præsuit; cum *Bonfinius Blasium* quempiam Budensibus ad ea tempora Præsidentem datum scribat.

MATTHIAS GEREB

DE WINGARDTH.

Dalm. Croat. Sclavon. Banus. 1484.

M*atthias Gerebus*, jam annò 1484 à *Rattkai*o in numerum Banorum relatus, Petri Gerebi Palatini frater Matthiæque Corvini consobrinus sub eodem Matthia primis belli initiis positus, virtutem suam sub ipsa Jaicza (q) luculenter probavit; cum enim Mustapha Turcarum Tribunus datis ad Regem literis fortissimum quemque ad pugnam singularem deposceret, nemòque in universo reperiretur exercitu, qui periculi plenam aleam non formidaret, id verò *Gerebus* admodum tum adhuc juvenis ferendum non ratus, impetratâ ab Rege veniâ, manus cum Mustapha conferuit, obtruncatèque barbari caput ad pedes Regios projecit. Delectatus adolescentis virtute Matthias, tametsi is non sine vulnere victoriam retulisset, eum nobili equo aure-

(q) *Ab ovo dicta, cujus formam refert.*

aureisque calcaribus, singulari nobilitatis nota, spectante toto exercitu donatum, publicis laudibus honestavit. Hoc ille virtutis suæ edito specimine, frequentibus postea exercitus præliis viam sibi ad Banatum aperuit, potitusque Illyrici Præfecturâ cum septem Turcorum milia per Croatiam ad populandam Carinthiam Carnioliamque irrupissent, eos reduces spoliisque divites ad Unnam amnem, quâ is Savo sub Dubicza arce miscetur, adortus, adscito etiam in belli societatem Bernardino Frangepane, Lupo Despote, & Petro Garay, internecione delevit, præda omni, ac, quod charissimum illi, decem millium captivorum turba recepta. Adstitit dein morienti Viennæ 1284. Matthiæ Regi, Uladislaique coronationem miro equorum, armorum, famulorumque apparatu exornavit, annô ipsemet 1490. tumulo illatus.

LADISLAUS DE EGER-VÁR.

Dal. Croat. Scl. Banus. 1492. (r)

Utilem *Ladislaus* vivo adhuc Matthiæ bello Austriaco navavit operam, Regiôque Dux datus exercitui Silesiam Lusatiamque magna sui com-

Uladisl.
II. Rex.
1490.

F 2

men-

(r) *Uladislai II. Decr. l. in Concl.*

mendatione gubernavit. Translatus post hæc in Illyricum, Turcarum copias memorabili clade quinque eorum millibus neci datis affecit, depulsisque eâdem Provinciâ Germanis, cives ad pristinæ fidei officium revocavit. Nec diu post-hæc ipse supervixit, annô 1494, ut *Bonfinius* vult, in officio Tavernicorum Magistri fatis cedens; vixisse tamen eum annô adhuc 1495 certum habeo, cum in fine statutorum ejusdem anni Tavernicorum Magister legatur.

JOANNES CORVINUS

Dalm. Croat. & Slav. Banus. 1494.

DEjectum spe Regni paterni *Corvinum Joannem* solaturus Uladislaus ad Sclavoniæ, Liptoviæ, & Opaviæ Ducatus, Dominatûmque Bajmocensem, quibus titulis vivo dum Patre honestabatur, Regnorum quoque Croatiæ, Sclavoniæ, & Bosnæ possessionem ea lege adjecit, ut absoluta quidem ac Regia potestate iis præesset, si tamen absque liberis, uti factum, decederet, omniarum Regis Ungariæ dominatui subjicerentur. Verùm Bani ille contentus titulô dum Sclavoniam, quam teste *Ratkaio* Pro-Regis nomine annô primûm 1494

mode-

moderari cæpit, petiturus annô 1491 Budâ egreditur, à Jacobo Székeli Imperatorias partes secuto opulentissimis Paternis thesauris per summam injuriam ipso in itinere spoliatur: magnos hos fuisse vel ex uno 70 millium florenorum torque conjice, quem visum à se Venetiis *Gregorius Petthô* rerum Ungaricarum scriptor commemorat.

Nîl tamen eo damno accepto turbatus *Joannes*, magis doluit Croatiam intestinis diffidiis, ac Cæsarea cumprimis factione perturbari. Defecerat quippe ad Germanum Christophorus Frangepanus connivente Bernardino Patre, Zagabiensisque Civitas admisso 600 Theutonum præsidio Uladislao *Joannique* parere detrectabat. Cives proin ad officium revocaturus *Corvinus* Urbem tam arcta obsidione cinxit, ut prohibito exitu, omnem procurrendi rapinasque exercendi facultatem ademerit. Unus adhuc Jacobi Székeli adventus obsessos confirmabat; verum & hoc à *Joanne* cæso, Zagrabienfes spe omni abjecta Germanis incolumibus abire permissis se ad arbitrium Victoris dedidère. Ex his cum pateat *Corvinum* ab Uladislai stetisse partibus, non sine causa mirum *Timonio* in

1491.

sua *Nova Chronologia Synopsi* videtur id, quod de *Hanselico* seu *Joanne Corvino Cromerus* tradit, eum scilicet cum Maximiliano Cæsare ab Uladislao hoc eodem anno profligatum esse.

Compositis hunc in modum publicis in Croatia turbis, privatis, quæ inter Bernardinum & Joannem Frangepanos intercesserant, dissensiones sedare non potuit, propterea quod vetus illi Belæ jactantes Privilegium neminem se præter Regem Judicem admissuros dictarent: quorum ille tumultuum pertæsus omni Illyrici magistratu cessit, contentus ditione sua, quam iis in regnis privato jure possidebat. Cessionem hanc actam oportuit post *secundum* Uladislai *Decretum in cujus Conclus. anni 1495* legitur Dalmat. Croat. & Slav. Banus *Jaannes Corvinus*. Resumpsit tamen eandem rursus dignitatem daturus aliquid præcibus Uladislai, ut infra visuri sumus. Opportunè hic mihi memorandus venit Petrus Pokius è Mèrgeffionum ortus genere, Bajmoczensis Præfectus Arcis, qui, quod *Corvini* vitæ insidias struxerit, neque arcem eidem *Corvino* Domino suo reddere voluerit, Judicum sententiâ in frustra proditorum more annò paulò antè

tè dictò sectus, temeritatis refractariæ
pœnas dedit.

EMERICUS DEREÇZENNIUS,
ET JOANNES BOTHUS.

Dalmat. Croat. & Slav. Bani. 1491.

PLures hoc tempore Illyrico fuisse Ba-
nos ex eo constat, quod præter La-
dislaum Eger-Vára Joannémque Corvi-
num, *Emericum* quoque *Dereczennium*
ad annum 1491 Banum legam apud *Gre-
gorium Petthó*. Cùm verò in Decretis
Regum Ungariæ non omnes, sed unus
duntaxat, nominentur, dicendum est re-
liquos secundarios, ut dicimus, ac primi
Collegas fuisse. Hic itaque *Dereczen-
nius* dignitatis laborumque socium na-
ctus *Joannem Botthum*, eundem infelici
casu sub Brinia arce, in qua se Bernardus 1493.
Frangepanus ab iniqua Segniæ oppugna-
tione per *Dereczennium* nuper rejectus re-
ceperat, amisit; dum enim, qua parte
foret commodior oppugnatio explora-
turus mœnia incautus circumcursât;
plumbea glande ab arce emissa ictus è
vestigio corruit exanimis. Irritatus so-
cii nece *Emericus* hostem acrius obsidet
expugnâtque: quod eò celerius factum,
quia Jacuppem Spadonem ulterioris Bos-
niæ

niæ Præfectum magno exercitu ad vastandas Illyrici Carnorúmque regiones irrupisse certis nunciis ferebatur. Accurrerat quidem ad barbarum propulsandum Joannes Székel, seu Siculus Maximiliani Cæsaris militiæ tum Ductor; sed Turcæ incredibili celeritate usi in Modrusiensem jam reduces agrum pervenerant. Obstitit ulteriorem tentaturis reditum *Dereczennius* cum Bernardo Comite Frangepano, Nicolao item & Joanne ejus fratribus, Jacuppésque ipse multò copiosiores nostros arbitratus, ut tutò sibi in Bosniam reverti liceret, precariò postulabat; verùm cùm *Dereczennius* id se, nisi libertati redditis captivis, minimè concessurum reponeret, résque missis ultro citroque nunciis incassum ageretur, ventum denique ad arma fuit.

Lustrato tamen curiosiùs hostili exercitu, cùm eo se multò inferiorem intueretur *Dereczennius*, declinare sapienter prælium, militémque certæ cladi eximere cupiebat; verùm cùm Bernardus Frangepanus ceterique Illyrici Tribuni pugnam ferociter postulantes, eam non sollicitudinem providam, sed ignaviam Bani interpretarentur, commotus ea re *Dereczennius*, se quidem non sui, at exerci-

ercitûs servandi causâ pugnam detrectâsse respondit: iturum tamen, nîl dubitent, idque unum precari, ut quem modò jactarent animum, in pugna quoque præferrent. Nec diu factum, cum Turcæ è densioribus sylvis eluctati explicatis signis nostros ad certamen provocare lacefferéque cæperunt; quo viso Banus dispositis in quatuor latera tribus agminibus, tubas canere primâmq; turmam signa in hostem inferre præcipit. Pugna & longa fuit & anceps; sed reparante cladem suorum novis auxiliis Jacuppe victoria ad Turcos declinare cæpit. Hic verò *Dereczennius* ad Bernardum Comitem accurrens: Eja age, inquit, vir fortissime, præclarâmq; animi ferociam, qua pugnx præludebas, exere: quibus ille verbis, velut totidem stimulis animatus, acriter in hostem invehitur, dùmque generosè depugnat, Joannem fratrem ab hostibus cæsum amittit; cujus cadaver dum Georgius Blatkovich Narisii in Dalmatia Reguluseripere conatur, funus ipse dolorémque accumulat. Persistebat tamen in certamine Bernardus; sed vim ad extremum non ferens profugit denique cum suis, perturbatósque reliquos, qui integri adhuc constiterant,

1493.

aciei ordines pene omnes in suum exemplum traxit. Restitit cum valido tertio agmine *Dereczennius*, sociósque à fuga retrahere frustra molitus se in confertissimos hostes infudit. Ibi verò eum majori, quàm creai potest, fortitudine dimicâsse ferunt; namque cadente etiam confosso lanceâ equo, non cecidère viro bellicoso animi, qui gladiò vitam tuitus tamdiu à se hostiles arcuit manus, dum perfracto capulotenus ense telòque omni exarmatus caperetur. Accurrit laboranti Patri unicus, quem habebat, filius cum fratre Bani, sed qui crudelissimè interfecti victima agnati sanguinis cecidère. Desiderata præter hos è nostris quinque millia & septuageni septem, non adnumeratis iis, qui lethalibus vulneribus faucii vitam domi finiêre: inter captivos, præter complures Ungarici Illyricique nominis illustres equites, *Dereczennius* Banus & Nicolaus Comes Frangepanus fuit, abundèque cladem annò 1491 à *Dereczennio* ad Unnam fluvium acceptam hostis reddidit. Frangepanus demum multò se aurò redemit; *Dereczennius* verò Bajazethi dono à Jacuppe datus inque septem turrium conjectus carcerem

mæ-

mærore amissi cum filio & fratre exercitûs tres intra menses contabuit. (s)

Duo te hic monitum volo Lector benevole: alterum illud: quòd, si *Rattkaii* sententia sequenda sit *Dereczennium* in septem turrium carcere post tres menses annò 1496 mortuum scribentis, dicendum erit *Dereczennium* duos & amplius annos in Turcia extra carcerem vixisse, ac demum in septem turres coniectum mærore animi contabuisse. Alterum verò illud est; quòd *Timonius* (t) contra *Istvanffii* & *Bonfinii* sensum, quorum postremus Banum in insula Constantinopoli vicina pestilentia aut veneno extinctum asseverat, eum cum Nicolao Frangepano aliisque pluribus à Thoma Bakacsio 1100 mill. redemptum esse ex ejus temporis scripto probare nitatur. Suspectum & illud *Istvanffii Dereczennium* Joannis Corvini locò se sponte Præfecturâ abdicantis in Illyricum cum exercitu missum esse; cum enim *Dereczennius* teste ipso *Istvanffio* annò 1493 profligatus captusque sit, Joannes verò Corvinus annò adhuc 1495, uti suprà memini, Banus in Corpore Juris Ungari-

(s) *Istvanffius* L. 2da. ad annum 1493.

(t) *Synop. Nova Chron. part. 3.*

garici legatur, dicendum erit potius, *De-reczennium* Corvini Vice-Banum aut Banalem, uti modò usus obtinuit, Locumtenentem fuisse.

GEORGIUS DE KANISA

Dalm. Croat. & Slav. Banus. 1493.

AUdita ea nostrorum in Croatia clade Uladislaus, nequid detrimenti Provinciæ suo capite destitutæ acciperent, *Georgium* illico, aliis *Ladislaum de Kanisa* cum novis legionû supplementis Bani nomine misit, cui oræ præterea maritimæ præposito Jaiczæ & Segniæ tuendæ negotium dedit: annò certè 1498 trium Regnorum Banum fuisse ex *Uladislai II. Decr. 3.* clarum habemus. Vix inito magistratu, quàm eximias ad moderandam Rempublicam attulerit dotes, sopitis inter Osvaldum Zagrabiensem Præsulem, & Joannem Corvinum dissidiis, &, quæ inde orta erant, bellis civilibus, palàm fecit. Osvaldus quippe soluto Budæ conventu domum reversus, dum Corvinus in Ungaria apud Paulum Kinisium agit, castella Episcopatus, quæ is expulsò Croatiâ Germanò occupaverat, armis statuit recuperare. Quare Rochonico (*Illyris Rakovaoz*) obseffo captò.

captóque arma inde ad alia oppida evocato Germano milite transfudit latè omnia infestaturus, nisi Corvinus accepto copioso à Kinisio milite, Laurentio etiam Duce Nicolai Ujlakii Bosnæ Regis filio aliisque cum equitatu ad se accito, novis his conatibus suos objecisset. Ingressus proin Zagrabiensem agrum recepit omnia, profligatóque Osvaldi trium millium exercitu omnibus Episcopatús villis ignem subjecit : illaturusque haud dubie majora damna fuerat, nisi *Kanisaius* ipso Osvaldo non repugnante Rochonicum Corvino restituens, renovatáque inter eos ea lege amicitia, ut Majestatis is reus postularetur, qui prior à fædere recederet, gliscentem belli crudelioris fomitem maturè restinxisset. Eripuit virum illustrem annus 1500, interque illi similium : id est magnorum Heroum manes collocavit.

JOANNES CORVINUS

Dalm. Croat. Scl. secundo Banus. 1500.

Eodem anno *Joannes Corvinus* Regi se gratum exhibiturus Præfecturam Illyrici magno earum Provinciarum bono recepit ; (u) Bajazetes enim proferendi

(u) *Uladdislai II. Decret. 4. in Concl.*

di imperii avidus vastatâ Dalmatiâ, Nauticum, Dyrrachium, Methonem, Cephaleniam insulam plurâque alia Venetis eripiens Illyrico universo vastitatem minabatur. Conturbati ea re Veneti, ad Ungaros, familiarem sibi his in procellis portum, confugiunt, missique Petrus Paschalico auxiliares ab Uladislao copias postulant. Assensit ea conditione Uladislauus, si Respublica eum pecuniæ numerum, quem Matthiæ in singulos annos pendere consueverat, nunc quoque solveret, donec bellum gereretur. Quod postquam Legatus facturam Rempublicam fide data recepisset, *Joanni Corvino*, Josepho Somio, Petro item Comiti S. Georgii cura scribendi militis hostemque laceffendi demandatur. Gesta hæc annô adhuc 1500. Sequenti verò cum Turcæ bellô se ab Ungaris & Illyris petiti non obscure intelligerent, strenuè & ipsi se se comparant, utque non repulisse, sed intulisse arma viderentur, Jaicziâ Bosnæ Regni caput adorti, acri eam obsidione

1502. cingunt; soluturus hanc *Corvinus* cum expeditissimis copiis illico adfuit, postque arce aliquamdiu certamen Turcæ fusi ad quatuor suorum millia desiderarunt: mil-

mille ex nostris aut eo ampliùs interfecti sunt, nec multò pauciores sauciati.

Liberatâ Jaiczâ *Corvinus* non exiguam apud omnes laudem consecutus plurimùm eam auxit, dum Turcas vindictæ aviditate eodem nondum evoluto anno Savum transmittentes in Rascia profligavit. *Cromerus* ad Bodon usque nobile in ripa Danubii emporium procurrisse Ungaros memorat, *Istvanffius & Petthô* vi loco potitos esse scribunt. Positis verò paulisper armis, ut operam suam in toga quoque Patriæ commodaret, interfuit Conventui annò 1503 in campo cancrorum (*Rákos mezô*) celebrato, in quo inter cetera querebantur Ordines Moraviam, Silesiam, ac Lusatiam, quas sub Matthia Rege Ungarico Imperio obnoxias meminerant, Bohemiæ denuo adjungi. Verùm autumnus anni 1504 die Octobris 12 victoriarum pariter & vitæ *Corvino*, dum annum ageret 35, finem attulit. Sepultum cadaver pompâ tanto Principe dignâ Lepoglavæ apud PP. Eremitas à S. Paulo dictos, quorum Templum & Monasterium ab Hermanno Bano constructum novis cum Beatrice Frankepana Bernardi filia, Conjuge sua prædiis,

diis, villis, Regiisque immunitatibus ditaverat. (x)

Et quamvis Regnorum Illyrici possessio juxta vetera pacta (imploris enim decesserat, liberis Christophoro & Elisabetha, quos ex Beatrice, postea volente Uladislao Georgio Marchioni Brandeburgico nupta, susceperat, immaturò fatò sublatis) ad Regem Ungariæ recideret; arcium tamen, quas privato jure possidebat, amicos hæredes tabulis postremis scripsit. Benedicto certè Rattkaio viro fortissimo, omniùmque *Corvini* copiarum Duci, aut, ut *Privilegium* loquitur: Gentium armigerarum Generali Capitaneo, castrum Nagy-Thábor, quod vulgo Vrbocz dicitur, cum Castello Jurkethincio, amœna ad Varasdinum planicie sito, possidendum dedit: cui Rattkaius vel à morte gratus futurus in eadem Divæ Virginis Lepogla venfi Æde voluit ad pedes *Corvini* tumulari. Epitaphium magni hujus Herois apud *Rattkaium* hoc lego:

*Annò Domini Millesimò quingentesimò quarto,
Oëtobris duodecima die, hora undecima
nocturnali,
Heros ultimos dies Joannes Corvinus clausu
extremos,* *Sub*

(x) *Hist. Ordin. S. Pauli.*

*Sub Eremita corpore ad Claustrum Lupoglava
tumulare iussit.*

*Aspice rem charam, bini hinc inde cingunt
gloriosa Virginis Aram*

*Dux Joannes & filius ejus Christophorus,
quibus adsint gaudia trina.*

*Et sequitur, dum licuit, tua dum viguit
ô Joannes potestas*

*Fraus latuit, pax in Regno isto tui tempore
firma fuit,*

Regum atque honestas.

ANDREAS BOTHUS
FRANCISCUS BALASSA ET MARCUS
MISLENOVICH.

Dalm. Croat. Slav. Bani. 1504.

Missi in Corvini locum *Andreas Bothus & Franciscus Balassa* cognomentô *Gyarmathius* ubi Crisium, urbem juri dicendo Procerumque consiliis conferendis attributam, pervenêre, disparibus Nobilium studiis sunt excepti: & *Andream* quidem æquô admisêre animô; *Franciscum* verò, quòd ferociorem ejus indolem metuerent, quòdque nullam in Illyrico arcem ditionemve haberet, repudiârunt. Intellecta eorum voluntate Uladislaus, revocatô illico *Balassio*, *Marcum Mislenovich Camisati*, nobili

Croat

Croatiae locò, natum *Bothi* Collegam dixit. De utroque nihil admodum memorabile, nisi quòd *Bothus* nondum Banus annò 1495 Uladislauum Laurentio Ujlakio Duci conciliaverit, utque sub conspectum Regium interposita fide publica Quinque-Ecclesias venire posset, impetrarit. Annus dein 1512 utrique fatalis fuit, *Andrea* vi morbi diuturni oppresso; *Marcò* verò, dum equum currentem in orbem circumageret, ejus lapsu luxata cervice repente exanimatò.

PETRUS BERISZLO ET EMERICUS PERENIUS.

Dalmat. Croat. Sclav. Bani. 1513.

Non bene quidam *Petrum* hunc Episcopum Vesprimiensem traditâ jussu Regis Joanni Bornemissa Ærarii Præfecturâ inter Banos ad annum 1512 referunt; vacavit namque ea dignitas annò 1513, ut ex Uladislai *Decreto septimo* constat. Dicendum proin, eum cum *Emerico* annò quidem 1513, at Uladislai Decretò jam editò in Illyricum missum fuisse. Hoc eodem namque anno in campo Dubiczensi, ubi Unna Savo miscetur, Turcas jam Banus adortus insigni adeò fugavit fortitudine, ut cæsis amplius bis mille

le hostium, captis non paucis, plurimis in Savo demersis, pauculis quibusdam natando evadere liceret. Habuit, uti diximus, *Petrus* Collegam *Perénium*; sed hoc postea ad dignitatem Palatini annò ejusdem seculi 1470, aut 1510, elevato solus ad annum usque 1520 rerum potiebatur: quo, dum illatas ab Turcis injurias ulcisci, captumque Tininium, contracta sat valida militum manu recuperare satagit, in itinere apud Caronnam in insidias præcipitatus, Petroque Cruficio invido virtutis suæ æmulo suppetias non ferente obrutus, interfectusque fuit.

Ludovic.
II. Rex.
1516.

Emericus verò *Prénus* Jam Palatinus dum tractatus quidam inter *Uladislaum* Ungariæ, *Sigismundum* Poloniæ Reges, *Maximilianum*que Cæsarem Viennæ cederetur, eidem, quòd Reipublicæ Nobilitatiq; injurius esset, non modò subscribere recusavit, sed vicatim etiam *Posonii* contradixit; Postquam verò *Uladislaus* arcem *Sárosiensem*, *Maximilianus* S. R. I. Principis ac Ducis *Sárosiensis* titulum ei polliciti fuissent, delinitus aliquantum, subscripturum se quidem privato, nuquam tamen publico Palatini nomine respon-

1515.

dit. Sed dum Diplomata expediuntur, ipse è vivorum numero Budæ excedit.

FRANCISCUS BATTYANI ET JO- ANNES KARLOVICH.

Dalmat. Croat. Slav. Bani. 1522.

VAcabat in annum secundum non modicò earum Provinciarum damnò Banatus Illyrici, pérque Pro-Régum absentiam factum est, ut capta ab Turcis Oszterviczensi arce & oppido cladibus maximis vicina circum omnia loca complerentur. His malis opem laturus Ludovicus, *Joanni Karlovichio* è Romano Torquatorum orto genere, *Franciscoque Battyanio* in Uladislai aula cum ipso Ludovico unà enutrito Provincias eas moderandas tuendâsque attribuit, quorum postremo Német-Ujvarinum etiam, Laurentii Ducis jam vitâ functi arcem, donò dedit; utrique verò annus 1525 virtutis probandæ campum aperuit. Usfressus enim Verbofaniæ seu vulgò Hercegovinæ, & Sinanus Monasterii Præfecti Ducésque Turcarum Jaiczam aliquoties improspere tentatam majoribus viribus oppugnaturi, viginti & amplius milia ea expeditione adduxerant. Præerat loco Petrus Keglevich homo strenuus cum

cum Legato suo Blasio Cherio non minoris fortitudinis viro, arcemque, dum auxilia venirent, fortiter propugnabat. Succurrit laborantibus hortatu Regio Christophorus Frangep. Ludovico Regi, cujus jussu ob verberatum Ladislaum Szalkanum Archi-Episcopum Strigoniensem Budæ in manca turri triduò clausus tenebatur, operâ *Battyanii & Karlovichii* conciliatus. Hic, inquam, Frangepanus cum utroque Bano, Joanne item Zrinio, Matthia Barokio Auranae Priore, & nonnullis aliis Illyrici nominis Viris illustribus obsessæ arci subvenit, productoque in diem tertium præliò, Nobilitatis potissimum Croaticæ operâ plenam victoriam reportavit. Incredibilî ea res Regem affecit solatiò, utque Draskovichium Dalmatiæ, Croaticæ, Sclavoniæque Defensoris pulchrâ nomenclaturâ honestaret, permovit. Partam tam nobilem victoriam annò, quem suprà attuli, *Petthò* scribit, *Istvanffius* ad vigesimum quartum rejicere videtur.


Cùm verò annus ageretur supra millesimum quingentesimum sextus & vigesimus clade Mohachienfi toti Ungariæ luctuosa celebris, tercentaque jam Turcorum, ut *Annales nostri* perhibent, mil-

Clades
Mohach.
chi.
1526

lia in Ungaros movisse certis nunciis Ludovicus accepisset, raptim, quos potest, sub signa convocat, nunciósque in Illyricum expedit socia arma petituros. Totam hanc expeditionem cum præter *Dubravium*, *Istvanssium*, *Neugepauerum*, copiosè & dillucidè *Stephanus Brodericus* testis oculatus enarret, nos ea tantum attingemus, quæ Banos nostros spectare videntur. Comparato itaque raptim exercitu, qui quatuor & viginti millium numerum vix excessisse scribitur, universo militi Paulum Tomori Colocensem Archi-Episcopum Ludovicus præficit, statutisque ad Mohachium castris, non expectato Joanne Zapollya, qui cum 40 mill. uti nec Christophoro Frangepano, qui cum *Francisco Battyanio* & 15 millibus adventare nunciabantur, prælium (tanta erat Ungarorum præfidentia hostiúmque contemptus) sed infelicissimum est comissum. Periit ea clade flos primæ secundæque Nobilitatis, ipsèque Ludovicus, dum in adversam ripam Csellye paludis eluctari contendit equo supino corruente, ita ut erat totus etiam caput armatus, in aquæ lutulento gurgite depressus est, & suffocatus annò
ata-

ætatis vigesimô mense secundo, Augusti die nono & vigesimo Decollationi D. Joannis Bapt. sacro.

Divulgata tantæ cladis fama quo sensu universas Provincias compleverit, pronum est cogitare. *Battyanius* certè Illyrico metuens, suo *Karloviçhiique* nomine ad Clementem VII Pont. Max. Thomam Cammanianum Nobili in Sclavonia ortum Genere misit, auxilia ad tuendam potissimùm Jaiczam & Clissiam petiturum: qui licèt ob res ipsius Pontificis in angusto positas nîl præter verba commiserationis plenissima impetaverit, effecit tamen *Battyanii* vigilantia, ut eæ arces commeatu ceterisque necessariis instructæ, quàmquàm non sinè difficultate, servarentur.





SERIES BANORUM

SUB

REGIBUS UNGARIÆ
AUSTRIACIS.

FRANCISCUS BATTYANI,
JOANNES KARLOVICH,
CHRISTOPHORUS FRANGEPAN.

Dalmat. Croat. Slav. Bani. 1526.

Ferdin. I.
Joann. I.
Zapollya
Reges.
1526.



Misso hunc in modum Rege, studia Procerum in diversum abiêre. Pars Joannem Zapollya, pars Ferdinandum I ad solium expetebant. *Franciscus & Joannes* Bani deserto, qui Albæ à plerisque Magnatum Rex salutatus fuerat, Zapollya, Ferdinando cum nonnullis Sclavoniæ Optimatibus adhæsere. Quod ubi Zapollus rescit, *Christophorum Frangepanum* extemplo Illyrici Pro-Regem dixit, isque, ut Ferdinando omni modo infestus Joannes Rex esset, in Austriam & Styriam irrum-

irrumpendum suadebat; at ille mitiora secutus consilia beneficiis potius, quàm terroribus partes suas confirmare augereque malebat. Verùm cùm Ferdinandi trajectò Danubiò partem Regni Zapollio obnoxiam multis oppidis interceptis incurfarent, *Christophorus* quoque *Frangepanus* adscitis in societatem Joannis amicis, ità ut equitum tria, decem peditum millia sub signis numeraret, Ludovicum Pekrium ante alios, à quo se insidiis non procul Velica arce exceptum meminerat, armis petendum censuit, expugnatàsque Rasiniam, Gusterocium, Pecretium, ac Petrovinam ejus arces solo æquavit. 1528.

In *Battyanium* dein & *Karlovichium*, per cujus absentiam annò 1527 Udvinam comitatûs, ut dici mos habet, Corbaviæ arcem *Karlovichio* subjectam Turcæ occupaverant, bellum transferre placuit. Sed *Battyanius*, quamvis exercitum *Frangepanico*, utpote Germanicis auctus copiis, parem haberet; tamen adventantis hujus famâ perculsus transitò Dravò ad Ormosdum in Styria sitû ad ulteriorem fluminis ripam oppidum se recepit. *Frangepanus* intellectâ *Battyanii* fugâ hostem insequi periculosum judicans ad Zamla-

ciam castra reduxit, adhibitisque in consilium militaribus Tribunis Varasdinum obsidere decrevit. Itaque edito profectio- nis signo tormenta promoveri eorum- que Magistros cum peditatu præire jubet, quos ipse mox cum equitatu secutus, in agro suburbano castra locat, suggestusque, in quos tormenta attrahantur, erigi præcipit: verum dum operi invigilat, incautiùsque, quàm summum Ducem oportebat, inambulat, ab præfidiariis Palatini militibus serena luce agnitus, globò è minore tormento missò lethale inter femur & umbilicum vulnus accepit; ne tamen infelici suo casu aliorum pariter caderent animi, suppresso dolore equum poposcit, inque castra reversus, cum vim mali majora in horas singulas incrementa accipere sentiret, convocatos Duces gravi sermone allocutus, iis ac Joanni præcipuè Tahio Ordinis Rhodiorum Equitum Auranæ Priori Regem Joannem ne desererent, commendavit. Ingruente dein nocte effedo impositus cum ad pagum Martinachium perventum esset; magno suorum dolore fuit extinctus. Atque hic erat Viri nobilissimi deque Domo Austriaca Venetò quondam bellò optimè meriti, in quo

ca-

captus, operâ uxoris suæ mirabiliter libertatem recepit, exitus. Cadaver Modrusiam delatum in magna clientum veteranorûmque militum frequentia terræ mandatum fuit; opes verò amplissimæ Ferdinando fratri; improlis enim decesserat, obvenêre.

1528.

Audita æmuli morte *Batlyanius* conventum Crissi indixit, in eoque omnes Illyrici Proceres, si Joannem Banffium & Simonem Zagrabiensem Præsulem demas, Ferdinando Regi conciliavit. Inter hæc dum ferro linguisque certatur in Croatia, Turcæ Jaiczam ignaviâ Stephani Gorbonokii decimo oppugnationis die occupant, nec multò post cum Banyaluca reliquam etiam Bosniam ditioni suæ adjiciunt. Eandem fortem *Karloviçii* Bani, qui in arce Medved gravi annò 1531 pressus ægritudine diem supremum obiit, oppida experta sunt, devoluta in Turcorum potestatem toto *Karloviçii* Comitatu, Corbaviâque Urbe Episcopali primaria subacta. Situs est hic *Karloviçius* in Rhemetensi Patrum Paulinorum Monasterio; qui, cum sinè liberis ultimus Cyriacorum seu *Karloviçiorum* decederet, amplissimum patrimonium Joanni & Nicolao Zriniis sua
ex

ex sorore filiis approbante Ferdinando postrema voluntate legavit. Memores illi accepti beneficii, ut vicem, quam possent, redderent, hos insigni erecto monumento versus incidi fecerunt:

*Sepultus genere Spectabilis, militiâ-
que praditus, Magnificus Dominus TOR-
QUATUS, Comes Corbavia, Regnorûm-
que Dalmatia, Croatia, & Sclavonia Ba-
nus mole sub hac tegitur. Supra stem-
mata verò: Scio, quòd Redemptor meus
vivit &c. Annò M.D.XXXI.*

In insignibus duo Crocodilli lapidem ambiunt, qui pendulo ab ore torque insignes, cygnum cum tribus coronis complectuntur: harum una capiti adhæret, altera collo, tertia pedibus, sub hac tres fluvii stemma absolvunt. Nec te *Torquati* nomen attonitum Lector teneat; re ipsa namque *Karlovichius* hic ex ea Illyrici Nobilitate fuit, quæ non dubiis argumentis genus suum ad MANLIUM Romanum equitem, Torquatum postea dictum refert, cujus MANLII posterì Romanis factionibus impulsì postquam in Croatiam delati nobilem in finibus Dalmatiæ arcem *Karlopagh* vocatam occupassent, *Karlovichiorum* nomen accipere.

At

At *Battyanius* audita Collegæ morte, ut reliquam vitam pacato sibi agere liceret, Præfecturâ Illyrici sponte quidem, magnô tamen eorum Regnorum detrimento, cessit, propterea quòd multos postea annos Pro-Regis dignitas vacaret. Nec plura fere de hoc *Battyanio* apud Historicos; nisi quòd ad annum 1534 inter eos Magnates Hungaros, qui cum Petro Keglevichio postea Bano admittenti sub conspectum Legatum Turcicum Ferdinando longo ad dextram ordine adstiterunt, fuerit, annôque 1540, quo Joannes Rex vivere desiit, repetendæ ejus Ungariæ, quæ Joanni parebat, vehemens auctor extiterit. Palatinatus ipse annô 1554 illum manebat; nisi is senium obtendens Thomæ eam Nadasdio dignitatem cessisset; mortuô tamen postea Nadasdiô, cùm Maximilianus in Regem ungeretur, vacante rursus Palatini sede, Coronam prætulit, quod facere Palatinis aliàs in more. Annus tandem 1566 octogenario proximum, Magistrumque tunc Tavernicorum, ac quatuor Regum consuetudine celebratum tumulo intulit, illustrique Cive Patriam spoliavit.

1563.

PETRUS

PETRUS KEGLEVICH,

ET

THOMAS NADASDI.

Dalmat. Croat. Slav. Bani. 1538.

1536. **H** Abito circa festum S. Elisabeth conventu obtestabantur Ferdinandum Ungariæ Proceres, ne Pro-Regis sociorum Illyrici Regnorum Magistratus, quo Battyanus jam annô 1531 se abdicârat, cum extrema earum Provinciarum perniciæ diutius vacaret. Assensit æquissimo postulato Ferdinandus Rex; Bani tamen incertum quâ causâ *Petrus Keglevich* Jaiczæ olim Præfectus, & *Thomas Nadasdi* annô primûm ejusdem seculi trigesimô octavô sub idem tempus dicti, 1538. quo Turcæ Dubiczensem & Jesenocensem arces subjugârunt. Addidit ea res novis Banis animos, utque eximium & ipsi quidpiam adversum hostem auderent, atque cum Zagrabia ceteras, quæ supererant, arces periculo eximerent, stimulavit. Quare *Nadasdius* sine *Keglevichio* tamen, quem inopinus morbus intra domesticos parietes tenebat, in campum progressus, Jesenocium recepit, soloque æquata arce prædam omnem divisit in militem; tantus hic oppugnantium n

tium nostrorum ardor extitit, ut admotis scalis puncto temporis, commendata ea in re Marci potissimum Tomassovich virtute, propugnaculis miles potiretur. Allectus ea victoriæ dulcedine Illyricus exercitus ultrà progressurus erat, comparatâque Saicarum aliquot seu Nassadarum classiculâ Dubiczam quoq; eo impetu recuperaturus videbatur, nisi repentinus de appropinquante ingenti barbarorum multitudine allatus nuncius consilia omnia disjecisset.

Nec plura fere de his in Banatu gesta; quàm quàm antea bellò clarissimi essent, prudentiâque usu rerum multiplicium comparata authoritatis apud omnes plurimum haberent. *Keglevichii* certè virtutem commendant literæ Ferdinandi Regis annò 1540 (y) datæ, ex quibus patet *Keglevichium* jam tunc solum in Illyrico rerum potitum esse; qui tamen optima initia dispari claudens exitu, ob meditatam ad Turcam defectionem, aliâsque graves causas, quas in *articulo* 43 anni 1542 (z) videre licet in ordinem, cùm jam septuagesimum excessisset annum, redactus, Nicolaum Zrinium successo-

(y) *Rattkai* L. 2. (z) *Corpus Juris Ungarici*.

cessorem invitatus accepit, vitamque reliquam privatus exegit.

Sed ad *Nadasdium*, quem Banatu cessisse *Istvanffius* vult in comitiis Posoniensibus annò 1542 celebratis: *Rattkaius* verò id jam annò 1540 ex literis Ferdinandi ad *Keglevichium* datis factum convincit, redeamus: Patre is Francisco natus, Græcii primùm Styrorum humanioribus, tum Bononiæ Romæque Philosophicis excultus disciplinis variæ eruditioni Italum quoque sermonem adeò feliciter adjunxit, ut dum eo uteretur, natum enutritumque in Latio judicares. Cataphractis dein equitibus Dux datus triplicem Legationem Romam ad Pontificem, Spiram ad Carolum V. Viam ad Ferdinandum obiit, idque meritis est, ut à postremo Fogaras castrum Budensisque arcis Præfecturam annò 1528 acciperet. Parebat tum Ferdinando Buda, sed quæ haud ità multò post in Solimani Viennam oppugnaturi, Joannis Traubingeri, & Christophori Pesserii Germanicorum Præfectorum socordiâ, potestatem venit; illi enim interdum oblatâ immunitate deditio-nem pacti, cum sibi adversaturum *Nadasdium* non vanè metuerent, eo in ergastu-

1529

gastulum conjecto nec quidquam reclama-
 mante arcem hosti prodiderunt : sed pro-
 ditoribus omnibus contra datam fidem
 à barbaro trucidatis, *Nadasdius* è suo
 antro protractus non modò detrimenti
 accepit nihil, sed potius ut strenuus Dux
 à Tyranno collaudatus, præmiisque in su-
 as partes sollicitatus, cum id facere renue-
 ret, humaniter teste *Jovio* dimissus fuit.
 Varius tamen hoc in loco Scriptorum
 sensus : *Gregorius Petthó* Joanni Regi do-
 nò datum asserit; *Istvanffius* verò rem
 multò aliter recenset; cujus tamen nar-
 rationem *Timon* (a) inter fabulas repo-
 nit. Ait quippe *Istvanffius* *Nadasdium*
 ergastulò eductum, atque ab Ibraimo
 aspere objurgatum esse; tum certis Chau-
 siis (Legatos ea vox notat) ac Janitsaris
 traditum, à quibus deduceretur ad Da-
 nubium, quasi Joanni Regi dedendus fo-
 ret; re autem vera in flumen præceps
 agendus. Quare *Nadasdius* observatò
 capitis proprii periculò in scapham re-
 pentè insiluit, Turcisque se retinere vo-
 lentibus chlamidem dimisit, ac demum
 grandi nisu cum aquis luctatus sub vespere
 in adversam ripam, in qua Joannes
 Rex castra habebat, incolumis quidem,

H

agre

(a) *Synop. Nov. Chron. part. 3.*

ægre tamen evasit. Suspecta hæc, uti innui, *Timonio* est narratio, quam etsi ex parte ità accidisse non neget, dissimulantibus tamen, minimèque invitis, utpote quibus ad manum scaphæ erant, Turcis eum elapsum fuisse scribit.

1529. Dissidentibus his duobus Scriptoribus, utri voles Lector, assentiare ego id certum habeo *Nadasdium* ad Joannem abductum, an casu delatum, ejus partes aliquamdiu ità secutum esse, ut Ferdinandum animò desereret nunquam, simul tamen, cùm res posceret, Joanni fidem ad annum usque 1533 probaret: quare annò 1530 Valentinum Török, qui recens ad Germanum defecerat, jussu Joannis in arce Szigethana obsedit, quem quin caperet, Ferdinandus ad motorepente Budensi urbi exercitu effecit; consternatus quippe inopinatò periculò Joannes suos à Szigetho revocat, Budámque, si per hostem liceat, ingredi mandat. Accurrit illico *Nadasdus*, elusisque insidiis omnibus in arcem eluctatur, ex qua non multò post erumpens obviam fortè Balthasari Banffio de Thalocz factus, hastis eo eventu concurrir, ut fractò uterque in umbone telò parem victoriam reportaret.

Ve-

Verum *Nadasdius*, cùm res Joannis in dies pejus habere cerneret, Ludovicique; præterea Gritti Gubernatoris crudelitatem metueret, consilium iniit Ursulæ Ladislai Kanisai filiæ in uxorem ducendæ, impetratæque discedendi veniâ nunquam rediturus abiit, Ferdinandi rursùm partes secutus. Nec defuit fidei præmium: nam & Banus Illyrici annò 1538 creatus est, & eo resignato, Judicum Curix adscriptus syllabo, in utroque sic versatus fuit, ut non tam accepisse ab iis dignitatibus ornamentum, sed contulisse videatur. Quindecim gerens prælia urbes partim tuitus est, partim cinxit: utrobique Ottomanum cladibus atterens, Pestanam, Jaurinensem, Lippensémque victoriam sua virtute annalibus reddidit digniorem. Ad Lippam certè segniorem intuitus militem, ut ignavis animos adderet, raptò è signiferi manibus vexillò alacer procurrit ipse ante ceteros, perque semiruta provolans mænia illud in hostili muro defixit. Atque his factis ille promeritus est, ut Palatini dignitate, qua infra Regiam nîl majus habet Ungaria, invitus licèt ornaretur. Elatus autem est vir illustris unico hærede Francisco relicto in castro Egervár anni 1562

1554.

secundo Junii, natus annos 64, quos, ut præclare rursus *Scriptor Tyrnav. Judic. Cur. Non tam vixit, quam vivendo decoravit.* Tumulo elogium Ursula, quam annò 1536 in thori sociam accepisse putatur, Conjux lectissima insculpsit.

Illustriss. D. THOMÆ NADASDIO, summò ingenio, singulari virtute, complurium linguarum peritissimo, pace belloque clarissimo, in Italia optimarum artium studiis imbutò, indèque cum Cardin. Cajetano Budam reversò, Regi Hungaria Ludovico à Secretis, ac post ejus fata varia vicissitudine actò. Primò auspiciis melioribus Budensi Præfèto, mox urbe Buda militum inconstantia Turcis dedita, Solymani potentia in Joannis Regis arbitrium redactò, iterum patria restituto. Sacratissimi, & potentissimi Rom. Hun. Boh. Slav. Dalm. Croat. Regis ac Imper. Ferdinandi I. Consiliar. primùm Tavern. Reg. Magist. mox Dalm. Slav. & Croat. Bano. Deinde Judici Curia, statim supremo Generali Capitaneo, postremò Palatino regni, ac Pro-Regi optimo, fidelissimo, consilio armisque Turcarum profligatori, patria illustratori Conjux amantissima.

U. C. M. P. P.

NICO- 4

NICOLAUS COMES à ZRINIO.

Dalm. Croat. & Slav. Banus. 1542.

Z*Rinius* (b) in locum Keglevichii, cui imperium abrogatum meminimus, succedens, fide præprimis in Ferdinandum Regem se fecit commendandum; nam ei adversus Zapollium adhærescens turbantibus in Sclavonia hostibus strenuè se cum Petro Keglevichio opposuit, Kaczianerumque exercitûs Ferdinandi in Illyrico Ducem, sed ob rem ejus culpâ malè gestam in custodiam Viennæ conjectum, indèque elabentem in arce Kosztanicza cæpit, jussûque ejusdem Ferdinandi teste *Gregorio Petthô*, usus ad id operâ duorum famulorum suorum Georgii Grabusa, & Joannis Hoylich interfecit. Ferunt alii Kaczianerum hunc 1539. datis ad Mehemetem literis defectionem ad Turcos molitum esse: qui cùm in sceleris societatem *Nicolaum* quoque pelleret, hicque simulatè id se facturum polliceretur, mox remotis mensis nefarium suasorem interfectum. Sublatô è vivis Kaczianerô, Kosztanicza paulò an-

H 3

tè

(b) *Hæc familia olim Subich dicta, postea ab arce Zrin cognomen accepit.*

tè Prioratui Auranæ obnoxia, *Zrinio* in præmium rei bene actæ cessit.

Annis verò post hoc duobus, cùm, non levibus de tuendis limitibus controversiis inter Simonem Erdödi Episc. Zagrabiensem, & Joannem *Zrinium* ortis, Joannes Vindolam Simonis arcem obsidens missa temerè glande plumbea interfectus fuisset, vindicaturus mortem fratris *Nicolaus* ampliores copias comparârat: verùm Ferdinandus utrumque gravi cōminatione ab armis discedere jubens, causam eam Francisco Josephico Segniensum Episcopo, Georgio Frangepano Szlunii Comiti, Balthasari Banffio, Stephano Gylaio, & Michaëli Ruvenio Prætori Sclavoniæ cognoscendam dedit. Atque sic *Zrinius* à civili sanguine fundendo manum retrahens, ferrum, quod in Simonem stringere non potuit, gloriofius acuit in hostem; accessit enim cum 400 equitibus Croatis Ferdinandi exercitui, dùmque Pestum inter leviora prælia obsidetur, ad victoriam vice quadam relatum plurimum, authore *Rattkai*o, momenti attulit. Evenit id eodem anno, 1542. quo *Zrinium* trium Regnorum Præfecturâ legimus insignitum.

Glo-

Gloriosior annus insequens fuit, quo, 1543. post devictum à Solymano Strigonium, Tartari Jaurinensem, & Albensem agros populatum missi adeò à *Nicolao*, opportunè tunc ad Jaurinum excubante, uti & à Nicolao Kadovichio, duobus Bartholomæis Horvathis, Emerico Verbőczio, Andrea Bathorio, Paulóque Ratkaio Papensi Præfecto repressi fuerunt, ut tria eorum & ampliùs millia hastis partim, & gladiis cæsa, partim in cænosum lacum impulsa cum captivis, ceteraque præda vitam amiserint. Partam ea re præclare gesta gloriam obfuscare non nihil visus est annus 1545, quo Ulamanes Bosnensis Bassa in Sclavoniam irrumpens, occurrentem sibi cum Bildensteinero (*Istvanffius* Bildensteinium vocat) Styriæ, & Carinthiæ copiarum Ductore, *Zrinium* in ea Varasdinensis Provinciæ regione, quæ inter montes sita Szomszéd-váram usque protenditur, Zagoriâque nuncupatur, sic fudit, ut magnam equorum, quos nostri in sylvas se condentes reliquerant, minorem hominum cladem pateremur. Bildensteinerus ipse haud procul ab extremo aberat discrimine; hostem enim evasurus postquam in arcis Konschinensis præaltam fossam aquis

stagnantem se injectisset, præfocandus ibidem miserè fuerat, nisi Stephanus Balevich nandi peritus, Ducisque misertus, eum prehensâ barbâ (tonsus namque comam erat) eripuisset. E Turcis desideratus est Demirhamus cognomentô Spanakovich insignis alæ Kamengradianæ Præfectus : hic sub primum mutuum conspectum hostium hastis cum Stephano Segovich *Zrinii* stabuli Præfecto concurrerat, incertum cujus manu in acie posita trucidatus. Nostrorum, uti memini, non magna cædes facta, majus id infortunium, quodd occupato eadem pro cursione ab Turca monte Claudio seu Monoslone accepimus.

1546. Nec cum barbaro duntaxat hoste *Zrinio* pugnandum fuit; obsidere namque jussu Regio coactus Petrum Keglevich quondam Banum in arce Chak-Tornensî, quam contra jus fâsque suam Petrus fecerat, eundem devicit, retractumque à fuga Viennam Ferdinando misit; quem tamen postea Rex vix anni spatiô detentum libertati, bonisque restituit. A Turca ad annum usque 1553 otium *Zrinio*
1553. fuit, hoc rursus idem Ulamanes Sclavoniam infestans cladem annô 1545 datam, cumulatè in eadem Varasdinensi Provincia

cia à *Zrinio* & Luka Székeli Styriæ copiarum Præfecto, cujus posterì mutato Ungarico cognomine, Gisielios se vocârunt, duobus exercitibus conclusus recepit. Nec tamen multùm consternatus ea strage Ulamanes, quin ob amissum eadem pugna Giaferrem filiũ, atq; à Joanne Margitio natione Rascio oblongo, quem equitibus Ungaris & Croatis ex ephipio pendulum gestare in more fuit, ense sub ilia confossum, majoribus furiis agitatus, Chasnam, Verucziam, Dombronem expugnavit: adjecerat postea ad Crupam quoque Kosztaniczámque animum Malcus Ullamanis nuper vitâ functi successor, iisque potitus fuisset haud dubiè, nisi novò eas arces præsiðiò *Zrinius* munivisset.

At, quàm peritus non tuendorum modò, sed impugnandorum etiam locorum esset, annò à Christo nato 1556 ad Babocsam luculenter ostendit. Obsidebat tum Szigethum Aly Bassa, quem nostri ut inde averterent, jubente Thoma Nadasdio Palatino Babocsam Turcico plenam milite obsederunt, eoque jam processerat oppugnatio, ut Acomates loci Præfectus nostros ab irruptione ingressúque arceri posse desperaret, quare

H 5

Aly

Aly Bassam per celeres nuncios certiore periculi facit, utque laboranti arcis opem ferat, precatur. Accurrit is relictò Szigethò, primasque suas copias die Divæ Magdalenæ sacro sub nostrum conspectum dedit. Occurrere illico venienti barbaro *Zrinius* Joannésque Lenkovichius Styrorum Ductor, duravitque certamen, donec ipse Aly inclinato jam die ad Rinniam amnem veniret, cui explicatò Regni vexillò Palatinus obviam processit quidem, sed præliò, quia serum diei erat, abstinuit. Ut verò illuxit, primus iterum *Zrinius*, & Lenkovichius cum hoste manus, sed dubiâ victoriâ contulerunt; effusæ tamen postea fugæ se dedere Turcæ, postquam Ungari, Germanique mutuo se se adhortati, novis in eos animis impetum fecissent. Ex Ducibus primas tulere *Zrinius*, & Joannes Ruberus, plenæque jam victoria videbatur, cum ecce Turcæ adhortante Acomate arma resumunt: instauratur certamen atrox, nostrique primum consternati pedem nonnihil referunt, sed suis rursus redditi ordinibus ter in fugam coniecto hoste victoriâ, licet non incruentâ, potiuntur. Occubuere è Germanis 270, Ungari 40, inter quos Jacobus Nadasdi-

us Palatini frater diversa matre natus, interfecti, Turcæ plurium licet Satraparum jacturam passi, quasi nihil mali accepissent, ad obsidendum Szigethum Christianorum capita contis præfixa, ostentantes revertuntur; nec remissior nostrorum in capienda Babocsa conatus; potitque ea fuissent haud dubiè, nisi eorum, queis procurandi pulveris pyrii cura commissa erat, negligentia pedem referre coëgisset. Celebravit tamen virtutem *Zrinii* Ferdinandus Rex, variisque donis excoluit.

Ad prosequendum verò bellum idem 1556.
Ferdinandus filium Ferdinandum Pragâ evocat, novoque exercitui præficit: qui adolescentiâ fervens, indecorumque arbitratus, si ea expeditione nihil se dignum ageret, Koroethnam ad flumen Cinnanum sitam obsidere statuit. Lenkovich Sclavonico peditatui, alii legionibus aliis, *Zrinius* Imperatoria potestate cunctis agminibus jura dicebat. Magnanimi Duces omnes, strenuique milites ingentibus animis munitionem aggressi oppidum primum, mox arcem cæperunt, sexcentis, quos ibi repererant Turcis, licet deditionem offerrent, trucidatis: periêre ipso assultu 10 Ungari, Germani

20. Atque licèt singularis omnium fervor fuerit, primas tamen sibi vendicant duo illi Heroës, qui ante ceteros conscensis scalis murum superârunt. Horum unus Stephanus Tompa Zrinianæ equestris alæ Signifer fuit, alter Petrus Patatich clarus Eques, postea annò 1566 cum *Zrinio* in Szigethi propugnatione gloriôsè occumbens: è cuius nobilissima stirpe hodie, dum ista scribimus, annò nimirum 1737. Excellentissimum GABRIELEM PATATICH Colocensi mitrâ fulgentem, Illustrissimum verò ejusdem Germanum ALEXANDRUM Com. PATATICH primùm Viennæ Cancellariæ Ungariæ Consiliarium læti intuemur.

Eodem, quo hæc gesta sunt, anno *Zrinius* simul etiam Auranæ Gubernator Banatûs munere se abdicat, in cujus locum priusquam Petrus Erdôdius sufficeretur, Turcæ Kosztaniczam ex improvîso subegerunt. Fuêre repentino eo casu multi Christianorum capti, de quibus redimendis inter *Zrinium* & Aly Bosnensem Bassam dum agitur, adèò implacabilis inter utrumque Ducem discordia exarsit, ut eam singulari certamine dirimendam *Zrinius* judicaret, fecissetque cogitata haud dubiè, nisi Aly devitatâ

tatâ pugnâ Byzantium; *Zrinius* verò à Ferdinando Magister Tavernicorum pro perduelli Gabriele Perenio in Comitibus dictus, Posonium abiisset. 1557.

Positâ quamvis Illyrici Præfecturâ *Zrinius* amantissimum se tamen Patriæ civem semper probavit. Annô certè 1562 Jahioglionis Bosnæ Præfecti copias, dum nova ad Montem Claudium munitio nostrorum incursiones prohibitura erigeretur, excubantes adscitò in bellâ societatem Franciscò Tahiò & Wolffgangò Pernesziò Babocsæ jam Regiæ Præfectò ad internecionem cecidit. Sed ne longior sum, cetera præclari Herois facinora prætereo; unam tamen Szigethi defensionem, quin breviter attexam, imperare mihi non possum. Obsederat Solymanus Szigethum, quod *Zrinius* prisca virtute Ungaris, Illyrisque propria, cum bis mille quingentisque bellatorum adversum barbarorum eam multitudinem, quæ toti Europæ sub jugum mittendæ suffectura putabatur, propugnabat; verum post amissas cruentissimis certaminibus tres exteriores munitiones, injectumque in interiorem arcem ignem, quem restingui vehementia venti prohibebat, cum nihil superesse jam spei vide-

videret Dux fortissimus, splendidam vestem pro thorace, galerum gemmis ornatum, aureas indutus armillas, centumque aureis in præmium victori futuris, marsupio cum arcis clavibus ingestis, paternum sumpsit gladium, cohortatusque ad agonem reliquos, qui tercenti fere supererant, militum, noménq; Jesu invocans in confertos hostes irruit, multisque neci datis VII Idûs Septemb. victima Patriæ cecidit annos natus 58. Corpus Herois immortalitate dignissimi à quodam Turco equitum Ductore, *Zrinni* quondam captivo tumultuariô est sepulchrô compositum, caput verò quod præcisum spectaculo aliquamdiu fuit, ad Mustapham Budæ Præfectum, atque ab eo ad Regem Ferdinandum, aut Salmensem Ducem missum, tum denique sanguine junctis allatum in monumento Conjugis prioris, Frangepani Ferdinandi filiæ honorifica hac addita epigrapha humatum fuit:

Illust. Comiti NICOLAO ZRINIO, Torquati ex sorore nepoti, à Carolo quinto post Viennam obsidione solutam, quòd in ea adolescens adhuc & tyro multa, & præclara confecisset, equo, auròque donato: ad Budam & Pesthum pulchra per fac-
cine

*cinora summa cum laude probato: Croatia, Sclavonia, & Dalmatia Bano, Tavernicorúmque Regalium in Pannonia Magisteriò summa cum prudentia functo: copiis Caesaris ad dextram Danubii latus à Ferdinando primo, Maximiliano secundo Imperatoribus praefecto: victis, sapissimè fugatis, casisque hostibus: infau-
stissima postremùm funestissimáque Szigethi expugnatione, cujus arcem contra innumerabilem Solymani Turcarum Principis exercitum facta eorum ingenti, & memorabili strage diutius, quàm viribus par fuerat, defendit, defunctò ibidem Solymanò, totius orbis flagellò, pulcherrimè absumpto, bellica gloria fortissimo, invictissimóque Duci, de se publicéque B. M. P. P.*

Occubuère cum eo comilitones omnes, præter quatuor, quos inter Gaspar Alapy postea Illyrici Banus. E Turcis verò tota obsidione cecidisse feruntur quinque supra vicena aut triginta millia virorum lectissimorum cum pluribus Ducibus & Præfectis. Ipse Solymanus tertio ante expugnatam arcem die in suo tentorio annò ætatis septuagesimò, Principatùs sextò & quadragesimò incertum quo genere morbi; variant enim Scrip-
ptorum

ptorum sententiæ, est consumptus. Tanti nempe fuit vinci *Zrinium*, quem ipsa morte gloriôsè obita boni Superi immortalem voluêre.

PETRUS ERDÔDI.

Dalm. Croat. & Slav. Banus. 1557.

UBi Croatiae calamitas, Kosztaniczæque, Prioratûs Auranzæ arcis sinistra fortuna Ferdinando nunciata sunt, majoribus ille, quæ ventura metuebantur, occursurus damnis, Illyrici Præfectum *Petrum Erdôdium* jussit, unicum fere, cui tutò labantes illæ Provinciæ inniterentur, Atlantem. Fuit *Petrus* hujus nominis Erdôdios inter tertius, Petri pariter, sed ejus filius, qui annô 1543 cum Barbara Puchamia lectissima Conjuge Venetias, vitam reliquam pacatè transacturus, migravit. Apertius discessionis hujus causam reddit *Rattkaius*, (c) dum asserit, eum à filio suo, hoc nostro Bano, vulsâ per contumeliam consputâque barbâ, in faciem cæsum, ac propterea iratum, ablatis secum thesauris Venetias, diris devotô filiô, demi-grâsse. Nec inultus maledictionem Patris sensit; duos namque ipsos annos non nisi cruentam semper Sacri CORPORIS

(c) *Libro 4.*

CHRI-

CHRISTI HOSTIAM, dum illa sublata populo ostenderetur, potuit intueri: quod etsi fors à vero alienum non sit, eluit tamen Laureti sinceris lacrymis culpam, Patrique reconciliatus, unum hoc perperam factum, multis egregiis aliis compensavit.

Militaris virtutis specimen ut ederet, annò 1547 Ferdinandum I. ad bellum secutus Saxonicum, peculiarem equitum alam duxit, fuitq; pars non minima relatæ de Saxone victoriæ: quare dum Ferdinandus, Pragam Ungarorum virtute domitam rediens, equitatûs Ungarici Præfectos singulos singulis torquibus aureis donaret, Francisco Nyario Ungarorum ea expeditione Duci, & *Petro Erdódio* singulares verbis etiam gratias habuit. Interea Heroëm hunc Patria quoque sibi poposcit, atque Illyricum cumprimis, quod cum annò 1553 altera jam incurssione Ullamanes infestâset, arcemque Veröczensem cum Præpositura Chaszmeni coëpisset, iisdamnis excitus *Petrus* cum Georgio Comite Szlunio Gradiskam & Velikam (Latinis Magnam Regiam) arces Croatiae, sed Turcis parentes, cum latè diffusis earum suburbiis non expectata aggressione invasit, & diripuit.

Maximi-
lianus.
Rex.
1564.

Amplius aliquid ausus est jam Banus factus. Nam cum annô 1565 Mustaphas cognomine Szokolovichius captâ Crupâ prosperis successibus elatus ad eam, quæ Crisium inter Capronczâmque protenditur, regionem vastandam animum adiecisset, *Petrus* quoque *Erdôdinus* nuper ab articulari morbo consanatus, eodem hosti nocendi animo Savum cum 1500 equitibus & aliqua peditum parte trajecit. Animadverterant præcursores Mustaphæ nostrorum adventum; sed quia *Erdôdinus* dolô usus, sequi pedites, equorûmque vestigia conterere præceperat, illi in fraudem inducti, sat magnum quidem peditum numerum habere Christianos, ab equitatu tamen inermes esse Duci suo retulerunt: atque ea causâ fuit, ut Mustaphas, contemptis Bani copiis oscitanter rem gerens, summa à nostris celeritate obrueretur. Consternati quippe Turcæ, qui ad 27 mill. authore *Petshô* fuisse perhibentur, quidque inopinato eo casu agerent, incerti, equos tum primum frænare, & arma expedire inceperant: acrius tamen certamen cum iis fuit, qui obitis excubiis parati, atque aut ignium fragoribus, aut pereuntium ululatibus excitati, advenerant. Numerum

rum cæſorum reticet *Iſtvanf. Bizarus* ad ter mille fuiſſe exiſtimat: capti non niſi 128. Muſtaphas ipſe cum nonnullis aliis pernici caballo ſylvarúmque latibulis ſalutem ſuam debuit. Fuère eo prælio commilitones *Erdödi*: Joannes Gyulai, Matthæus, & Simon Keglevichii, Joannes Alapy, Joannes Geſzth, & Marcus Thomaffovich. Præda ingens equorum præcipuè, ac ipſius Muſtaphæ 12 ſarcinæ ſeſſum militem non parùm recreavit.

Quievit accepta ea clade Muſtaphas, diùque ſe intra limites tenuit contuſa ferocia; verùm Solymanus ob negatum in alterum jam annum à Maximiliano vectigal mirùm quàm exardeſcens, bellum Ungariæ annò 1566 indixit, formidandisque inſtructus copiis caſtra Conſtantinopoli movens, Regem, ne quid detrimenti Reſpublica acciperet, ſollicitum fecit: quare is conſiliis conſilia, arma armis oppoſiturus, ut Illyrico quoque proſpiceret, Carolum Archi-Ducem, celebris in Croatia Carloſtadii an. 1579 authorem, in inſula Dravum inter & Savum poſita excubare præcepit. Fuère in caſtris Caroli *Petrus Erdödus*, & Franciſcus Szlunius è Frangepanibus, *Erdö-*

dii in Banatu successor. Verùm ubi Szigethi amissi fama percrebuit, Illyrica pariter castra, quia per obitum Solymani magno metu liberata fuit Pannonia, dissoluta fuere, *Erdödiusque* à nuptiis, quibus filiam suam Stephano Dersffio junxerat, ex Ungaria in Sclavoniam redux immaturo fato concessit, relictis hæredibus Thomâ, Petrô, & Annâ. Ejus corpus Jazkæ, oppido ditionis suæ, in Æde D. Nicolai conditum quiescit.

FRANCISCUS SZLUNIUS

E T

GEORGIUS DRASKOVICH.

Dalmat. Croat. & Sclav. Bani. 1566.

ANno eodem, quo Erdödius in vivis esse desiit, Præfecturam ejus locò suscepit *Szlunius*, meritò ab *Istvanf.* Ensis & Clypeus Illyrici dictus. Nonnulla de summo viro sparsim memoravimus; vel unum illud commendationis in se habet plurimum, quòd, cum fortè in arce sua Gore hilarius ageret, accurreretque inopinatus nuncius, hostem adesse significans, relictis mensis adedò fortiter in populantem irruerit barbarum, ut ternò congressus præliò, ter victor maxima hostium strage edita nemine suorum desiderato

rato duplicem uno facto lauream, campe-
 pestrem scilicet & civilem sit promeritus.
 Ad quem porro annum victoriam hanc
 referam, non habeo, nisi quòd *Surius* ad
 annum 1571 scribens, 'Turcas Illyricum
 infestantes à Bano & auxiliariis passim
 fusos ac trucidatos esse memoret. Nobile
 certè hoc facinus hostes ipsi militari car-
 mine celebrârunt. Et fuit *Szlunii* vir-
 tus uti nota charâque nostris, ità Tur-
 cis formidabilis: qui cū à Georgio Thurio
 in Ungaria, à *Szlunio* in Illyrico magnam
 persæpe cladem acciperent, id Selymi ipsi-
 us jussu omni contentione satagebant, ut
 utrumque dolò interciperent, aut, si oc-
 cultis artibus minus proficerent, aperta
 vi peremptum irent. Sed en, quem ho-
 stium fraudes telâque non potuère, eum
 chirurgi imperitia, annò, ut *Zagrabiensis*
inscriptio perhibet, 1572, die 2. De-
 cembris mori coëgit. Cum enim Nic-
 kelspurgam Moravorum, ducendæ in
 Conjugem Judithæ, filiæ Kerechenii,
 causâ proficiscitur, Varasдини in morbum
 incidit, enatisque circa aures furunculis,
 dum medicus incidisset vulnus, oleúm-
 que scorpionum instillâisset, tumefactum
 caput, oculique cum faucibus turgentes
 omnem respirandi vivendique facul-

tatem, dum annum ageret ætatis sextum & trigésimum, ademerunt. Elatus magno militum luctu, inque Divi Stephani Zagrabiensi Æde conditus, secum unâ eam Frangepanam stirpem, quæ ab Szlunio oppido nomen acceperat, tumulo intulit.

Habuerat quidem *Szlunius* Collegam *Georgium Draskovichium* mundo datum annô 1515, itâ tamen, ut *Szlunio* fere soli arma tractanda incumberent; quem dum tumulto inferri videt plebs rustica, omnem cum eo militarem disciplinam concidisse rata, ut est novarum rerum semper vulgus appetens, correptis armis jugum servitutemq; à cervicibus ut rejiceret, turbas moliri capit. Confluxêre sub signa numerosi, dictôque sibi R. Matthia quodam Gubecio infestis omnia armis percurfabant. Admonitus vicinô periculô *Draskovichius*, illico cum expedita manu Casparem Alapium cum Matthæo Keglevichio submittit, qui prementes agrestium vestigia, eos ad Stubiczam deprehensos comico ipso Rege intercepto fugaverunt: Zagrabiam is pertractus, ibique ferreâ, eaque ignitâ coronâ caput redimitus, demum forcipibus dilaniatus, ad extremum verò quadrifariam divisus simula-
ti re-

ti regni non simulatas pœnas dedit. Rem gestam annò 1575 scribit *Rattkay. Gregorius Petthó*, & cum eo *Timon (d)* ad 1573 refert.

Post hæc, cùm *Draskovichium* varia negotia in diversum distraherent, neque is omnibus commodum à se satis fieri posse cerneret, Collegam à Rege *Casparem Alapy*, virum alioquin impigrum, nisi quòd direptæ nuper à Turcis Canisæ ipse reus diceretur, impetravit. Traditâ is Georgio Comiti Zrinio Canisæ Præfecturâ in Illyricum advolavit continuò, bellumque rusticum præter opinionem omnium citius composuit. Injurius *Caspari* huic videtur *Istvanf.* qui eum ad Canisæ Præfecturam nihil præter natalium splendorem attulisse scribit; virum tamen fortem fuisse, & suscepta adversum tumultuantem plebem expeditio, & annus 1566 ostendit. Præfecerat Solymanus Bosniæ Mehemetem, qui cum lassus de via (urbe enim Constantinopolitana in Bosniam ibat) ad Siklofinum noctem unam consedisset, accidit fortè, ut Zrinius Szigethi Præfectus seu speculandi hostis, seu fortunæ tentandæ causâ *Casparem Alapum* cum *Wolffgan-*

Caspar
Alapy
Collega
Drasko-
vichii.
1573.

go Paprotovich attributis mille peditibus & aliquo equitum numero Szigethô emitteret. Illi postero die sub primam auroram in hostem fortuitò delati, semisopitosque barbaros aggressi, alios in fugam verterunt, vulnerârunt alios, plurimos interfecerunt: Mehemetes ipso amissâ prius dextrâ occubuit; filius verò cum quibusdam insignioribus captus Szigethumque abductus in prædam cessit, aut, ut *Istvanf.* vult: in fossa aquis repleta multis glandibus sclopetariorum petitus interit.

Fuit *Alapy* staturâ pusillus, vultu deformis, vitiatôque corpore; sed quæ res homini eodem 1566 anno salutis fuit. Expugnatô quippe Szigethô, cum in potestatem venisset hostium, pro gregario milite habitus, deque lytro 500 florenorum pactus, qua potuit celeritate maxima, se in Camianam ditionis suæ arcem recepit. Unde postea pretium libertatis per quemdam captivum Turcam mittens, *gratulari se plurimum, nunciavit, quod cum pinguem tenuissent manibus caponem, cum deplumare nescivissent: 500 hos florenos pensuros sibi adhuc Turcas favente Numine.*

At

At virtutes meritâque *Draskovichii*, Rudolphus
Præsidentem Tridentina etiam nomine Un- phus
gariæ Regis Legatione clarum altius an- Rex.
nô 1578 provexêre; ex Zagrabienſi nam- 1576.
que ad Jaurinenſem translatus Episcopatu-
tum, electus Archi-Episcopus Coloczen-
ſis ab Rudolpho dictus eſt, ſimulque
Chriſtophorum Ungnadium in Pro-Re-
gis Illyrici Præſectura ſucceſſorem acce-
pit. *Alapius* pariter officiô ſe ſe abdicat,
ſextoq; ab reſignatione annô 4to Ka-
lend. April. vivis ereptus in Rhemeten- 1584.
ſi Divæ Virginis Æde ſuſpenſo ad ſepul-
chrum rubeo Banali vexillo tumultatur.

Plura ſibi depoſcerent *Draskovichii*
merita, ſi nobis per tempus aliâſque cau-
ſas longioribus eſſe liceret. Mortuus eſt
vir ex vero Illuſtris annô 1588 pridie Kal.
Febr. Poſonii, (e) cum ad iter Romanum,
Cardinalitium accepturus Galerum, ſe
compararet. Reſectum corpus Jaurinum,
inque Eccleſia Cathedrali communi Ca-
tholicorum luctu terræ mandatum fuit.
Eidem *Gregorius Petthô* breve quidem,
ſed inſigne texuit elogium, quod ex Un-
garico ſic reddimus: *Georgius Drasko-
vich fuit vir timens Deum, probus, ſpe-
ctabilis, Sanctus Dominus, idemque Car-*

I 5

dina.

(e) *Purpura Pann.*

*dinalis, Colocensis Archi-Episcopus, Jan-
rinensis Episcopus, Ungaria Locumtenens-*

CHRISTOPHORUS UNGNADIUS.

Dal. Croat. & Slav. Banus. 1578.

C*hristophorus Ungnadius*, nescio, an ex Agriensi Præfectura, cui annò 1575 præerat, jubentéque Rege ducentos ex eadem arce equites, ac totidem pedites Bekeffio adversùs Stephanum Bathorium Transylvaniæ Principem auxiliò futuros, an. eodé miserat, moderando Illyrico adhibitus, primo statim Banatùs tempore ad Carolum Archi-Ducem, Rudolphi voluntate Illyricum Regia potestate gubernantem, non exiguò numerò instructam armis nobilitatem attulit; conscribebat quippe militem Carolus eo animo, ut loca, anno superiore à Ferrhate Bassa intercepta, hosti extorqueret. Erat iter exercitui asperum, quo tamen magnâ Ducum industriâ operarúmque labore complanato, Businum primùm ventum est, locúsque, quòd ab exigua Turcarum manu teneretur, receptus. Eadem celeritate Czaſnium, Zrinium, aliæque cis Unnam arces dilabentibus metu hostibus in nostrorum potestatem rediêre. Ferrhates semel duntaxat in nostrorum
se

se conspectum dedit, initoque certamine non magna utrinque clade edita à pugna est cessatum. E nostris quidem Nicolaus Bradachi nobili genere ortus adolescens, dum interfecti Turcæ cada-ver armis & pelle tygridis spoliatur, grave in capite, ut erat sine galea, vulnus accepit, eoque in vestigio occubuit. Expeditionis verò universæ is fuit exitus, ut redeuntibus nostris eadem rursum loca ab hoste caperentur. Redditus domui *Ungnadius* jam antè inchoatam cum Grubariana vidua litem de restituendo sibi Zamoborino prosecutus est, cumque nil verbis proficeret, armis rem agere decrevit, admotisque machinis, cum arce animum quoque fœminæ expugnavit. Atque hæc de *Ungnadio*, qui an morte, num libera voluntate Thomæ Erdődio Genero suo Banatum annò 1584 resignaverit, non constat.

THOMAS ERDÖDI

Dalm. Croat. & Slav. Banus. 1584.

Fuit *Thomas* Petri Bani filius, cujus facta etsi paginas complures poscerent, nos tamen excellentiora duntaxat adducemus. Inito Magistratu nihil antiquius habuit *Thomas*, ac ut loca ab
hoste

1584. hoste capta reciperet, aut certè ne plura subjugarentur, prohiberet: eodem proin anno arcem Kristaloczensem dedicatione cæpit, cæso præsidio omni, ipsaque arce, quia defectu militis servari non poterat, solo æquata. Cum verò Ferrhatis Bosnæ Præfecti jussu Turcarum Duces ejusdem anni autumnò in Carnos Labacum usque irrupissent, domum jam cum spoliis reduces non magna suorum manu ad Szlunium sic aggressus est, ut versis primo impetu in fugam prædatoribus, mille sexcentos captivos duræ servituti exemerit, prædàmque omnem recuperârit. Interfectorum eâ pugná hostium ingens numerus fuit, cum nostri duos trêsvè plumbeis ictos glandibus perdidissent; signa militaria decem adepta, ac Carolo Cæsaris fratri Græcium missa, luculentum relatæ victoriæ fuêre testimonium.

1585. Nec quievit hic *Erdôdius*, sed anno insequente Kosztaniczam irrumpens, flammis injectis cremavit, & licèt redeuntem cum spoliis instans à tergo lateribusque circumcursaret hostis, suum tamen militem summa dexteritate trans Unnam ponte trajecit incolumem. Vix dum circumactò annò prædas agentem
Aly

Aly Bassam, adscitis iis, quibus tuendorum limitum cura demandata, ad Ivanicium 10 Decembris die cæcidit, ipso 1586.
 Aly capite proprio temeritatem luente. Quieverat his cladibus acceptis Turcus, ferrumque, quod infauste strinxerat, intra vaginam ad annum 1591 continuit. Tum verò rursus Hasanes à Sinano Purpuratorum quarto in Christianos sollicitatus tumultuari cæpit, miscebátque jam intra Crisium Ivaniciumque cladibus omnia, ultrà circumlaturus perniciem, nisi accrescentes autumnii pluviis Glogovtius & Lonius amnes negato ulteriore aditu, ardentem in prædas Bassæ animum restinxissent. Quare dum reditum parat, usque eò à nostris insequentibus cæsus est, ut relictis cum captivis 400, ipsis etiam tormentis in apertam se fugam conjecerit. Cumulavit lætitiā dedititione intra triduum acceptam Monozlo, seu Mons-Claudius à Claudio Cæsare, si veteribus fides, conditore dictus, sed ob eandem, ob quam Kristaloczensis arx, causam in auras ejectum.

Tot cladibus irritatus Hasanes in omnem Bano nocendi occasionem excubabat, votique sui damnatum se annò 1592 sensit. Petriniam enim obsessurus

Erdó-

1592. *Erdődins*, ad Bristum trans Colapim *Petrinæ* oppositum vicum cum paucis suorum auxiliares Germanorum copias frustra expectans, confederat: hic Hasanes à Belojevichio gente Rascio, homine Bano dilecto & aliàs fidei, de re tota edoctus, trajecto summa celeritate Colapi, *Erdődium* aggreditur, & quamquam hic pro paucitate militis strenuè se defenderet, omni tamen castrorum supellectile cum tormentis exutum, in plenam fugam conjicit. Usurus Hasanes victoriâ, iisdem tormentis Siscium, celebrem olim Romanorum coloniâ, infestavit, sed à Nicolao Mikacio Zagrabienfi Canonico arcisque propugnatore repressus, re infecta discedere coactus fuit.
1593. Rediit tamen insequente mox anno, simulque Banum de ejus arcis, ac totius Provinciæ salute sollicitum in se excivit, qui collecto ex Illyris partim & Germanis octo millium exercitu, cum Ruperto Eckempergio Styrorum Ductore accurrens celebrem commissô præliô de Hasane victoriâ reportavit. Ferunt eum caesorum inque Colapi merforum fuisse numerum, ut nexa invicem cadavera securum pontis instar per amnè transitum præberent. Periiit ejusdem Cola-

Colapis undis ipse Hasanes prodiſſorque Belojevich cum maxima primi ſecundique nominis Turcarum multitudine: tormenta bellica caſtraque opulentiffima fuere fructus victoriæ. Evenit id 22. Junii, quo 10000 Martyrum memoriam Romana recolit Eccleſia.

Placuit Bano uti fervore militis Petriæque exercitum, in quo ceteros inter Georgius Zrinius Caniſæ Præfectus, & Franciſcus Battyanius prima militiæ rudimenta poſiturus, aderant, admove-
re; verum Mehemet in monte Hraſztovi-
czenſi caſtra caſtris opponens, noſtros non modò obſidionem ſolvere, ſed Siſci-
um etiam auxilio omni deſtitutum ſe ſe
dedere coëgit; Caſpar quoque Granya
Zagrabiensis Canonici loci tum Præfe-
ctus à Mehemete captus, Conſtantino-
polimque deportatus culeo inſuitur, ma-
rique mergitur, aut, ut *Gregorius Petthø*
ſcriptor Synchronus, forti animo exce-
pto in cervice acinace ipſa in arce Si-
ſciensi trucidatur. Partâ tam inſperatâ
Barbarus victoriâ, nullum ſæviendi mo-
dum faciebat, donec Maximilianus Ru-
dolphi Regis frater, ejusdémque Archi-
ſtrategus precibus populorum motus
Erdôdio & Lencovichio limitum Croa-
tia

tix Præfecto in castra, quibus ipse præerat, convenire jussis, Petriniam primum quamquam magno labore, tum, dilapsis subiecto arcu igne præsidariis, Siscium occupâisset. Atque hoc modo pax rursum reddita, Sisciúmque Capitulo Zagrabienfi, cujus juris erat, restitutum. Verùm dum Rex in Pannonia bellum longius trahit, Banúsque in sanciendo cum Sigismundo Bathori Principe Transylvanorum foedere distinetur, Turcæ, *Erdôdii* absentia illecti, Petriniam restaurant, vallo ac milite firmant, præfectoque eidem Rustane, vicinis arcibus Gora & Hrafztoviczia denuo potiuntur; rediit tamen postrema in nostrorum manus, ipso Rustane, dum in adventantes Christianos erumpit, glande plumbea per ilia trajecto.

Auditis Rudolphus tot *Erdôdii* relictis de hoste victoriis, ac ea præcipue, quam merso in Colapim Hasane, retulerat, maximis Heroem laudibus celebrans, aditis confestim Templis debitas summo Numini grates persolvit. Sed & Clemens VIII datis ad *Erdôdium* literis, ejus in re Christiana tuenda collaudavit studium: Philippus verò II tanti Ducis fortitudine allectus, non modò arcanis
eum

eum bellorum admovit consiliis, sed
 misso etiam aureo Theutonici, aut, ut
Rattkaius, Redemptorum Ordinis velle-
 re, sibi arctius devinxit. Attulerant
 vellus id egregiæ magnitudinis aurô sa-
 phyrisque distinctum cum epigraphe:
Domine probâssime, duo ejusdem Theuto-
 nici Ordinis viri illustres, quod ille post-
 quam de manibus Antistitis Zagrabiensis
 Petri Domitrovich in Basilica S. Stephani
 Regis reverenter suscepisset, novos illi
 animos, novas additas vires putâsses:
 ita ille, quoad vixit, satagebat, ut tot
 summorum Principum de se expectatio-
 ni faceret satis: & fecisset sanè, nisi Tur-
 corum ab *Thoma* metus omnem armis rei
 bene gerendæ occasionem ademisset.
 Quare pacatô Illyricô, cum se non esse ne-
 cessarium videret, bonâ Regis veniâ Ba-
 natum annô 1595 abdicavit: arque licet
 eandem Præfecturam, resignante Joanne
 Draskovichio, annô 1608 receperit, (f)
 quia tamen quæta omnia ab hoste erant,
 nullum tunc bellum gestum est, uno ex-
 cepto dissidio, quod annô 1609 in publi-
 cis Comitibus Catholicos inter & à Fide
 Orthodoxa alienos intervenerat. Non
 contenta enim hæresis amplis Ungariæ,

K

Tran-

(f) *Matth. II. Decr. 1. & 2. in Concl.*

Transylvaniæque limitibus, ut in Croatiâ quoque, Regnum Christo fidele, se infundere posset, insanis clamoribus deposcebat: quæ ubi ad aures *Erdödi* allata sunt, justâ is irâ succensus, nudato palàm ense: *hoc, inquit, ferro, si aliter fieri non poterit, pestem istam à nobis eliminabimus, trësque nobis adsunt fluvii: Dravus, Savus, & Colapis, è quibus unum novis hospitibus sorbendum dabimus.* (g) Attoniti ad ista hæretici submissius mussare primùm, tum planè conticescere, nihil denique ultrà moliri.

1615. Atque hæc in secundo Banatu: quem rursus ob negata sibi per octennium stipendia resignans, Magistri Tavernicorum munus, cui & immortalis est, suscepit. Virum certè magnum fuisse & ea, quæ strictim recensuimus, declarant, & tractatus omnes publici, ac Bocskaianus præsertim, cui annò 1606 interfuit, edocent. Labet hic Georgii quoque Spissich ejus complures annos à cubiculis servi testimonium adducere, qui narrare solitus erat, tria à se in *Thoma* notata esse: eum scilicet foliorum lusu delectatum nunquam, nunquam pecuniâ tractâsse manibus, neque in convivio

(g) *Ratskay Lib. 4.*

vio potu excessisse. Mortuus est annum
agens ætatis 66. seculi sexcentissimi su-
pra millesimum quartò & vigesimò in 1624.
arce Krapina, ac postea in principe Zagra-
bientium sacra Æde hac, quæ sequitur,
pompa tumultus: (h) Post semestre
spatium Zamoborinum primùm, tum Za-
grabiam delatum funus est, præcedenti-
bus multò aurò equis insignibus, tre-
centorùmque hastatorum equitum pul-
lam indutorum vestem manū comitan-
te: sequebantur ponè filii Joannes & Si-
gismundus; (Christophorus enim Patrem
annò 1621 ad tumulum præiverat) ma-
gnaque nepotum ac Nobilium turba.
Ut primùm verò Zagrabiam ventum est,
antelata vexilla binæque stemmatis insi-
gnia cum monili ab Philippo II misso,
equisque atratis compluribus Majorum
imagines ex latere ferentibus splendorem
augebant. Sandapilam anteibat pul-
cher nepotum numerus cum longo Pon-
tificum ordine, funus ipsum Joannes &
Sigismundus cum Regni Optimatibus
sequebantur. Ut verò cadaver Templo
illatum est, suæque mensæ (Castrum do-
loris dicimus) impositum, inferias Anti-
stes quispiam peregit, ipso loci Episco-

K 2

p9

(h) *Ratk. Lib. 4.*

po Petro Demitrovich Heroëm invictissimum meritis laudibus pro concione celebrante. Sed populi ploratus, collucentes undique faces, Templi paulò antè exusti atra facies, & quoquò aspiceres, funereis parietes emblematis induti apertum vel fortissimis dolorem, optimique Principis desiderium insinuabant. Cadavere sub hæc loculo suo imposito, tercenti illi, quos diximus, equites, humanæ vitæ fragilem declaraturi pompam, hastas in muro perfringentes, ultimam solennitati coronidem addidère.

GEORGIUS ZTANKOVACHKY,

E T

JOANNES DRASKOVICH.

Dalmat. Croat. Slav. Bani. 1595.

CEdente primùm Provinciâ Erdödio, clavo Reipublicæ admotus à Rudolpho est *Georgius Ztankovachky* Episcopus *Zagr. & Joannes Draskovich*; aſt *Georgiò* paucis ab inita Præfectura diebus vitâ functò, ſolus *Joannes* rerum potiebatur, útque ſalutis publicæ ſtudioſum ſe oſtenderet, Koſztaniczam, ſed nullo fructu, quin accepto etiam damno aliquo, tentandam ſuſcepit. Felicior fuit altera anni ejuſdem expeditio adverſus Eunuchum

1596.

chum Szerdar Bassam fuscepta, qui cum 60 mill. acri adeò obsidione Petriniam 11 Septemb. cinxerat, ut nisi ea Daniele Francol & Georgium Prestocium, qui extrema perferre parati, cum 400 duntaxat se se acerrimè tutabantur, propugnatores naçta fuisset, actum omnino de arce futurum erat. Hi proin dum res suas pro virili agunt, Banus interea octo duntaxat millia numerans cum Thoma & Petro Erdödiis, Georgio Lenkovichio, Sigismundo Herbersteinio castra ad Breſtum metatur, transitum, si possit, per Colapim tentaturus; sed quia Eunuchi obstabat exercitus, vadaque omnia firmis custodiis tenebantur, Siscium petere, pontéque, quem iubente Bano ejusdem Siscii Præfectus struxerat, militem traducere placuit. Sollicitus tamen Banus, ne viso nostrorum abitu, Petrinensium caderent animi, eos submisso Martino Segniano peditum Centurione turcica induto veste, intérque volitantes plumbeas pilas fune ab obsessis attracto, sui consilii certiores fecit.

Motis ergo castris, ut progredi à nostris coeptum, Turcæ id fugam interpretati, celerrimè transito amne postremos invadunt; sed 3000 suorum ferrô aquis-

1596.
20. Sept.

ve absumptis, adeò consternati sunt, ut Szerdar inclinato ad vesp̄eram die, impedimentis, quæ ipse postridie secuturus erat, Kosztaniczam præmissis, castra solvi præceperit. Nostri ejus consiliorum ignari, dum transito ad Sisgium Colapi eo ordine, ut pedites lævum, dextrum equites cornu tenerent, Petriniam petunt, accidit fortè, ut pauci uskoki seu pedites juncti equitibus Banum antecedentibus in procinctu jam stantem Szerdar Bassam invenirent: ignari illi primùm quid agerent, invocato denique bono Numine animatis subiecto igne sclopis arma expediunt, tantòque, memorem hesternæ cladis Barbarum, metu complent, ut is totum exercitum adesse arbitratus, fugam illico circumspiceret. Venêre inter cetera in Christianorum manus duo immanis ponderis tormenta, in quibus Ferrhatis nomen arabicis literis expressum legebatur. Adveniente mox universo exercitu in eam primùm Duces curam incubuere, ut lacera mœnia reficerentur, novaque ad flumen erecta statione equitum, arx firmior redderetur: quod ubi insequente anno perfectum est, Viroviticzam Banus cum Herbersteinio sed fructu nullo cinxit:

1597.

qua-

quare mutató consilió Slaniam oppidum aggressi, diripiunt, quidquid Turcici nominis erat, cædunt, plurimos in turrim Templi confugientes aut flammis subditis exurunt, aut in præceps se se dare cogunt. Parem sortem insequentibus 1598.
annis Czernikium & Possëga, 50 jam annos &
Turcis subdita, experta sunt, Kurtio ipso Bassa 20 Septemb. ad Czernikum 1599.
interfecto.

In Ungariam sub hæc translatus, dümque 1600.
que Canisá ab Ibraimo Sept. 8. die obsideretur, in auxilium cum ceteris accurrens *Draskovichius*, Tartaros eam partem castrorum, quæ sibi obtigerat, instantes strenuè rejecit, ac, solutis demum annonæ defectu castris, salva tormenta omnia, licèt per palustria loca iter esset, revexit. Prætereo hic cetera minora prælia in agro Varasdinensi aut Possëgano annò 1603 gesta: unam tamen expeditionem adversùs Gabrielem Némethium, Stephani Bocskaii infestis signis Ungariam Rudolphúmque vexantis Legatum, susceptam adjungere placet. Exortis his itaque motibus in Ungaria, metuens *Draskovichius*, ne eodem 1605.
turbine involveretur Croatia, in citiore Dravi ripa, qui eo tempore obfer-

ventiorem æstatem frequenti vado transiri poterat, ab Vinicensi agro ad Ludbregum usque excubabat. Nec contentus arcere à se cladem, nisi inferret etiam, initò cum Sigismundo Trattmonstorffio consiliò, media parte militis ad vada custodienda excubare iussa, manus cum Némethio conferre placuit. Posuerat is castra ad Kõrmõndinum; sed non expectatis nostris, qui ad 10 mill. confluxerant, nam & Battyanius cum Zrinio Juniore suos equites peditésque adduxerant, quantocius aufugit, útque tantò certius Banum falleret, Legatos ad Battyanium pacis tractandæ specie misit, quæ res dum consultò protrahitur, ipse celeritate maxima se cum suis subducens, abducto etiam Stephano Comornico dato à Bano obside, Szigethum usque pervenit. Fructus tamen is expeditionis fuit, ut multa loca in fidem Rudolphi se

1606. dederent, Bocskaiúsque variis attritus cladibus, ac Turcicæ cum primis societatis pertæsus, pacem cum Rege faceret. Sancito mutuo Regem inter & subditum foedere, *Draskovichius* Banatu se abdicans, partium ultra Danubianarum ac Limitum Ungariæ Præfecturam, Tavernicorum item, & Cubiculariorum Magistrum

SUB REGIBUS UNG. AUSTRIACIS. 153

sterium jubente Rege, Thomam Erdö-
dium secundò Banum in Illyrico succes-
sorem nactus, suscepit. Obiit vir de
DEO, Rege, Patria optimè meritis Po-
sonii annò 1613, inque Æde D. Martini
solenni funere conditus, cum hac epi-
graphie:

SPES MEA CHRISTUS.

*Palladis & Martis columen: Pietatis avita,
Vindex: hic virtus Hunnia spēsque jacet.
O Draskovichios dent postera secula multos:
Gloria prisca Hunni Martis & artis erit.*

BENEDICTUS TUROCZY,

Dalm. Croat. & Slav. Banus. 1615.

JOannem Draskovichium è Banatu in
Pannoniam translatum annò 1606
docet *Rattkaius*; Thomas tamen Erdödi-
us ei primum annò 1608 successit: tum
quòd non prius in Corpore Juris Ung.
secundò Banus legatur: tum etiam, quòd
in ejusdem anni articulis Viennensibus,
Posonii confirmatis Regnicolæ à Matthia
petant, ut iis ipsis Comitibus Banatum cum
vetusta sua potestate à Dravo Adriaticum
mare usque bene meritæ alicui personæ
conferre velit: vacare proin dignitatem
hanc tunc oportuit. Misso itaque secun-
dum jam in Illyricum Thoma, rursúm-

Matthias
II. Rex.
1608.

K 5

que

que annò 1615 Provinciâ decedente, suscepit eam dignitatem *Benedictus Turoczius* multis præliis exercitatus miles, ac eo præsertim, quod annò 1587 ipso D. Laurentii die cum Sásvár Szigethano Bassa gestum legimus. In hac omnibus memoranda seculis cum barbaris comissa pugna ea captivorum Turcarum copia in Christianorum potestatem venit, ut insigne etiam mancipium quatuor aut quinque florensis veniret. Præclara hîc *Turoczii* eluxit virtus, eo uno infelicis, quòd acerrimè cum hoste dimicans, dum acinacem partes in omnes versat, à proprio milite pro hoste habitus, sauciatúsque, pugnum resectum amiserit. Banus postea factus, honorem illum cum vita annò 1616 posuit, vidua Susanna Ratckay, & duabus, Nicolao nempe ac Barbara, prolibus relictis. Jacet Viniciæ in Divi Marci Æde hoc addito epitaphio:

*Regnorum tutela trium, Banúsque potentis
Illyrici, & Patriæ hîc cura, salúsque jacet:
Ejus si posset complecti saxea moles
Virtutes, pulcher quàm foret iste lapis.*



NICO-

NICOLAUS DE FRANGEPAN

Dal. Croat. & Slav. Banus. 1616.

PRæclaræ Nicolai dotes dignissimum hoc munere fecerant, nisi ferventioris naturæ impetus optimam de illo civium expectationem corrupisset. Vix inito Magistratu Stephanum Patatichium Regni Proto-Notarium, ac postea in Judiciis Regiæ Præsentiae Locumtenentem per contumeliam scribam suum compellans, sigillum ab eo Banale judicarium, quod juxta vetera Regni jura Proto-Notarii fidei ab ipso Bano, quamprimum is inauguratus erat, tradebatur, repetiit, renuentemque reddere Pataticchio, quin potiore Nobilitatem in sui partes attrahente, eousque alienati sunt omnium fere ab *Frangepane* animi, ut congregati in campo Semoczienſi ad propulſandum Bethlenium annô 1620 Nobiles, illi subesse detrectarent: isque demum ejus expeditionis militaris finis fuit, ut licet Stephanus Senneius, postea Regni Cancellarius, à Rege Viennâ missus sediti-
nem comprimere studuerit, minùs tamen nihilô profecerit, castraque ipsa dilaberentur.

Ferdin.
II. Rex.
1619.

Obse-

1621. Obsedit tamen cum suis jubente Rege Grebeniam Francisci Batthanii ad Bethlenium defficientis arcem, eamque, quod nullo fere præsidio teneretur, facile cepit; sed rursus per Georgium Turkovichium insequentis anni octavò Febr. Batthanio vindicatam: (i) quæ dum *Frangepano* pareret, conclusit is in ea Joannem Kruseliū conspiracy cum Bethlenio initæ accusatum, nullūque, uti oportuisset, judicio convictum, dilaniari primū lictoris manu, ac demum in lecto quieti indulgentem glande plumbea (Rasciani cujusdam ad id operā usus) feriri præcepit. Recruduere eo factō Croatorum Nobilium in *Frangepanum* odia, factūque est, ut non modò in Zagrabiensibus Montis Græcensis Comitibus nihil ad utilitatem publicam statueretur, sed convitiis etiam palàm in comitis ipse sæpe proscissus, in Soproniensibus anni 1622 Comitibus Magistratu, poscentibus id Illyriis, privaretur.

Privatam is postea exegit vitam, nulli adnotus muneri, nisi quòd annò 1625, dum pax Turcica Comaromii sanciretur, utilem illum operam ad eam rem contulisse legam. Annò tandem 1647 ad centuriatà à Rege Posonium vocatus Comitibus,

(i) *Gregor. Pettkó.*

tia,

cia, sinistra ibidem tentari valetudine cum cæpisset, Viennam ejusdem reparandæ causâ delatus est; sed vi morbi ingravescente extinctus, inque Domo Professa PP. Soc. JESU conditus, vivere desiit. Translatum subinde funus in Croatiam, Tersactensi in Æde Divæ Virginis ab ejus Majoribus fundata tumulum invenit. Ante tamen quàm vitam hanc poneret, Altichianam in Moravia sitam arcem Collegio Zagrabienfi S. J. eo fine legavit, (k) ut 12 quot annis Illyri adolescentes, quorum pars dimidia è Frangepanis esset, in eminario Frangepanico dicendo, pietate & literis sub PP. S. J. cura erudirentur. Addidit ad hæc 17 florenorum mill. quæ ille ad exequiarum partim solennia, partim in pias Eleemosynas dividenda in Capitulo Zagrabienfi reposituerat. Omnis reliqua dives supellex cum Bonis Fratri Lupo hæreditate obvenit.

GEORGIUS à ZRINIO.

Dalm. Croat. & Slav. Banus. 1622.

Sub finem Comitiorum Soproniensium successor Frangepano datus est *Georgius* ille *Zrinius*, in quo, unâ literarum peritiâ exceptâ, nihil, quod aut militari

(k) *Rauk. L. 5.*

He-

1623. Heroë, aut summo Principe dignum videatur, desideres. Præluserat jam tunc futuræ felicitati, cùm in campo, ùt vocant, leporum Posonio adsito, præsente Ferdinando Rege venatu severiores curas levante vulpem fortè inventam tamdiu nobilî vectus equò in orbem versavit, donec hastæ infixam Regi adferret. Nec minor illi armorum dexteritas inferiis, quam magno suo malo Canisenses Turcæ persæpe experti, usque eo formidabant, ut non rarò pro ipsis propugnaculis homines pecorâque præ se agentem insequi non auderent. Et verò quàm heroô esset animò, ostendit palàm, cùm magni illius Matthiæ Regis Viennæ ova vendentis exemplò delectatus, ipse quoque rusticum mentitus habitum, ligna in Canisensium arce vendere exploraréque omnia attentavit. Nec tamen dolos ad conterendos hostes *Zrinio* adhibere necessum fuit, quos aperto Marte vincere pulchrè noverat. Fortè fuit, ut advocatis in periculi virtutisque societatem Joanne Draskovichio, postea Bano & Palatino, Sigismundo Rattkaio, Nicolao & Sigismundo Keglevichiis, in Canisensem agrum profectus multa prædâ inspectante hoste abactâ dives

ves rediret, jamque major nostrorum pars in adversa Muræ ripa constiterat; cum ecce inopino tumultu advolantes Turcæ in residuos involant, omnes haud dubiè undis ferróve perituros; nisi Vojcovicii nota virtus præsentis socios discrimini eripuisset. Is enim viso Turca, abjectis properè vestibus solo lineo tectus amiculo enses geminúmque manuales sclopus arripit, pauculisque comitantibus conscensâ scaphâ in adversam rapacis fluminis ripam luctatur, jamque excensionem parabat, cum hastatus Turca in generosum pugilem involat, vitâ momentò proturbaturus: sed Vojcovicius opportunè solutò sclopetò exanimem sternit illico, interfecti equum occupat, acrique cum barbaris contracto certamine, DEO propitiò, hostium 17 præcisâ capita Bano referens, victoriâ potitur.

Kosztaniczensibus quoque metum incussurus *Erdödius*, septem eorum centurias obviam factas fugavit. Eluxit hoc rursus prælio Vojcovicii, & Lupi Krisanicii virtus, quorum prior elusâ Turcæ hastâ æmulum sclopò solutò exanimans, dum cervicem quoque acinace ferire parat, infelici casu ab equo in terram

ram præcidente ipse quoque effunditur: accurrunt celeriter Turcæ, hastisque infestis petunt; sed Lupus Krisanicus socii periculô commotus cum nonnullis in hostes irruit, unôque interfecto, ceteros in fugam actos, cum Vojcovicio longius insequitur. Hic Turcæ nullum jam salutis locum videntes collectis animis, quos desperatio augere solet, frontem obvertunt, illaturi necem hostibus, aut certè à se propulsaturi. Erat hos inter Senecio multa aspersus canitie, qui cum Krisanicio ferrô congressus, eum perfracta capuli cruce levi vulnere in dextra fauciarat: sed viso cruore Lupus in novas succensus iras vibrato ense eo turcam sauciat ictu, ut dissecto miseri bifariam capite, extemplo fecerit exanimem. Duobus jam manu sua trucidatis tertium quoque pari felicitate, nec minore virtute funus adjecit; rursus enim se leviter in pectore ab alio Senecionis necem vindicaturus perstrictum cernens, prodigioso plane virium robore à parte dextra colli sic feriit, ut fræmea infra cor ad latus sinistrum viam sibi aperiente immani vulnere caput cum sinistra manu & parte pectoris à cetero corpore separârit. Banus in secundo
con.

consistens agmine, dum audito scloporum ictu, auxilio suis accurreret, hostium caesos alios, alios fugatos pallantesque conspexit: reditum proin Petriniam est, cui præerat Christophorus Mernavicius Vice-Banus & Lupi Mernavicii strenuè pariter adversum hostes decertantis Pater: ubi prædâ divisâ, captivisque sub hasta venundatis animatus miles, haud multò post Ductore Bano non minori successu sub Jassenocio hostem fudit.

Sed non potuit Patriæ suæ angustiis concludi virtus *Zrini*: quare, tumultuantibus Imperii acatholicis Principibus, dum eò Wallensteinus summus legionum Ductor ab Ferdinand. II. mitteretur, *Zrinium* quoque cum mille equitibus idem Ferdinandus in id bellum proficisci iussit. Rebus præter opinionem celeriter non minùs, ac feliciter confectis, revocatur rursus cum Wallensteinio in Ungariam *Zrinus*, tumultuantem Gabrielem Bethlenium sedaturus. Uterque Ducum Palankam delati, castra fixere, *Zriniusque* eodem cum Nicolao Forgachio usus tentorio, cum manè militari indutus veste se ad prælium compararet, acinacem stringens, *hoc*, inquit ad Forgachium, *bone frater hodiè ferro*
L Tur-

Turcarum truncabo capita. Vera locutum fuisse eventus docuit; fervente enim pugna splendidiorē insecutus Turcam capite minuit, allatōque illo in conspectum Wallensteinii, ità, ait, *persequendus hostis Caesaris, ità paranda victoria:* cui cū Wallensteinius plura truncata capita visa à se reddidisset, *plura,* reposuit *Zrinius, truncata vidisti; sed non truncasti plura.* Irritatus generosō responsō Germanus, homonota ambitione, & crudelitate (*Rattkaii* utor verbis) infamis, de tollendo è medio *Zrini* cogitare cœpit; sed cū aperta vi nocere se viro fortissimo posse desperaret, doli placuerunt: raphanum ergo, quem in deliciis *Zrinio* esse novebat, venenō tingit, invictūque Heroem tabe eadem inficit, conficitque. Ægrè se habere ut sensit *Zrinius*, è castris Posonium devehitur, nihilque proficiente medicorum ope, in ipso ætatis flore annos natus 28, præter Banatum Agazonum quoque Regalium Magisteriō insignis (1) extinguitur Decembri mense. Indoluit ejus fato Ferdinandus usque adeò, ut ei, prandens namque nuncium necis acceperat, cultros manibus excidisse narrent. Posoniō Chaktornyam sequente delatus anno, in Templo Di-

(1) *Ferd. II. Decr. 2. in Concl.* væ

væ Helenæ PP. Paulinorum magnâ pompâ, relictis non sanguinis modò, sed virtutis etiam suæ Nicolao & Petro hæredibus, tumulatur.

SIGISMUNDUS ERDÔDI.

Dal. Croat. & Sl. Banus. 1627.

Discessurus in bellum Germanicum Zrinius, suum in Illyrico Vicarium *Sigismundum*, Avo Patrêque Bano natum, Regnîque tunc Capitaneum, esse voluerat. Retinuit à morte Zrinii eosdem fasces jubente Rege, (m) atque à Commissariis, uti eos vlgò vocamus, Regiis Francisco Erghelio Zagrabienfi Præsule, & Petro Rattkaio universi Illyrici Pro-Rex declaratus, postquam in Æde Divi Marci Montis Græcensis conceptis verbis jurâisset, in id curas omnes transtulit, ut Rempubl. quâ quâ posset, redderet illustriorem. Comisit non semel cum hoste manus; sed ita, ut togâ illum quàm sagô fuisse clariorê *Rattkaius* scribat: non virtus tamen illi bellica, sed fortuna defuit, quæ si par data fuisset, non ille major quidê, illustrior tamen erat evasurus. Annò 1625 nondum Banus in ho-

L 2

sti-

(m) *Ferd. II. Decr. 3. & 4. in Concl. & Ferd. III. Decr. 1. in Concl.*

sticum irrumpens, cladem accepit; & licet equò desiliens, nec tam Ducis ipse, quàm militis munus sustinens, strenuè pedites, quos Illyri Uskokos, Ungari à planta pedis, quâ militant, Talpasios vocant, verbò & exemplò animaret, rursúmque eques dimicaret acerrimè, ad extremum tamen, amissis subter se duobus equis, in ignobili caballo fugere coactus, hosti cessit. Actum id prælium 29 Aprilis ad arcem Zriniam, futurum felicius, si *Erdòdius* Georgium Zrinium Banum intra triduum adfuturum expectasset.

Devenerat quodam prælio in Turcarum manus Petrus Levojevich peditum Ductor, quem illi, quia ob insignem militaris disciplinæ virtutem Bano non charum minùs, quàm necessarium noverant, magnò æris unionúmque lytrò redimendum datis vadibus, ad *Erdòdium* jam Banum remiserunt: ast Levojevicius homo minimè dives, missis sex duntaxat Turcis captivis, cùm avaram barbarorum spem frustravisset, adeò Turan Agam Badankovich Crupensis arcis, ut Turcæ vocant, Disdarium (*Rattkay* Castellatum latine reddit) antiquo Croatiae genere ortum offendit, ut is contumeliâ
ple-

plenis literis Banum conveniens, postquam verba sibi data esse questus fuisset, in singulare eum hastarum certamen provocârit. Datæ aliæ quoque ejusdem argumenti à diversis Turcorum Tribunis ad Lupum Mernavicium Capitaneum in Zredichko, Lupum item Krifanicium Berkussæ Præfectum, ac Lupum denique Jelachichium Lethovanichii pariter Præfectum viros omnes fortissimos, literæ: hos inter Mernavicius indignitate rei magis commotus præ ceteris, arreptò tumultuariè stylò in hunc fere sensum respondit: Adfuturum se statò tempore & loco cum ceteris; ut autem Pro-Rex universi Illyrici cum Disdario concurrat, id verò decens non esse: ceterum venturum & Pro-Regis locò Georgium Drivolevich Banalis Aulæ familiarem, quàmque poscerent, pugnæ copiam facturum: quod si tamè tantum Vezirio, aut Bosniæ Præfecto esset animi, ut alteruter cum Bano in arenam descenderet, id verò ei fore gratissimum. Decreta posthæc dies est, paténsque apud Zredichko ultra Colapim campus cancellis ligneis, ne fugæ Turcis pateret locus, sic circumscriptus, ut procurrentium tamen pugilum impetu hastarumque congressum angulis suis

minimè prohiberet. Ubi tempus condictum adfuit, Banus convocatis variorū locorū Præfectis & amicis, Lupus Frankepanus Croatiae limitum Præfectus, Johannes Draskovichius Crisientium equitum Ductor, multique alii, quos aut certaminis gloriæque studium, aut spectandi alexit aviditas, convenère. Comparabat se cum ceteris ad pugnam Mervicium, consensuque sonipede, venturum æmulum magnis animis expectabat: cum ecce adsunt Turcarum literæ per mancipium allatæ, quibus significabant, se ad Zredichko certis causis venire haud potuisse; facturos tamen certaminis copiam, si nostris Berkussam veniendi animus foret. Ità scilicet illi commentis his palliabant metum; revera autem cancellorum septis territi, eò se includere, unde nullus fugæ pateret locus, formidabant, quod illi ut speciosius celarent, auditi fuere dicere: *Majores suos sæpius cum Christianis decertasse quidē, nunquam tamen fuisse passos, ut pecudum ritu in barras* (ità cancellos vocabant) *compingerentur.* Non latebat nostros fraus barbara; ne tamen non timeri ipsi, sed timere potius ab superbissimo hoste dicerentur, accepta secum equitum parte

ali-

aliqua Berkussam petunt: eò ubi ventum est, vasta rursus à Turcis solitudo, qui non expectato nostrorum adventu, jam domum profugerant. Doluere Heroes palmas sibi perfringi in manibus, expectatòque aliquamdiu hoste, cum nullus se in conspectum daret, domum & ipsi, non tamen inglorii, rediére.

Causam provocationis hujus non solum pro Levojevichio pretium Turcæ obtendebant, re ipsa autem urebat ipsos Lupi Mernavicii facinus, atque ad vindictam stimulabat; hic namque commissò fortè præliò obvium sibi factum Saphirum Agam Badankovich Disdarii fratrem in fugam agens, breviorì primùm sclopò ad dextrum latus sic sauciârat, ut is accepto vulnere debilitatus, prono in cervicem equi corpore procumberet; at Mernavicius ad inferos deturbaturus devotam stygi animam, ut erat insigni virium robore, vibrato ense caput miseri Agæ cum cervice equi ictu uno præcidit. Ea res, ubi certis nunciis matri allata est, eo dolore miseram complevit, ut tres, qui supererant, fratres ad vindictam cognati sanguinis stimulare non desisteret. Verum cum, uti vidimus, duellum ipsi turpiter subterfugerent, maternis tamen

lacrymis dandum aliquid judicarent, non multò pòst, Duce Malagrudicio fædo à Christianis sacris apostata, arma capiunt, mortem fratris, quod singulari certamine non audebant, præliò ulturi. Conatus hi ubi Pro-Regi innotuère, is Thomæ Erdödio Pocupiensis arcis Præfecto, sui locò Duce exercitûs nominato, Georgium pariter Erdödium ex fratre Nepotem, Petrûmque Keglevichium adjungit, magnisque in hostem animis ire jubet: sub cujus ubi conspectum in monte Arenario ventum est, primus Thomas pugnae initium fecit: nec multùm à commisso prælio inclinata barbara acie, fit cædes tanta, ut Turcis Malagrudicii fidem in suspicionem vocantibus, propius abfuerit nihil, quàm ut proditor trucidaretur. Territus ille præsentī nece, ut fidem, quam in dubium vocari experiebatur, probaret, acinacem corripit, animansque barbaros prælium restaurat: sed en plumbea glande in incertum emissa saucius, equoque desiliens, dum se in vicinum quercetum abdit, hostes in plenam fugam conjiciuntur. Partâ celebri victoriâ, laureatóque milite hac illac discurrente, incidit nonnemo in saucium Malagrudicium, tantùmque erat omnium

um

um in eum odium, ut in frustra illico perfidum concisuri fuerint, nisi Lupus Jela-chichius eidem junctus sanguine, ut vivus Bano sisteretur, ægrè licèt, ab iratis impetrâset. Ecclesiæ is demum quidem reconciliatus est, sed mentis fere impos residuam vitam traduxit, constânsque deserti semel Numinis supplicium circumtulit.

Obtenta dein ab armis quiete, *Erdö-*
dinus quoque curas suas è campo ad Cu-
 riam transtulit, útque Thracum, qui
 excusô legitimorum Minorum jugô
 solis Theutonici nominis militaribus Præ-
 fectis parere volebant, insolentiam com-
 pesceret, impetrato à Rege nonnullorum
 Procerum Conventu (Commissioné vul-
 gò dicimus) eos ad officium revocavit.
 Ad graviora dein Nobiles descendere:
 inter cetera illud quoque petatum: ut
 officium Banale pristinæ Dignitati & Au-
 thoritati juxta *Artic. Viennenses & Po-*
sonienses anni 1608, aliorumque resti-
 tueretur. (n) Quæ tamen incassum po-
 stulata querulatur *Rattkaius*. Quatuor
 post hæc vixit annis *Erdödinus*, annóque
 1639 in arce Rubra (Vörös-kő) non pro-
 cul Tyrnaviâ sita, vitam hanc pia morte

L 5

com-

(n) *Rattk. Lib. 5.*

commutavit; cadaver autem in Slavoniam relatum est, inque Klanjecensi PP. Franciscanorum ab eo erecta Ecclesia magnifico funere terræ mandatum.

JOANNES DRASKOVICH.

Dal. Croat. & Slav. Banus. 1640.

Ferdin.
III. Rex.
1637.

Ferdinandus III. captus *Joannis Draskovich* insigni præter militarem artem eruditione (Humanioribus enim is Philosophicisque scientiis, quas Græcii summa cum commendatione publicè propugnavit, linguarum quoque europæarum pene omnium notitiam adjecerat) ut eum è Præfectura Crisiensi sui locò moderando Illyrico præponerent, Benedicto Voicovich Zagrabienfi Episcopo, & Lupo Comiti Frangepano limitum Croatiae Præfecto dedit in mandatis.

1640.
13. Julii.

Nec multum ab inauguratione temporis abierat, cum Duce Petro Keglevichio præclaram de Odo Bassa, Aga Bradavicza (latinè Verucam diceret) victoriam retulit, Thracésque, quos Valachos vocare solemus, jugò Turcicò liberavit. Quies dein à Kosztaniczenfibus Siscium nuper, ejusque oppidi Templum diripientibus fuit; Cladusiani tamen Savi accolæ agrum Carlostadiensem, ac præcipuè

cipuè opidum Rechiczam arcis Stenisi-
 ciæ, quæ tunc Bano parebat, crebris ir-
 ruptionibus divexabant. Injēcturus cru-
 deli avaritiæ frenos *Draskovichius*, copi-
 as suas Casparémque præter ceteros Ore-
 chocium Vice-Banum sextô Idus Nov.
 in Zredichko convenire, transitóq; altero
 mox die Colapi, ac recreatis in *Szlatkopolie*
 corporibus ad ipsam Cladussam hostilem
 arcem gradum promovere jubet: fecēre
 illi imperata, centúmque pedites Turci-
 cos cum 40 equitibus obviam factos ità
 acceperunt, ut ii Comliano suo Duce
 tribúsque militaribus signis amissis, in ar-
 cem pedem referre cogerentur: & capi
 ea tum, somnô vinóque sepultis barba-
 ris, poterat, si invadendi nostris sat ani-
 mi fuisset. Collata & postea pari felici-
 tate cum eodem hoste non semel signa
 sunt, tutiórque non quies modò, sed læ-
 titia etiam pagis oppidisque procurata:
 imminuēre tamen postremam adversa va-
 ria, quibus Croatia premebatur: nam
 præter frequentes terræ motus, pestis | 1645.
 quoque grassari incipiens, quibus ferrum | 1646.
 hostile pepercerat, trahebat in tumulum,
 aquarúmque alveos superantium inaudi-
 ta vis omnia corrumpebat. Accessit ad
 malorum cumulum ingens in ipsa Zagra-
 bien-

bienſi urbe exortum annò 1645 incendium, quod majorem partem ſacrarum profanarúmque ædium damnò maximò abſumens, collabente poſteà Cathedralis Eccleſiæ fornice, illud veteris magnificique operis multorum millium organum muſicum communi ruina involvit.

Increbuerat ad hæc rumor, Turcam moturum in Venetos, ferróque, ſi prohiberetur, per Croatiam viam facturum: quæ res Bano ſalutis publicæ ſtudioſiſſimo plurimùm ſollicitudinis iniecit; verſabat ille in diverſa animum, quâque tot malis mederi poſſet, convocato Senatu, diſquirebat. Miſſi proin in vicinas Provincias Legati, ac ex Styria quidem Joannes Voicovicius, è Carinthia verò & Carniolia Matthias Orſichius auxilia poſtulare juſſi. Redit paulò poſt Voicovich, allatâque cum aliquot colubrinis pulveris pyrii globorúmque magnâ copiâ, Illyricum univerſum non mediocri lætitia affecit. Indefeffam certè *Draskovichii* in curanda ſalute Reipublicæ operam tum illa, quæ retulimus, tum erectæ è ruderibus, quibus 40 ipſos annos tumultatæ jacebant, Gore, Pokupzko, Berkuffa, non utiles modò, ſed neceſſariæ

riæ etiam ad fines tuendos arces, loquebantur.

Et verò sensisset postea quoque paternam *Draskovichii* curam Croatia, si eum diutius Bani Magistratu fungi per Regem licuisset; verum miscente civilibus turbis Ungariam Georgio Rakoczio, mortuoque Nicolaô Eszterhaziô Ungariæ Palatinô, cum Ferdinandus circumspiceret, quem turbatis ad ceteros rebus fluctuantis Reipublicæ clavo tutò admoveret, *Draskovichium* invenit, virum fide in DEUM, ac Regem omnibus nota celebrem. Illum ergo Posonium evocat, inque frequenti Optimatum concursu una & viginti supra centum tesseris à Nobilitate ad id muneris electum Palatinum, Judicemque Cumanorum declarat. Et quamvis *Draskovichius* magnâ lætitiâ exceptus fuerit, non ita tamen quieto diu esse licuit, ut non averfos à se quorundam Procerum animos sentiret. Occasionem querelarum præbuit diuturnior ejus in Illyrico commoratio, quâ usi *Draskovichii* hostes, datis ad Ferdinandum literis querulantur, magna per absentiam Palatini Regno evenire incommoda, grassari Turcam, Rakoczium novam rursum moliri, neque hæc cordi esse *Draskovi-*

1646.

kovichio; cui cùm nullæ in Ungaria opes essent, quid quid adversi accidat, id non suô damnô eventurû probè scire. Hæc ubi Ferdinando nunciata sunt, dedit operam, ut *Draskovichium* his suspicionibus eximeret, eúmque illico Pannoniam repetere per literas mandavit. Una adhuc supererat calumniandi materia; hanc quoque ut adversariis Ferdinandus eximeret, cum arce totum Ovariensem agrum bis centenis numeratis millibus, ad decennium possidendum eidem contulit: quo dum festos inter reboantium tormentorum mugitus inducitur, paucis in hebdomadibus in morbum incidit, nec multò post ipsa MAGNÆ AD NIVES DOMINÆ festa luce animam, omnibus ritu Christiano morientium Sacramentis expiatus, egit.

1648.

Et videtur VIRGO SANCTISSIMA ferventi id in se *Joannis* pietati dedisse, qui vixdum Pannoniæ Palatinus datus, Thaulensem Taumaturgam invisit, ipsóque Immaculati Conceptûs die Sacra Exomologesi expiatus, Synaxique refectus, à MARIANA pietate MARIANI Regni gubernationem voluit exordiri. Posonii quoque, non multis ante obitum mensibus, duas ipsas horas pro ara DIVÆ VIRGINIS

GINIS flexo poplite preces fundere, anathema argenteum appendere, Sacerdoti ad aras operanti ministrare fuit observatus. Neque id satiserat viro MARIANO: qui ut pietatem, quâ ipse flagrabat, in alios derivaret, Officium, ut dicimus, MARIANUM latinè conscriptum, in Ungaricum idioma ipse transtulit, utque tacito suo nomine Posonii typis mandaretur, P. Jacobo Némethio Soc. J. commendavit. Atque huic pietati & illud dandum, quod præter subjectos sibi Ovarienses Conjugem quoque Barbaram, Thurzo, ab Lutheri secta ad veram Orthodoxam fidem revocaverit. Accidit fortè, ut primis ab inito connubio diebus Barbara cubile ingressa, orantis sui Conjugis vestigia genuum in arce Szomolanensi deprehenderet; attonita illa novitate rei, dum ex *Joanne* rei causam sciscitatur, quidque tam anxiiis à DEO precibus postularet, rogat; *Pro anima tua*, reposuit *Joannes*, *Conjux mea supremum Numen precibus fatigo; neque enim fas mihi judico te sociam vite sortitum fuisse, nisi etiam animam tuam communi nostrum Creatori lucrifaciam.* Mirata illa tantum in Marito Salutis suæ studium, victas tandem agnitæ veritati

ma-

manus dedit, Conjugémque Catholicæ Fidei studiosissimum maximâ lætitiâ complevit. Jacet is etiamnum in Æde Divi Martini Pofonii, in suorum Genitorum Mausolæo magnâ Procerum frequentiâ pompâque *Rattkai* teste reconditus. *Ketteler* ejus funebri apparatui 10 florenorum mill. attribuit; paucissimos tamen Dynastarum adfuisse memorat: malim ego *Rattkai* Synchrono, quàm *Kettelero* novorum confarcinatori fidem habere. Reliquit *Draskovichius* præter superstitem Conjugem tres filias, quarum Catharina sanctius vitæ institutum amplexa, se in Claustro Studenicensi Sponso CHRISTO devovit.

COMES NICOLAUS à ZRINIO
Dalm. Croat. & Slav. Banus. 1649.

SOLUTO annò 1647, quo Banalis dignitas vacare perhibetur, (o) universi Regni Ungariæ Senatu, motus tandem Croatiae calamitatibus Ferdinandus, viduo Pro-Rege Illyrico *Zrinium*, quem *P. Leonardus Frizon* Gallus è Soc. Jesu in panegyri de *Zrinio* dicta *Serinum*, *Ketteler* verò *Istvanffii* continuator *Serinium* vocat, Banum nominavit: gubernationi

(o) *Ferd. III. Decr. 2. in Concl.*

tioni tamen Reipublicæ annô primum 1649 tum invidiâ Thomæ Mikuicij Regii Personalis, tum quòd Ferdinandus multis contractis nominibus Bani stipendiis solvendis non esset, admovit. (p) Hujus proin anni Januario mense ab Petro Petretich Zagrabiensi Præsule, Nicolaôque Erdôdio in confessu Procerum Illyrici Pro-Rex nominatus, postquam brevi sèrmone suum in Patriam studium explicâisset, in Æde PP. Franciscanorum, dextrâ sceptrum ex veteri usu, sinistrâ vexillum tenens, in præeuntis verba Episcopi Sacramentum fidelitatis dixit.

Avum habuit *Zrinius* noster Nicolaum, nobilem illam Szigethi victimam, quem ille ità nomine animoque retulit, ut laudatissima illius exempla toti orbi ad imitandum proposita, sibi uni propria fecisse videatur. Eluxit in juvene adhuc virilis fortitudo, bellorumque ardor: hinc monenti fortè Regi, sibi ut maturè consuleret, si propria in arce à barbaris obsideretur, negavit se id facturum, qui non sibi, sed Patriæ viveret, neque alio, quàm mœniorum ruderibus, tumulto condi peroptaret. Ast ne loqui speciosius, quàm egisse videretur, Regem adversum 1646.

M

Sve-

(p) *Ferdin. III. Decr. 2. in Concl.*

Svecum in Bohemiam iturum secutus est, motisque Szakolczâ castris, non longo lapso tempore exigua suorum manu 200 Svecos cœcidit, dùmque Ægra obsidione ab hostibus tenetur, ne Ferdinandus ipse in eorum manus nocte concubia veniret, vigilantia suâ effecit. Wrangelius quippe Tollius adscitis sibi tercensis spectatæ virtutis comitibus, egregium quodpiam editurus facinus, Ferdinandum vinctum abducere meditabatur, jamque elusis vigiliis ad ipsum Regis tentorium penetraverat, propriusque aberat nihil, quàm ut in Ferdinando castra tota caperentur. nisi Croatæ rem odorati, hostem à castris, ab Rege periculum avertissent.

In Ungariam sub hæc redux Rakoczia. nos igne, ferroque oram Tybisci vastantes, notabili clade, tribus eorum mill. aut ultricibus *Zrinianorum*, Puchamianorumque dextris, aut Tybisci vorticibus absumptis, affecit. Ipse *Zrinius* postquam duos manu suâ interemisset, tertio quoque signum eripuit, Gesio Archistratego postea oblatum. Remuneraturus viri fortitudinem Ferdinandus, eum supremum vigiliarum Præfectum, Croatarumque omnium Imperatorem nominavit.

vit. Quod ille non indigno sibi collatum ostensurus, hostes, Muræ insulam ac eum præcipuè Adami Batty'ánii pagum, 1647. qui à Lupo nomen accepit, populari svertos, pro ipsis Canisæ portis, Alyque Bassa ex manibus eventum pugnæ expectante sic accepit, ut 100 & amplius hostium cæsis, plenam victoriam reportaverit. Sed præter vicanos nostros in pugna amissos, Lupi Erdödi temerè cum duobus tribusve in hostem illati, casique funus non modico dolori *Zrinio* fuit; cadaver non sine certamine receptum Joannes Draskovich Palatinus cæsi Lupi Socer in templo sub Castro Vinicza sito honorificâ sepulturâ tumulavit.

Hæc ante Banatum à *Zrinio* gesta legimus, in eam verò dignitatem non tam Regio favore, quàm propriis meritis sublatum, cum annò 1650 pax cum Imperii Principibus, Orientisque Imperatore sanciretur, *Zrinius* quoque ejusdem cum Canisiensibus stabiliendæ causâ I egra- 1650. dinum venit. Accurrere certatim Turcæ, ut oculos vultu Herois, quem in acie sinè horrore aspicere non poterant, securi pascere, eodémque ex fonte, unde mærorem prius, lætitiâ modò haurirent. Et erat *Zrinius* procero corpore,

augustâque specie, quam vestis aurô dives, surgentes de capite ardearum gemmis ornatae pennae, Sarissa pedestrium Ducum insigne manibus lata, multò spectabiliorem reddebant. Interea ingens aquarum moles è nubibus decidua magna clade Zagrabienſes affecit; nam præter damna cetera, 12 domus è fundamentis erutæ, complures variæ ætatis, sexusque mortales furenti elemento in prædam celsère. Recreavit tamen mærorem populi celebris *Zrinii* de Turcis Kosztaniczenſibus pacis nuper initæ ruptoribus relata victoria, quos ille, ad Unnam, præſente tum in Bani exercitu juvene Ladislao Rakoczio ex Italia commodum reduce, quinis uno die congressibus fusos, debellavit. Et poterat tum ipsa Kosztanicza, Simonis Loſtor è Carnis oriundi, aurûque hostili corrupti, fraude Turcis dedita, recipi, si id per Ferdinandum pacis pacta ſervari cupientem licuiſſet. Sed en vix Banus in insulam redierat, cùm affertur Haſan Agam Caniſienſem denuo Kis-Comarino imminere: jamque poſitis ille caſtris oppugnabat locum, generosè tamen arcem propugnante Ladislao Petthõ, quin ipsis mulieribus aquâ, ſaxisque in ſubeuntem

mæ-

mania hostem depugnantibus, priusquam advenisset *Zrinius*, jam Hasanes Canisam recesserat, ibidem ex vulnere brachii, quod tormenti globô cubito tenus ei avulsum fuerat, è vivorum numero sublatus. Ne verò ea expeditio inutilis *Zrinio* esset, se cum Adamo Batyânio turmis Joannis Christophori Puchamii Comaromiensis Præfecti conjunxit, utque acceptum ab Hasane damnum hosti rependeret, Segusdii amplissimi Pannoniæ oppidi suburbium abactis pecoribus incendit, tum, ne barbarus vicem redditurus, Petriniam tentare auderet, suâ præsentia, copiosoque scripto milite, effecit. 1652.

Annò verò 1659, cùm de Cœlo tactam Leopoldus M. Canisam conflagrâsse, corruptoque omni apparatu bellico præter Turcas, Christianos etiam 300 captivos eodem incendio absumptos esse intellexisset *Zrinius*, de re tota illico Leopoldum Regem Græcii Styrorum commorantem certiore faciens, capi arcem posse significavit; sed quia nondum pacis initæ tempus effluerat, licèt Turcæ fœdifragi Varadinum obsidione tenerent, hostile aliquid in Canisienses tentari Leopoldus prohibuit. Tum verò ubi, expugnatò annò 1660

M 3

Va.

Leopoldus M.
Rex.
1657.

Varadinô, manifestos se Ottomani hostes probaverant, *Zrinius* de Croatia sollicitus, ut eam cum adsitis Provinciis ab hostili direptione tutiorem redderet, Serén-vár arcem, quam nos Neo-Zrinium

1661. vocabimus, summa celeritate ad Muram fluvium, quâ utraque ripa ponte jungitur, construxit. Fatalis ea postea non semel Turcis fuit, ac primum quidem Canisiensi Bassæ, qui, quòd *Zrinium* ab arcis exstructione non impediverit, jussu Kiupleri Vezirii est strangulatus. Certè annò 1663, dum pax rursus Vezirium inter, cum 800 mill. Belgradum, Budámque tendentem, ac Leopoldum tentaretur, inter reliquas à barbaro leges positas fuit, ut oblato sibi *Zrinii* capite, Neo-Zrinium quoque dederetur. Sed postquam pactio hæc in irritum cessit, bellumque spectabant omnia, attributæ variæ Provinciæ aliis fuere Ducibus; *Zrinius* verò pro Illyrico excubare jussus, cæsis ex Arnautii Bassæ copiis sexcentis, pluribus captis, ac plerisque postea mactatis, paucos, evulsis oculis, naribusque præcis, lege talionis multatos Vezirio remisit; nihilò namque mitius in Ungaros Ujvarinò Parkanum procurentes, captosque ab eodem sævitum fuit

Vezi-

Vezirio, qui *Zrinii* hac, ut vocabat, barbarie audita, Præfecto Canisienti in mandatis dedit, iret illico, Neo-Zrinióque expugnató, illatam Turcico nomini ignominiam vindicaret. Fecit ille imperata, sed tertió repulsus, 900 suorum amissis, Canisam usque à *Zrinio* profligatus est, nec multó post omnibus thesauris, dum ulteriorem Turciam male sibi à Bano metuens petit, exutus. Eandem fortunam 3000 Janitzari experti sunt, quibus cæsis, annonam, quæ ad castra Vezirii Ujvarinum oppugnantis ferebatur, cusique argenti vim magnam idem *Zrinus* diripuit. Captó postea ab hoste Ujvarinó, missos ad populandam Croatiam cum Turcis Tartaros, exiguó 480 equitum numeró ex insidiis aggressus, V. Kal. Decemb. internecione delevit adeò, ut qui ferró se subduxerant, Muræ vorticibus haurirentur; equi natatu evadentes mille & ultra, prædam auxere, præclara quidem commendatione *Zrinii*, sed multó majore Croatia, Styriaque ab incendiis, latrociniisque liberatæ emolumento.

Nec territus his cladibus Turca, quin ob captum licet cum 15, aut, ut alii, 25 suorum mill. jactura Ujvarinum, Levam

quoque, Nitriam, & Novigradum interceptum, novis victoriis tumidus, de Croatia primum, & Styria, tum Tyroli subjuganda cogitare cepit. Unus hæc inter discrimina *Zrinius* aptissimus à Rege judicatus est, qui Ottomanicæ ferociæ opponeretur. Quare is rigente quantumvis Cœlo, assumpto sibi socio Wolfgango Hohenlojo Imperialium copiarum

1664. Duce, ità ut 25 millia in castris numeraret, 17 Kal. Febr. Neo-Zriniò in Turcicam cis Dravum ditionem movit, tantumque terrorem circumtulit, ut Berzenicza, Babocha, Verovichia interceptis, expeditum sibi Eszekum usque iter fecerit, decantatum illum recentibus historicis pontem crematurus. Et perfecit cogitata strenuè, totamque illam machinam 8565 passus in longitudine, 17 in latitudine numerantem, frequentibus ad hæc turribus, ubi durius solum patiebatur, munitam vix vidit, occupavit illico, subjectisque ignibus, opus, decem intra dies à viginti quinque millibus operarum constructum, paucis horis 4. Non. Febr. absumpsit. Verum non is, qui sperabatur, hujus facinoris præclari fructus fuit; recedente namque *Zrinio*, sex in hebdomadis, quod omnium fidem excedebat,

bat, damnum illud omne à Turcis est reparatum.

Motis Eszekinô castris, *Quinque-Ec-* 1664.
clesias ductus miles est, quem ubi ad-
ventare hostes viderunt, expositô can-
didô vexillô, nostris turpiter imposuère:
dum enim id deditionis ii signum inter-
pretantur, neque cauti satis urbem acce-
dunt, misso repentè parte omni plum-
bearum glandinum imbre pene obruun-
tur. Stetit nonnihil attonitus Christia-
nus exercitus; sed animus *Zrinii* magis
ea clade irritatus, suosque ad audendum
cohortans, urbem primo impetu capit,
obvios quosque cædi imperat; nullique
parsum omninò, tanta erat victoris ra-
bies, nisi quos in arcem delatos, pedum
velocitas furori, ferròque militum subtra-
xit. Capta civitate, arx quoque ipsa
aliquamdiu fortiter impetebatur; sed à
qua vehementiâ frigoris, subjectis priùs
civitati flammis, discedere *Zrinus* co-
actus fuit. Eundem exitum habuit Szi-
gethana quoque obsidio, quam ejusdem
frigoris vehementiâ, annonæque inopiâ
solvere coactus, ad hibernacula exerci-
tum dimittere maluit, quàm aperto di-
scrimini exponere; adferebatur enim cer-
tis nunciis duodecim Turcarum millia

M 5

sol-

solvendæ obsidionis gratiâ adventare.
 Quæ dum fiunt, Vezirius à Mahomete
 IV. severè per literas, quòd *Zrinio* non
 obsisteret, objurgatus, Neo-Zrinium cin-
 gere statuit, sed à Petro *Nicolai* Bani
 fratre repressus, pedem referre coactus
 fuit. Advenit interea ex Ungaria redux
Nicolaus ipse, utque hostem sibi immi-
 nentem præverteret, Canisæ obsidendæ
 consiliium suscepit; quod ille ut certius
 perficeret, hostiûmque vires exploratas
 haberet, quinque supra denos suorum
 comitatus arcî ipsi se se admovet, loci si-
 tum, murorum firmitatem, militisque
 numerum, quâ quâ potest, scrutatur.
 Non potuit ea res itâ hostium fallere
 oculos, quin *Zrinium* coràm adesse su-
 spicarentur: 500 proin extemplo arma
 equisque sumunt, inque sylva, per quam
 redeundum *Zrinio* erat, viam præclu-
 dunt: quid agat deprehensus *Zrinius*?
 mori nempe, quàm vinciri certus, tam-
 diu se modica suorum manu tuetur, do-
 nec 300 Croatæ pugnantium clamori-
 bus excitî, dissipatis latronibus, Ducem
 periculo exemissent. Ferunt è Turcis
 tunc captum fuisse validâ adeò loricâ
 munitum, ut omnes impetentium ictus
 illæsus perferret; hic idem ingentem la-
 que-

queum sericum attulerat, vinctum, ut putabat, *Zrinium* Vezirio, à quo is magnò propositò præmiò proscriptus erat, adducturus.

Elusis feliciter hostium insidiis, communicatòque cum Leopoldo Rege obsidendæ Canisæ consiliò; auxilia quoque ad eam rem perficiendam impetravit; quæ tamen quia tardius suppeditata sunt, dilata est in Kal. Maji anni 1664 obsidio, eaque magnis animis suscepta quidem; sed ab adventante ingenti cum exercitu Vezirio, qui quinque duntaxat horis abesse nunciabatur, dissoluta. Erat quidem *Zrinio* animus operiri hostem, manúsque conficere, sed dissentiente Hohenlojo, ejus denique voluntati morem gessit, milésque relicto in castris apparatu aliquo belli, ad ripam Muræ Neo-Zrinio oppositam est reductus. Crevêre hic nostrorum ob adventum Montecuculi animi, Neo-Zriniúmque facile ab hoste defendi poterat, nisi repentina Ducum discordia omnia corrupisset. Nam postquam Montecuculus exturbatò Ungaricò, Illyricòque præsidiò, suum arcu imposuit, vehementer ea re offensus *Zrinius* Chaktorum relictis castris abiit, de ignominia, sibi, suisq; illata, graviter apud Leo-

Leopoldum per literas questus. Interea Vezirius ob liberatam Canisam lætitiâ tumidus, suis cum copiis Neo-Zrinium advenit, súbque conspectum Montecuculi, sic tamen, ut flumine dirimeretur uterque exercitus, ea parte ripæ, quâ arx constructa erat, se dedit. Præerat loco, jubente Montecuculo Vangurius Baro, arcémque ità tuitus est, ut infundente se ipsis vallis Turca, ejectione in auras semilunari aggere, perterriti præfidiarii, tumultuariè per posticum arcis fugientes, pontem Muræ instratum peterent, Montecuculianis se castris conjuncturi: mille & quingenti universim fuere, qui dum plenâ fugâ non tam feruntur, quàm præcipites ruunt, pons tanto pondere fatiscens, & disruptus, octingentos eorum in rapidum flumen effusos, neci dedit: reliqui Turcarum acinacibus perire. Atque hunc in modum locum natura, & arte munitum, quem anno præcedente 100 Croatæ, 20 Germani strenuè propugnauerant, nulla suorum cæde Vezirius interceptit, diruitque. Sarfit tamen eam cladem Montecuculus in campo Sancti Gotthardi cecebris illo cum eodem hoste comisso præio, in quo adlectis etiam iis, quos varia prius certami-

1664.
9. Junii.

tamina minora absumpserant, sedecim Turcarum millia cæsa prohibentur.

At sequens annus, uti Ungariæ miserè laceratæ proficiuus, ità *Zrinio* fatalis fuit; sancita enim Leopoldum inter Regem & 1665. Sultanum pace, virtutem ferrumque, quod in hoste non poterat, cum in feris exercere magno Heroi placeret, accidit fortè, ut prægrandem aprum plumbea glan- de vulneratum in fugam vertens, inse- cutusque, eò adigeret, unde effugium bel- lue pateret nullum. Hic *Zrinus* equò desiliens, venabulum expedit, ultimo vulnere feram confecturus; sed illa acce- pti vulneris dolore provocata, inque po- stremos erecta pedes, irruit in adversa- rium, humique stratum dissectâ denti- bus gulâ, ventrèque ipso fædè discripto miserè confecit. Accurrerat quidem ephe- bus Gallus, heroque futurus auxiliò, sclopum expediverat, sed fomes negato igne, optimos conatus elusit. Non in Croatia solùm, & Ungaria, verùm uni- versa Europa magno luctu ejus mors ac- cepta, solis invidis, Turcisque lætitiâ peperit, qui tanto metu liberatos se ga- visi, editis festivis ignibus, commune gau- dium comprobârunt.

, Et sa-

Et sanè quàm juratus Ottomanorum hostis fuerit, ultra mille, urbes partim, aut oppida, pagi, villæque in hostico dirutæ, ablata bis mille quingentisque curribus cum captivis præda, erepta centum & quinquaginta hosti tormenta bellica, omnis denique latè hostilis regio Dravo Danubiôq; coërcita, quâ incendiis, cædibûsq; replevit ingenti persæpe Christianorum censu in libertatem vindicato, testantur. Atque hæc præclara facinora non intra Patriæ duntaxat limites famam magno Heroi peperçere, exteras quoque nationes ejus nominis splendor perstrinxit. Alexander certè VII. hujus nominis Rom. Pont. aurea *Nicolaum* sui effigie: Philippus IV. Hispan. Rex aureo vellore, quod tamen mortuô jam *Zriniô* allatum est: Cardinalis Barberinus annua pensione: festis Principes alii acclamationibus cumulârunt. Ludovico XIV Galliarum Regi tanto in pretio fuit, ut is non modò decem mill. Imperialium munere eum donaverit, sed Ducibus quoque suis in absolutum belli Imperatoris exemplar proponere sit auditus. Acceptô verò mortis *Nicolai* nunciô, vehementer infelici fato indoluit, cûmque ei nullum aliud officii genus præstare posset,

magni-

magnificis funebribus Parisina in urbe adornatis, per P. Leonardum Frizon è Soc. Jesu laudibus pro frequenti concione epycediôque celebrandum mandavit. Quæ dum apud animum suum quis reputat, mirandum est, nuperum quempiam historiographum præclari hujus Herois facinora ubique elevare. Equidem si, quæ Historicus iste chartis suis illivit, vera sunt, illud sequatur necesse est, ut summos hos Monarchas judiciô graviter lapsos, neque justos rerum æstimatores, qui tot laudibus immeritum *Zrinium* extulerint, fuisse dicamus. Id verò de maximis Europæ Principibus non dico scribi, sed vel cogitari, quis, nisi ab imprudente, patiatur.

PETRUS ZRINIUS.

Dalm. Croat. & Slav. Banus. 1666.

Nicolao uti sanguinis conjunctione, ità heroô animô perquam similis, in Præfectura Illyrici, non tamen continuò à morte Fratris, successit *Petrus Zrinius*. Insigne ab eo adolescente admodum fortitudinis monumentum editum legimus: venatu fortè animum ad Posonium recreanti Ferdinando, ceterisque Proceribus sub conspectum se dedit
aper

aper septem jam natus annos; jussus hunc aggredi à Rege *Petrus*, morem gessit illico, stringensque acinacem, sic frontem beluæ feriit, ut illa in terram collapsa, animam extemplo cum cerebro profunderet. Miratus Rex *Petri* fortitudinem, dari sibi in manus enssem poposcit, quem aliquamdiu librans, cum ob pondus commodè tractare non posset, reddidit rursum juveni, non suis viribus aptum affirmans.

A ludicris his ad seria dein animum adjecit certamina, cumque Nicolaus frater Germanicò impeditus bellò ei tuendam Muræ insulam demandasset, adeò strenuè impositam sibi explevit provinciam, ut vice quadam caca jam nocte obviam hosti factus, eum, ad Muræ usque annem insecutus, in fugam compulerit. Fugientibus, quà quemque impetus, pavôrque ferebat, Turcis, unum quempiam salutis ancipitem, ac, quod dici amat, aram inter, saxumque positum, cum is in rapidissimum flumen semet coniecisset, in eosdem vortices secutus est, arreptumque mediis in fluctibus trucidavit. Pereundum tamen iisdem aquis erat *Zrinio*, nisi *Dechko* quispiam Ducis periculò commotus, eum instanti
mori

morti eripuisset. Additurus novo Rex militi animos, Silbergensẽ ei Præfecturam sed ea lege contulit, ut scriptis suo ære sex centuriis exercitui Regio in Bohemiam adversus Svecum ituro se conjungeret. Fecit ille imperata, proximæque æstate Pilsnam Bohemiæ urbem magno vestium, armorumque apparatu ingressus, frequentissimam concionem ad se, suosque spectandos excivit. Rebus ibi præclarè gestis, postquam Patriæ fuisset redditus, utilem Fratri Nicolao non semel locavit operam, subque auspiciis postea Lupi Frangepani nobilem de Turcis Bihachiensibus victoriam haud procul Szlunio, ubi Barbarorum Dux Badankovich, à Joanne Crisanicio Lupi filio trajectus, vitam posuit, reportavit. Non longè hic à periculo *Zrinus* ipse aberat; nondum inchoatò namque præliò, Badankovichio occurrere avidus, dum concitatore equo in hostem fertur, ruptis fortuito casu habenis rectà in mediam Turcorum aciem rapiebatur, eò deferendus haud dubiè, nisi commilitones propere insecuti, equum à cursu stitissent. Cæso hoste Szlunium eo die, ac altero mox Carlostadium nostri triumphantium ritu ingressi, hymnò Ambrosianò de-

1640.
1649.

N

can-

cantatô, supremo Numini pro concessa victoria grates egêre. Caput Badankovichii hastæ præfixum jucundo fuit spectaculo, quod ut militari pompa conderetur, uxor vidua transmissô nobilî caballô, à Frangepano petiit, & impetravit. Sâsvâr pariter Aga eâ pugnâ captus, quinque millibus imperialium libertatem redemit.

Sed felicem hanc rerum omnium, & quas dein gessit, telam annus 1671 rescidit, & involvit: vasto quippe illo, qui tunc universam Ungariam quassabat, civilium bellorum turbine ipse quoque abreptus, à Regiis partibus ad confœderatos transierat, offensus forsân, quòd ei ad Banatum, quem ægrè, vir de Patria aliàs optimè meritus, Majorúmque gestis clarissimus impetraverat, Carlostadiensem Præfecturam Leopoldus Rex adjicere nollet. Ubi proin mutatus ejus animus, inittäque cum Tattenpachio consilia Viennæ, per Tattenpochii servum obfurta in carcerem conjectum, ac propterea vindictam de Hero sumere cupientem innotuère, illico in Illyricum cum sex millibus Spankavius adversus octona *Zriniana* è Morlachis, Valachis, Uskokisque conflata missus est, commissó-
que

que campestrî præliô fugatus *Zrinius*, se cum Frangepane, duobusque Morlachorum mill. Chaktornæ arcî inclusit. Insecutus fugientes Spankavius, cum arcem assiduò quateret, résque jam fere in extremo esset, Forstallum quempiam è Divi Augustini familia, quo à confessionibus utebatur *Zrinius*, Viennam mittit, gratiam Clementissimi Regis petiturum. Lobkovichius veniæ locum esse respondit, si se, suæque Regis arbitrio relinqueret: filium obsidem mitteret: abdicaret Pro-Regis munus, pro quo Carlostadii Præfecturâ donaretur. Sed cum Forstallus moras necit, arx interea nusquam intermissa oppugnatione, stratis latè ruinis lacera, proxima erat, ut caperetur. Desperata proinde defensione in tempesta nocte per averSAM arcîs portam se *Zrinius* & Frangepanus ejiciunt, eoque factò Chaktornam cum ceteris *Zrinio* obnoxiiis arcibus in Spankavii potestatem tradunt. Tum verò incerti illi aliquamdiu quid agerent, Viennam denique petere statuunt, Clementissimi Regis gratiam tentaturi: eò dum tendunt, accidit fortè, ut ex via ad Joannem Comitem Kéri cum magna famulorum turba delati, hospitium orarent: annuit illico Kérius;

rius; loci tamen causatus angustias, ut cum senis arcem ingredi liceat, concedit, ceteris foris manendum significat. Nondum sensere insidias; sed vix arcem ingressi, dum sublicium à tergo pontem attrahi mirantur, quibus semet cassibus induissent, pernoscere cœperunt: quos postridie frequenti armatorum manu cinctos, ac nec quidquam læsa amicitiae, hospitiique jura inclamantes, Viennam Kérius abduxit.

Egit hic prolixo commentario causam suam *Zrinus*, &, quæ innata fuit Regi piissimo Clementia, veniam quoque impetraturus sperabatur, nisi aliorum Justitiam ingerentium consilia obstitissent. Translatus proin cum Frangepano Neapolim Austriæ est, ubi postquam menses aliquot, diversis tenti ergastulis delitissent, mortis ab Rege, sed invito, latæ sententiam accepere. Facta utrique est mutuò se se videndi copia, quâ usi illi, remissis, ut Christianos decet, offensis, se ad mortem piè obeundam comparare cœperunt. Et *Zrinus* quidem, ut magnanimo erat pectore, immoto triste nuncium vultu excepit, positaque rerum humanarum cogitatione, totum se ad longum æternitatis iter debite suscipiendum con-

convertit. Postquam trigesimus Aprilis illuxit dies, delati in Urbis armamentarium, paucis præsentibus repetito ambo ictu vitam posuere. Commendandus hic vel ex eo *Zrinius*, quod plectentis Numinis manum exosculans, inter pia illa verba: *In manus tuas Domine commendo Spiritum meum*: fatalem ictum exceperit. Cadavera postquam spectaculo fuere aliquamdiu, honorifice deinceps cum resectis capitibus in Templo principe sunt recondita.

COMES NICOLAUS ERDÓDI

Dalm. Croat. Slav. Banus. 1681. (q)

Sumpto de Petro capitali supplicio, eidem non Georgius Zrinius, quem *P. Spangar* Soc. Jesu, recentissimus *Gregorii Pettho* continuator, annò 1676 Banum Croatiae è vita hac discessisse scribit, sed, uti ex *Szentivania* Synchrono certum habeo, *Nicolaus Erdódus* licet annò primùm 1681, successor datus est. Constat quidem Georgium Zrinium præsuisse Illyrico, sed is jam annò 1626, non autem 1676 vitam hanc mortalem legitur posuisse. Ad Præfecturam itaque Illyrici,

N 3

quod

(q) *Leop. Decr. 3. in Concl. & Szentiváni in Miscell.*

quod jam annô 1646 vicaria Bani potestate, profecto in Ungariam Joanne Draskovichio, moderabatur, virtus *Nicolaum* nostrum sustulit, quem vel soli Magistratum, quos gessit, tituli magnum fatentur. Sibi illum secretior Cæsareus Regi-
 usque Senatus Consulare datum, sibi Petrinienſis arx supremum Præfectum, limites Colapini Generalem, omnes denique Illyrici nominis pedites copiæ Ductorem habuerunt. Summam postea Bani consecutus Præfecturam, Ottomanorum copias, vastaturo Ungariam Tõkõlio in auxilium missas, cecidit non semel, factaque annô 1685 in hosticum irruptione, Kostaniczam, Dubiczam, Billastenam, Carlostadium aut cepit, aut obsidiô liberavit. Et ad Kosztaniczam quidem cæsa sunt barbarorum plus mille capita: adempta septem signa: ducenta florenorum mill. non annumerata alia magni pretii supellectile, in prædam venêre.

Tam præclaris de hoste relatis laureis, ut cives ab intestinis dissidiis contineret, illud ab Leopoldo petiit, ut Croatis à pendendis Regiis vectigalibus esse immunibus liceret. Voti facîle ab Rege donatus est, à quo quanti fieret *Nicolaus*,
 te-

testantur crebræ summi Monarchæ ad Banum literæ, expetita consilia, laudes passim agglomeratæ. Quid quòd Innocentius ipse XI. datis ad *Erdòdium* literis, præclaram ejus fortitudinem, invictumque animi robur commendaverit. His ille excultus favoribus, tantum abest, ut sumptò superciliò, agnatam sibi modestiam posuerit, ut etiam oblatum in Soproniensibus Comitibus Palatini Magistratum 1681. ultrò renuens, Paulum Eszterháziem suò quoque calculò in hoc honoris fastigio collocaverit. Eripuit Heroem verè magnum annus 1693, cui magno tum suorum civium, tum Aulæ Viennensis luctu, velut *eximio Christianitatis defensori, & solerti hostium exploratori* parentatum *Ketelerus* scribit.

COMES ADAMUS BATTYANI

Dalm. Croat. Sclav. Banus. 1693.

JActis feliciter in ipso adolescentiæ flore re belli fundamentis, quantum hac in arena profecisset *Adamus*, ut ostenderet, confligit, victor semper, cum hostibus, tumultuantésque annò 1682 agrestes, quorum bis mille, Styriam populaturi, confluxerant, haud procul Legradinò aggreffus, præcipuis seditionis authoribus

captis, atque in furcam actis, ceteros ex castris ad rastra compulit, ensésque ligonibus commutare præcepit. Inventi fuère postea nonnulli, qui dicerent *Adamum* annô 1683, quo innumera Turcorum multitudo Viennam obsessura, Ungariæ se parte omni infuderat, creditam sibi Muræ stationem, nece ab suis intentata, deseruisse, apertaque barbaris viâ, quâ ii in regiones illas latè grassarentur, à populatione non prohibuisse.

Quæ etsi fors non ex falso omnino in virum integerrimæ aliàs fidei dicta fuerint, deterfit tamen hanc, si qua fuit, labem, séque Regi, à quo non malô consiliô, sed Turcicâ illâ procellâ abreptus fuerat, quamprimùm reddens, utilem in
 1685. obsidenda Buda, dum hæc ab Stahrenbergio premeretur, operam contulit, cùmque negligentia Generalis Forster Annona Præfecti conatus is in irritum cecidisset, milésque Strigonium retraheretur, ad expugnandam eam urbem, reportandamque de barbaris, qui nostros ad Nyerges-Ujfalû aggressi fuère, victoriam adjumento fuit. Verùm uberior se palmarum inessis altero mox anno aperuit; admoto namque eidem Budæ, sed Duce Carolo Lotharingio exercitu illatus

tus *Battyánius* cum suis Ungaris in Ertsinenses Turcas, quos Ahdurachmanus Budensis Præfectus evocârat, sic multavit, ut tribus demptis omnes sub ipso Budæ conspectu trucidaret. Nec multò post impletis Hajdone navibus, quarum aliquot Comaromiò quoque acciverat, Divæ Margarethæ insulam diripit, cæsisque insulæ Ertsinensibus pariter custodibus, nobili ducentorum mill. florenorum præda potitur. Cymelia potissimum Nobilium Turcarum mulierum fuisse, quas Ahdurachmanus 10 navigiis impositas, antequam obsidio inciperet, in insulam, forti ad earum custodiam manu attributa, dimiserat. Subactâ demum universi Christiani orbis jubilò Budâ, cum variæ arces nostrorum virtuti cederent, Alba quoque Regalis, urgentibus eam *Adamo Battyánio*, Joanne Eszterházio, Barone Arejzaga Leopoldopolitano Præfecto, victas annò 1688 manus dedit. Quia verò Belgradum ipsum Duce Emmanuele Maximiliano Bavariæ Principe eodem anno tentare placuit, ne vicinarum arcium hostis procursionibus frequentioribus castra nostrorum infestare posset, variis præsidiis Ducibus aliis attributis, *Battyánio* cum Croaticis, Ste-

N 5

pha-

phano Zichio cum Ungaricis copiis Canisapremenda obvenit. Elusit illa diu multumque oppugnantium virtutem; sed anni 1690 hyeme fame domita, postquam 90 annos Turcis paruisset, deditionem denique fecit.

Admotus posthæc Illyrico *Battyánus*, cum omnia rursus armis circumstreperent, collecta annò 1696 Croatorum manu, Neo-Tudorovium, Velkladischam, Uranogræcium adfitas Carlostadio arces Turcis eripuit, (r) missoque in Bosniam Simone Forgachio, complura loca, non modica hostium strage, evertit. Sancta demum annò 1698 Regem inter & Turcam Karloviczii 25 ann. pace, dum
 1699. altero mox anno Josephus Archi-Dux Serenissimam Amaliam Wilhelminam Principem Hannoveranam in sponsam acciperet, aucturus Hymenæi pompam Paulus Eszterházius Ungariæ Palatinus, cum *Battyánio* Bano octingentos ex Ungaris Croatisque attulit, seu armorum venustatem, se vestium splendorem consideres, eo loco, solennitatéque dignissimos. Celebratis Regio splendore nuptiis, ut primum septingentesimus supra millesimum annus cœpit, ornaturus nova dignitate

(r) *Kesteler L. 49.*

tate *Battyánium* Leopoldus eum 13. Martii ad Senatum transtulit, dictumque Judicem Curiæ, quam campò prius defenderat, nunc forò Rempublicam tueri iussit. Nec diu is tamen supervixit, Præturam, quam summa laude orsus fuerat, in Georgium Erdödium circa annum 1702 morte transferre coactus.

COMES JOANNES PALFFI

Dal. Croat. Slav. Banus. 1704. (s) Josephus
Rex.
1705.

Liberales artes, ac virtutem præcipuè bellicam insignia esse ornamenta animi, nemo est, qui dubitet; quibus tamen si natalium gloria, acceptaque velut hæreditate à Majoribus generis nobilitas se conjunxerit, tum verò splendiores illæ solitò, admirabilioresque esse consueverunt. Nihil horum est, quod in PALFFIO desideres, qui nobilissimo, quòdque quartò jam & decimò florebat seculò, apud Ungaros in arce Vörös-kő ortus genere, Patrem habuit Nicolaum eo nomine IV, Matrem Eleonoram Carolo Comite Harrachio, & Francisca Eggenbergia Principe genitam. Vix prætextâ positâ, postquam pulcherrimis animum Tyrnaviæ, Posonii que scientiis ex-

co-

(s) *P. Spangar S. J. pag. 72.*

coluisset, è Scholarum pulvere in Martis evocatus arenam prima militiæ fundamenta sub maximis Lotharingo, Barendsiue Ducibus in Ungaria posuit, laureasque non rarò messuit, Patriæ utiles, sibi gloriosas. Certè cum prioris seculi bellò Gallicò in Imperio ageret, eum se exhibuit, ut communi Ducum suffragiò dignus censeretur, quem Romanorum Ungarorumque Rex, Adami Czoborii, JOANNIS nostri Soceri; (Theresiam namque ejus filiam ex Barbara Erdödia genitam, tot postea Heroum, quot filiorum matrem, in uxorem PALFFIUS acceperat) legioni Ungariæ Tribuni nomine annò 1692 ab ejusdem Czoborii morte præficeret. Non stitit hic Regius in JOANNEM favor: Ungarorum namque legione, permittente Leopoldo Augustissimo Rege, in Adamum Koloniczium Affinem suum traducta, non modò aliam loricarum Germanorum exeunte annò 1694, cui Carolus Palffius, PALFII nostri patruus, tertio Novemb. die Mediolani anni ejusdem decedens, præfuerat, obtinuit, sed universi etiam Illyrici, absens licèt, annò 1700 Pro-Rex dictus, eorum Regnorum moderationem annò 1704, 22 Martii ipso Paschatis

tis

tis festo, Varasдини, præsente lectissima sua Coniuge Czoboria, non multò post Generalis Campi Mareschallus pronunciatus, suscepit. Inaugurationem in Pro-Regem bellum (t) an. 1701 in Italia coeptum distulerat, ex qua evocatus in Imperium, non nisi sub finem 1703 anni se Patriæ reddidit, Confoederatosque non una clade affecit. Et ad Pudmeritzum quidem postquam cum Erbevillio 40 prope eorum mill. an. 1705 fugasset, Sopronio solâ sui adventûs famâ Ocskaium ceterosque annò 1706 depulit, occupatque paulò post Kapuvarino, cui Cziriakius cum 40 peditibus præerat, Rakoczium ipsum annò 1708, 3. Augusti die in plenam ad Threncsinium fugam conjecit. Fuerat quidem ejus expeditionis Dux Sigebertus Heister, victoriam tamen consiliò PALFFII, hostem probe vallis munitum non à fronte, quod volebat Heisterus, sed latere, quo debilior erat, aggredi suadentis novimus relatam. Hic idem ille Heisterus est, qui annì 1704 Decembri mense, die ipsi Divo Stephano Proto-Martyri sacro ad vicum Gerencsir non longè Tyrnaviâ positum, cum iisdem Rakoczianis confligens, aded primum

(t) *Vide Wagner S. J. in vita Leop. T. 2. à p. 581.*

mum multatus est, ut occupatis pene tormentis, ipse quoque, ab audentiore quopiam stricto acinace secundum impetitus, vitam cum capite positurus fuerit, nisi assistens lateri Comes Marcus Czobor solutò opportunè sclopò, temerarium inuasorem ipso in ictu occupasset. Coësis tamen ad extremum 180 (u) Rakocziæ peditibus, reliquis cum equitatu diffugientibus, victus jam pene Germanus triumphum de victoribus, præter ipsius Heisteri opinionem, egit. Scio à nonnullis augeri cœsorum ab Heistero numerum; verum quid opus illustri Heroi, dum veris abundat, alias laudes allinere.

Sed ad PALFFIUM sermo redeat, qui partâ eâ Threnesinienſi victoriâ, postquam ad Sopornium Provinciæ Nitriensis pagum, Heistero Posonium discedente, supremam copiarum Præfecturam accepisset, vires universas Nitriæ ipsi die 22 Augusti admovit, ejusque magnò bellicorum fulminum numerò quassatæ deditionem eo ipso, quo ante quadriennum Rakoczio cesserat, Divi Bartholomæi

(u) *Spangar. pag. 75. aliique vivi testes, qui casus aut humarunt, aut nondum terra mandatos diligenter perscrutati sunt.*

mæi die ab arcis Præfecto Casparo Révaio extorsit. Captâ Nitriâ Ladislaum Ocskaïum cum tota equestri legione sponte ad Regias partes redeuntem accipiens, illo, ac aliqua militis manu assumpta, Baimocziûm suum coronâ cingit, illudque derivatis clàm noctu aquis, dedente se Joanne Marschiczkiò è Turoczien sium Nobilitate arcis Præfecto, sui juris 11. Nov. facit.

Minora reliqua prætereo; illud certè 1710.
 laudis gloriæque in se habet plurimûm, quòd PALFFIUM expugnato cum Agria Jassoviensi castro gloriosum, optatissimæ Regios inter & Confoederatos pacis initæ authorem agnoscere; impeditas eo agente Templorum direptiones, mutuas familiarium cædes prohibitas, finem civilibus populationibus impositum fateri debeamus. Discedente namque post captum Ujvarinum in Styriam Heistero, postquam is probante Aula summum in Ungaria armorum Præfectum PALFFIUM reliquisset., Civilis hic sanguinis effusionem perosus, scriptâ Baroni Alexandro Karolio epistolâ, pacis, cujus postea confectæ gloriâ, quod novè ipsos annos armis tentabatur, Fata PALFFIO
 uni

uni reservâsse videbantur, jacere fundamenta cœpit.

1711.

Ineunte proin sequente anno Vajæ ad Tybiscum colloquium cum Karolio habuit, quôdque literis prius, idem mutuo sermone habito, tractare cœpit ultimo Januarii die, quo ipso Josephus Rex ei SUMMO ARMORUM SUORUM IN UNGARIA PRÆFECTO per diploma nominato, plenam sancientiæ ejus pacis potestatem attribuit. Quare discedente in Poloniam Rakoczio, Karoliûs Confœderatorum rebus præesse jussus, suum, non ad Hustium Maramarusiense, sed ad Szatmarinum, Senatum mense Aprili contrahit, exautoratôque in Majthénii Oppidi campo Rakocziano exercitu, 149 vexilla Regi legitimo ima Maji substernit, Augustissimæ Eleonoræ, quæ, sublatô maximo omnium dolore 17 Apr. Rege Josephô, rerum potiebatur, in pacis initæ testimonium Viennam deferenda. Redierat in fidem pristinam 26 jam Apr. die Cassovia, quæ licet Gubernatore Gabriele Eszterházio ab milite & armis foret instructissima, obsidiûmque multis mensibus toleratura videretur; misso tamen per PALFFIUM Ladislao Ebergenio viro invicto, Lefelholczio item & Viardto Regi-

Regiis Legatis se dedit, persuasâque ejusdem PALFFII literis, clementiam maluit Regiam, quàm arma experiri. Unum tamen Munkacsinum, sancita quamvis pace, resistebat superbius, quod pariter, admoto 20 Maji exercitu, dedente se Stephano Senneio loci Præfecto, die 23 Junii captum, celebrandi majore lætitia onomastici diei PALFFIO causa fuit. Hæc ob merita Makovicza cum sua ditione summo Heroi obtigit, Comitissq; Supremi apud Saárosienses dignitas, quâ Posoniensem quoque Provinciam moderatur, tum Generalis Cassoviæ, & Confiniorum Præfectura ei collata. Delectavit quoq; plurimum, Augustissimum, jam Cæsarem, Carolum Viennam reducem Illustrissimi tum Baronis Karolii in concilianda ea pace industria, quem datis ex itinere literis Cæsar conveniens, postquam plurimum sibi placere felicem ejus conatum significasset, Comitiss titulo, nec immeritum, honestavit.

Carolus
III. Rex.
1712.

Refluere illico positis armis literæ, quarum amorem ut in juventute accenderet PALFFIUS, præmiis palam annò 1713 bene meritos ex Athenæo Cassoviensi excoluit, ut & his majores animos adderet, & ignavis torporem excuteret.

O

Sed

1716. Sed en bellum rursus annò 1716 recrudit, Karloviczensi pace, tum ob ereptas confœderatis Venetis insulas aliquot, tum ob conjectum in vincula Fleischmanium, Casareum apud Ottomanos Legatum, à Turcis violata. Novus proin conscribi rursus cœptus miles est, universisque aciebus Sabaudia Dux Eugenius præfesse iussus. Non multò post Futakini miles omnis constitit, Turcæque nihilò segnior, transmissò Savò, cum ingenti ducent. mill. exercitu Petri-Varadino, annò 1687 Leopoldi M. armis in libertatem vindicato, imminere dicebatur. Expeditur illico PALFFIUS, spontè eam provinciam deposcens, cum 1500 equitibus Germanis, & 400 Ungaris, (x) Karlovicziúmque suscepto itinere, certiora referre jubetur. Vix ille ad Farum S. MARIÆ de Pace, locum ab ultimo cum Turca fœdere sancito celebrem pervenit, ingentem hostium numerum adventare conspicatus, hominem sinè mora ablegat, duas equestres legiones ab Eugenio auxilio petiturum. Missi illico Bareithiani, modò Battyániani, Dimachæ, & Loricati Contrecourtenfes, PALFFIANORUM non tam numerum, quàm, ut

(x) *Ketteler L. 51.*

ut putabatur, cædem aucturi. Et certè vix disposito in ordines milite, 40 Spahorum millia, è dumetis infano clamore erumpentia, tanta vi in nostros illata sunt, ut nisi PALFFIUM illi Ducem fuissent naçti, Cannensem Romanorum cladem renovaturi viderentur. Sed invictus Heros nihil turbatus animò, tant. fortitudine quatuor ipsas horas irruentium sustinuit impetum, ut duobus subter se confossis equis, ex tertio, nobilis cujusdam Bassæ ab Generali Hauben trajecti, generosè dimicans, 400 duntaxat suorum partim cæsis, partim vulneratis, quinque hostium vexilla, interfectis 1000 barbaris, receptu, quàm fieri potest, ordinatissimo in castra retulerit, magnâ omnium lætitiâ, majore eorum, quibus cognita hostium multitudo fuerat, admiratione. Venit tamen eo certamine in barbarorum manus Comes Sigefridus Breuner, Generalis campi, ut *Kettelerus* vocat, Pro-Præfectus, amissò equò in medio relictus hostium, quem postea fuso ad Petri-Varadinum Turca, in ipsis Vezirii castris recens obtruncatum, catenisque onustum nostri invenêre. Præfagiisse nempe hanc, reliquasque pro Romano-
rum Imperatore, Regéque Ungariæ rela-

tas victorias aquila illa, vetus olim Ungarorum insigne, visa est, quæ palatium, in quo primam lucem aspexit JOANNES, ipso nativitatis momento insedisse, constanti Seniorum narratione perhibetur.

1716. Comisso tam glorioso cum hoste numeroso certamine, animosior factus Christianus miles, Petri-Varadinum, à Petro Rege conditore dictum, castra transfert, collatisque cum universo Vezirii exercitu dextris, ea clade Augusti sexta die affectus hostis est, ut communi opinione in acie, fugaque tricies mille cæsorum jacturam passus feratur. Præda dives & copiosa militi cessit, ex qua memoriâ hic digna videtur machina illa bellica grandioribus pilis ope nitrati pulveris jaciendis aptata, cui latinis literis incisa legebatur epigraphæ. *Revertar in Patriam*: Fusa hæc erat sub Ferdinando I. sed à Turcis intercepta, in Venetorum quoque potestatem devenit, Moream ab iis devecta; verum domitâ ab Turcis Morêâ, rursus sui eam juris fecere Mahometani, hucque Petri-Varadinum adductam, nostris inter cetera victoriæ monumenta reliquere. Non quievit hic Eugenii laureata virtus; qui missò ex templò JOANNE PALFFIO, & Alexan-

xandro Wirtembergico Principe cum aliqua equestrium, pedestriumque copiarum parte, explorandæ iis Temesiæ negotium dedit. Advenit mox universus exercitus, munitissimæque arx 13 Octobris robori Christiano succubuit. Variæ durante obsidio tentatæ ab hostibus eruptiones fuere, in quarum una fortè accidit, ut Joannes Vékonyius Calvinium affecit, Rakoczique quondam miles cum Turcis erumperet. Viso homine PALFFIUS, atque ex vestitu Ungarum agnoscens, gravibus verbis increpuit, quòd juratissimo Christiani nominis hosti Christianus ipse operam commodasset; ageret proin, & præclaro aliquo facinore inultam nomini labem elueret. Valuit apud hominem magnanimi Ducis hortatio, pollicitusque illico est, non passurum se, quin, si posset, bene de Christianis mereretur. Tum, ne à Turcis in suspicionem prodicionis vocari posset, solutò in illum PALFFIUS, is vicissim in PALFFIUM, sed nullo nocumento, sclopò, Temesiam se cum Turcis recepit quidem, ast memor datæ fidei, plurimum operæ contulit, ut vindicato ab extremo excidio Eugenii exercitu, Belgradum ipsum caperetur.

1717. Decimô namq; , & septimô supra millesimum septuagesimum annô , dum Taurunum (Ungaris Nador-Fehér-vár) coronâ cingeretur , Vékonyius noster literas magni Vezirii , obsidionem solvere molientis , ad Belgradensem Præfectum perferre iussus , excepit mandata avidus , susceptoque arcem versùs itinere , per varias ambages , ità ut nostras quoque vigilias falleret , ad PALFFIUM pervenit ; literas exhibet , simûlque Eugenium de Vezirii , Christianos eodem tempore è castris , urbèque aggredi parantis , consilio certiores facit. Perlectas Duces reddidère literas ; iter prosequi , cûmque Præfecti urbici responsorursum redire iubent. Fecit imperata Vékonyius , relatoque ad Eugenium Gubernatoris responso , nunquam se Turcis videndum dedit. Hinc factum postea , ut Eugenius prævertens hostem nîl tale metuentem , in suis castris , ducente alam dextram PALFFIO , 16 Augusti aggressus sit , depulsoque è latibulis suis Veziriô , urbem ipsam cum arce , 22 ejusdem mensis die ad deditionem compulerit. Non defuit Vékonyio præmium , qui insigni trans Tibiscum Bulsó pago ab Rege donatus , in Nobilium relatus est catalogum ,

Cen-

Centurionisque honore & stipendio auctus, è Palstana Gynecæo nobilem puellam in uxorem accepit, ejuratōque Calvinō etiamnum superstes vivit. (y)

Contusa duorum annorum cladibus maximis Orientis superbia, pacem tandem, quam insaultè ruperat, rogare cœpit: concessitque eam Rex Carolus vel ex eo facilius, quòd insperatò bellō ab Andegavenfi Philippo Duce se peti in Sicilia videret. Saneito proin Passaroviczii, ignobili Servia pago, Regem inter ac Venetos, Portamque Ottomanicam 1718, in annos 24 fœdere, exercitus in Italiam *Jul. 22.* parte aliqua traductus est, aliā in agro Temesienfi excubare jussus. PALFFIUS quoque ab armis quietem nactus, erectō annō 1724 Posonii Regio Locumtenentiali Consiliō, in gravem illum summorum Virorum Senatum adlectus est, ac denique 1732 annō, à morte Stephani Kohári prioris anni mense Majo summo omnium dolore elati, ipsi Regni Curia Judex datus. Rursum autem turbas in Moscovia cientibus annō 1735 Tartaris, Turcisque, cūm Carolo Regi illatam Sociis injuriam vindicandi esset animus, exercitui suo ad Futakinum, & Passaroviczi-

O 4

viczi-

(y) *Epit. Chron. Ung. edit. Cass. pag. 297.*

viczium metaturo supremum Ducem PALFFIUM dedit : qui designatis inque ordinem redactis castris, proxima anni 1737 hyeme Posonio, Curiaquereditus, vivit etiamnum, amor Regis, & populi.

JOANNES DRASKOVICH

Dal. Croat. Slav. Banus. 1732.

Joannes Draskovich Joanne pariter, insigni cum 1200 Croatis relata de Bosnensibus Turcis annô 1689 victoria celebri, Patre; Matre verò Magdalena è Nadasdionum sanguine magnæ virtutis fæminâ progenitus, præclaram illam tum Prudentiæ, quâ pollebat maximè, tum Pietatis, quam semper quidem, at inter orandum maximè ductis ab imò pectore suspiriis prodebat, laudè ab utroque Parente hausit. Ambarum virtutum illustria dedit specimina, postquam politioribus Varasдини, Viennæque excultus Musis, toto eo tempore, quo Palffium extra Illyricum bella evocaverant, Locumtenentis Regii Banalis nomine præesse Reipublicæ jussus fuit. Ea certè in infimos quosque erat affabilitate, ut repelleret à se neminem, quin ultrò ipse alloquiò miseros dignaretur.

Nec

Nec minori tamen, cum res posceret; 1716.
 hostibus terrori fuit, ac amoris suis: hinc
 nostris expugnatâ Temesiâ victrices per
 Ungariam Apostolicas Cruces, Aquilâs-
 que circumferentibus, ut expeditionem
 Regios in fines molientibus Turcis, fru-
 menti pabulique, omnibus ex locis con-
 gesti, copiam adimeret, ipse Klenoniv-
 kâ arcis Dominus, simulque Pro-Præ-
 tor Regni, per Matatichium & Paramin-
 szkium Zrinii & Kosztaniczæ Præfectos,
 accepto patrio duntaxat milite, Dubi-
 czam Bosnæ oppidum, Perkoviczam, &
 Ostroschaz aut expilavit, aut subiecto
 igne cremavit, utque amplius noceret
 hosti, erectas ad Savi ripam turres ligne-
 as, complurâque alia cum Novi insula
 aggressus, ingentes equitatûs Turcici an-
 nonarias domos flammis absumpsit. Ean- 1717.
 dem sortem experta est anno altero Co-
 foraza arx in finibus Bosniæ objecta Cro-
 atiz, quam, arma in hosticum inferri
 jubente Senatu bellico, Duce eodem Ma-
 taticchio, licet validis aggeribus, septô
 arboreô, turrique munitam, spreto ho-
 stilium globorum imbre, vi cepit, cæ-
 sóque præsidiô, solo æquavit: quo fa-
 ctum, ut Vezirii castrorum finitimo mi-
 lite augendorum consilium non parum

turbaretur. Vastati præterea sunt varii hostiles agri: intercepta rursus à *Draskovichio* Atimisióque annonæ vis magna: munimenta nonnulla diruta, aut incensa. Irritatus tot malis Cserichius, Novii, Kamengradii, omniumque ad Unnam arcium Præfectus, arma & ipse ferociter corripit; sed commissò cum Croatis acri certamine, cum fratre, filio, suisque cæsus, capitibus illorum Zrinii & Kosztaniczæ palàm affixis, inconsultæ audaciæ pænas luit.

Tam bene proinde Patria meritum digno munere ornaturus Rex Carolus, promotò ad Curiam Palffiò, ei trium Regnorum Pro-Regis potestate moderandorum provinciam attribuit: fuitque ea inaugurationis solennitas, ut majorem vix antea provectæ etiam aetatis meminissent. Confluxit ad hanc præter Regni Proceres omnes, vicinæ Styriæ Nobilitas, quæ jam antea quoque plures apud *Draskovichium* hebdomadas hilarius agere consueverat. Nec diu tamen aut *Draskovichio* præesse Croatiæ, aut huic *Joanne* frui licuit: qui annò 1733 brevi catarrho ad extrema delatus, vitam cum dignitate posuit; sed ita, ut vivat etiamnum in memoria Civium: vivat in Colosso MA-

RIA-

RIANO quem à Majoribus suis ante Collegii Soc. Jesu Templum Varasдини erectum, sed temporum, aërisque injuriâ pene collapsum, instauravit: vivat in Lauretana Æde, quam eidem Varasdinensi Templo adjunctam ab Suis, venustiore reddidit, atque in eadem, uti parens uterque, voluit tumulari. Reliquit præter Excelentissimam viduam Conjugem, natam Comitem à Prandeis, filios duos Joannem, & Josephum, quorum prior postremô anni 1735 bellô Italicô Martis victima pro Cæsare cecidit, alter in spem adhuc Patriæ efflorescit.

JOSEPHUS ESZTERHÁZI

Dalmat. Croat. Slav. Banus. 1733.

AD JOSEPHUM tandem ESZTERHAZIUM, Patre Francisco, Nicolai Palatini filio, Matre Catharina, minore Emerici Tekelii sorore progenitum, illustre illud eruditæ, militarisque Ungariæ sydus pervenit historia, pronum apud eum inventura hospitium, in cujus non tam Lare, quàm pectore Musas omnes domicilium fixisse scimus. Erudiri ille Tyrnaviæ primùm ad annum usque 1700, tum Romæ etiam, sacris profanisque scientiis adolescens non contentus,

tus, Vir quoque ætatem suam libros inter conterit, erectusque nobili sua in Cseklifienſi arce Muſarum Sacrariò (in quo ad Byzantinam præter ingentem ceterorum librorum copiam, nihil proſus; ad Romanam verò veterem æquè ac recentem Historiam parum deſideres) eruditis his Numinibus ſex, ſeptémve horas in dies ſingulos, ſi modò per negotia publica liceat, litare non ceſſat, literatorum amor ipſe pariter, ac amator.

1707. Sociaturus dein Martè Apollini, haſtam adamavit Palladem, adſcriptusque Regiæ annò 1704 militiæ, Leopoldi reliquorumque Regum partibus, contrà quàm major natus Antonius frater, conſtans fide integra adhæſit, atque licet propria in arce Sempthenſi, ſeu Sintavi-enſi obſeſſus, læsò Califiò loci Præfecto, à Fratre, ceteriſque Rakoczii Confoederatis ad deditionem invitaretur, maluit tamen Timoleonis, fratrem ſalutis publicæ invaſorem, perſequentis imitari facinus, quàm Regem, & fidem juratam agnati ſanguinis amore prodere. Remiſsò itaque, quem Antonius frater deditionem ſollicitaturum miſerat, Paulò Pruſénſzkiò, machinas ipſe bellicas diſponit per propugnacula, útque eſt pyro-

rotechnices peritissimus, adeò dextrè in Fratris copias librat, ut, desperata loci expugnatione, pudore suffusum abscedere coëgerit. Ferunt nonnulli JOSEPHUM ea propugnatione non tam Ducis, quàm militis functum munere, ob continuam nitrati pulveris tractationem manu, facièque cyclopem, nescio quem pulchrè sordidum, retulisse. Est Sinta-viensis arx rapacî vagò, vitiferisque latere orientali cincta collibus: obsederant hos maturò ejusdem anni autumnò 500 è Confoederatis, nónque invitatae operæ vindemiam facere moliebantur. Procurrit adversum populabundos ESZTERHAZIUS cæsisque centum, reliquos in fugam egit. Fuerat hos inter Joannes Fodor Pusztafedimesiensis Juvenis ætate, viribúsque florens, quem diù, multúmque reluctantem manu sua cepit denique, cùmque 12 gregariis aliis vinctum abduxit.

Expertus eandem virtutem est, sed 1708. majore suo malo signifer ille ad Thren- 3. Aug. cinium, qui, obsistens ESZTERHAZIO, ne hic Rakoczium, quadragenis fere ab JOSEPHO nostro passibus cum equo corruentem, interciperet, vexillum primum, tum & vitam dextra ejusdem ESZ-

ESZTERHAZII amisit. Adierat hic tamen, à nonnullis Rakoczii Talpasis cinctus, vitæ periculum; sed mascula prorsus virtute se tuitus, accurrente postea in auxilium Joanne Georgio Redlio Pro-Centurione non sine commendatione præclaræ fortitudinis ad suos revertit. Illustria hæc ejus facinora ubi Regi nunciata sunt, dignum is judicans, qui non modò imperata providè, fortiterque exequi, sed dare etiam mandata posset, eidem Ladislai Ocskay à Confoederatis Ujvarini miserè perempti, Legionem equestrem annò 1710 attribuit; sed hac annò 1714 exauthorata, aliam, cui hætenus Josephus alter Eszterházius, Pauli Palatini filius, præfuerat, quàmque jam annò 1702 idem Palatinus privato ære, pro fratre Gabriele adversum Gallos ituro, conscripserat, accepit.

Eodem annò 1714 politioris quoque Architecturæ, cujus, uti & militaris peritissimus semper habitus est, daturus experimentum, ad oppidum suum Cseklizium, alterâ Posoniò in orientem situm leucâ, excisis amœnissimo in colle vineis, fundamenta Castelli jecit, quod modò, seu sitûs ridentem faciem, seu ad omnem artis regulam correspon-

den-

dentium sibi partium symetriad spectes, absolutum planè, perfectumque videmus. Indidit eidem armamentarium vetera modernaque armorum complexum genera. Tum, ne suum quoque Musæ desiderarent Sacrarium, imitandò utinam pluribus exemplò! Bibliothecam erexit non levibus impensis Munkácsiano præsertim librorum apparatu illustrissimam. Nec tacenda hic ejusdem Comititis pietas, quam ut egregio aliquo contestaretur opere, magnificum Divæ Annæ Odeum ad nigram aquam (fluvius est Cseklisium alluens) insignemque è lapide Marianum Colossum pro ipsis Castelli portis erexit, utque coram eo, præeunte Sacro Curione, ab universa obsequiis suis attributa familia Magnæ hujus Matris laudes Lytaniis comprehensæ singulis Sabbati diebus recitarentur, piò decretò sanxit.

Et favère tantæ pietati Superi, utque memorandam seculis omnibus annò 1717 de truculentissimo hoste referret 1717. victoriam, concessere. Accidit fortè, ut debellatò jam in castris suis Veziriò, adferretur Eugenio, Seraskierum cum 30 Turcorum, Tartarorumque millibus Ujpalancæ inhiare: sollicitus loci servandi Prin-

Princeps, ESZTERHAZIO illico mandata mittit, hostémque aut depellere, aut certiorareferre jubet. Suscepit exemplo periculosam licèt Provinciam ESZTERHAZIUS, tantóq; lubentius, quòd præclarum quodpiam audendi facinus occasionem oblatam sibi videret. Ne tamen exiguum suorum 600 manipulum manifestæ non tam pugnae, quàm laniationæ objiceret, placuit ab ingenio consilium poscere, quàmque apertis viribus non posset, insanam hostium multitudinem arte eludere: laxari ergò, quantum licuit, militum jubet ordines, augeri tubarum, tympanorúmque numerum, ut si auditu rem metiaris, justi exercitus species videri posset. Tegebat fraudem densa nebula, útque modica ea manus ingentem de copioso hoste victoriã referret, cum pulverulenta, quam excitari præceperat, nube effecit. Vix enim Centurio noster, quem ESZTERHAZIUS ceterum agmen præire jusserrat, sub conspectum Turcorum venit, audito illi numeroso tubarum, & tympanorum crepitu, universum exercitum adesse rati, conclamant illico, collectisque vasis, tumultuariã fugã se se propriiunt. Tum verò Centurio ille ac-

accepti mandati immemor, neque Ducem de fuga hostium edocere sollicitus, relicta à barbaris tormenta in fugitivos convertit, magnamque, ut confusi erant, eorum stragem edit. Audito machinarum fremitu ESZTERHAZIUS, stetit attonitus nonnihil, quidque rerum ageretur incertus, alium illico expedit, certiora relaturum: qui ubi hostem, relictis impedimentis omnibus, fugisse nunciavit, accursum est cum reliquo agmine, insecutique nostri per octo leucas panico metu correptum barbarum, postquam suis partim victricibus dextris, partim Serviæ & Bosniæ rusticorum operâ delevissent, cum 8 Janitsaris, 10 tormenta currulia, 143 varia supellectile currus divites, papilionες ad unum omnes ad castra reducerunt. Facit nonnullam victoriæ huius mentionem *Ketteler*; (z) qui tamen graviter in Ducis nomine lapsus, locò JOSEPHI Simonem, qui tunc nullus in castris Regiis, Eszterházius nominat. Fuere in ea expeditione Franciscus Fodor Babocsaianæ legionis Legatus, Sigismundus Pyber, Joannes

P

Ha-

(z) *Lib. 52.*

Havor, & Joannes Drobolovich Centuriones, Joannes Georgius Redli Ghilanianæ, Franciscus Hajkovich Emerici Zsidonis legionum itidem Centuriones, aggregatus item, ut dicimus, Joannes Holler, ac denique Joannes Furo, atque Gazso Pro-Centuriones. Non multò post alter Splénii Ungarorum manipulus, Ductore in Tribuni absentia Samuele Farkas de Kazub tum Centurione, uno abhinc 1737 anno Emerici Desöffi Pro-Tribuno Orsovam, nobilem in medio Istri arcem, diffugientibus pari metu Turcis, magnâ nostrâ gloriâ, maximò universæ Ungariæ bonò, interceptit. Redeunte in castra victore ESZTERHAZIO, postquam Ujpalancæ festos inter tormentorum, mugitus consuetò Hymnò laudes summo Numini decantatæ fuissent, cùm Turcis captivis narraretur, exiguum hunc militis Ungarici manipulum esse Heroës illos, qui Seraskierum cum 30 millibus prostravissent, illi mixto pudori furore succensi, in propria ora, crinésque sævientes, infano ululatu florentem adedò exercitum Turcicum exigua Ungarorum manu debellatum gemebant. Aucturus barbarorum eo-

runo

rundem dolorem ESZTERHAZIUS erepta hosti tormenta cum cetera supellectile Turcica pro suo tentorio statui, pluribusque diebus exposita oculis captivorum objici præcepit.

Confecta verò Passaroviczensi pace, missus ipse annò 1719 in Italiam, utilem postea, anno sequente in Siciliam translatus, non sinè manifesto vitæ discrimine operam navavit; in Panormitana namque Aprilis mensis oppugnatione, cum in humili fortè tuguriolo mensæ assideret, pyroboli fragmine, multas muri, lapidumque partes spargente ipse quoque ictus momentò prosternitur, non nisi incisâ per Rochusium, quo à cubiculis utebatur, venâ, admotûque naribus balsamò sibi restitutus. Accessit dolor alter: sed animi, dum Bellici Senatûs Consultò legionem suam, nullâ aliâ substituta, ibidem exauthoratam videre cogeretur; ingenti id militum ipsorum factum luctu est, quem sparsi decentibus martiales vultus lacrymis satis testabantur.

Solaturus dolorem Rex, eidem circa annum 1721 Gestessinam ditionem, Fratri Antonio, Regis clementiam re-

nuenti, subditam contulit, útque Tattensem agrum ære non modico juris sui facere posset, concessit. Auxit postea annò 1733 utrámque ditionem, novisque ex Alsatia, Franconia, Rhœni tractu accitis Coloniis, pagos aliquot constituit. Memor ille tamen hic quoque insitæ sibi pietatis, Divino cultui partem aliquam consecraturus, PP. Camaldulensibus prædium, Maik sub arce Gestes situm confert, illúdque cum sylvis, agris, pratis, molis & piscinis, impetrata Donatione Regia, potestati DEI servorum, transcribit: convehiturque jam copiosa vis lapidum, extruendo Cœnobio servitura. Et remunerasse visus illico liberalem aded pietatem DEUS fuit; Aprili enim mense ex Magistro Curia Regiæ, quod ille munus à morte Michaëlis Eszterházi, Pauli Palatini filii, acceperat, Pro-Rex Illyrici dictus, inclinata jam æstate ex Generali Campi Vigiliarum Præfecto, Generalis quoque Campi Mareschalli Locumtenens renunciatur. Gaudet, etiamnum Provincia Comaromiensis datum sibi illum pluribus jam ab hinc annis Supremum Comitem: suspicit

Lo-

Locumtenentiale Regium Consilium, gravem Senatorem: Septemviralis verò Tabula Patriæ se Patre, Legumque tum Canoniarum, tum Civilium peritissimo spoliata indoleret etiamnum vehementissimè; nisi JOSEPHO in Illyricum translato, Franciscum pariter Eszterháziū Excellentissimi Pro-Regis fratrem accepisset successorem.

Hæc tam præciara animi decora viam ad summam Illyrici Præfecturam viro illustri struxerunt. Pergit ille, veterem nunc quoque augere gloriam, memòrque virtutis pristinæ anno hoc 1737, quo in Turcam Ungariâ totâ, arma parantur, Croaticis & ipse, summò illius Gentis gaudiò, Dux datus cohortibus, strenuè se, suòsque ad id bellum comparare non cessat. Castra nunc ad Kostaniczam in *Plavicevo-polie* metatur, ubi nova signa militaria nuper ab Illustrissimo Georgio Branyuk Zagrabiensium Episcopo, ab insigni morum integritate, variâque eruditione Præsule commendatissimo, consueto Romanæ Ecclesiæ ritu sacrata audivimus. Fortunent vota boni Superi, concedântque propitii, ut tanti Ducis virtute, reliquum pariter Illyricum Fidei Christianæ,

næ, libertatique pristinæ assertum hilar-
res videamus. Sperare id nos facit, no-
ta omnibus in Coeli Reginam Pro-Regis
pietas, cui ille annô 1735 ad novam
Germanorum Coloniam Semle, Geste-
siæ arcis proximam vetus Sacellum è rui-
nis eduxit magnificè, politoque marmo-
re ad decorem ornavit. Coronidem,
Historiæ imponat unicus Matre Franci-
sca è Comitibusab Eck, natus Josephus
pariter, filius, qui Tyrnaviæ, Viennæ-
que politioribus omnibus excultus di-
sciplinis, lustratis aliquot Europæ Regi-
onibus, Ungariâ ad extremum ipsâ, ac
Transylvaniâ vestigatâ, uno abhinc
mense Jun. an. 1737 Patrem in Illyricum
secutus est, ut domesticis Excellentissimi
sui Genitoris intentus exemplis, in
parem Heroëm, Patriæque nostræ
Columen se se efformet.

O. A. M. D. G. B. V. M.

E T

OO. SS. H.



Digitized by Google

